

# MATEYU

## Temane Peangamo MATEYUni Torumu Bokumu

### TEMANE PEANGAMO

**Mateyu, Mako, LLuku, Jono Keme, Enene Toringi Bokuma**

Aku Bokumanga Ungu Pulu Mare

Yesusinge temanemondo “temane peangamo” nilimolomonga ungu pulumu Mako 1:1 molemo. Ye kisene Yesusi mana manie omba molopalie tepa andopa molorumu mele temanemo bokuna toringi. ‘Makone boku te ou torumu. Mateyu LLukutolone pe toringili. Jonone paa pe boku torumu.’ ningu pilimele. Makone torumu bokumu ponjili mele, Mateyu LLukutolone toringili bokutolo sulu mele. Kanu boku yepoko temane kinie ungu kinie molemo mele telu sipemo. Nakolo Jonone konopuni pilipelie bokuna torumu mele lupe. Yuni torumu bokuna temane molemomo sike Yesusinge temanemola nakolo ye yepokane temane aisili toringime yuni naa topa, Yesusini nirimu ungu aisili Jono yuni mindi torumu, ye yepokane naa toringi. Ye kise akumane bokuma walu naa toringi. Enene yu mele mele ‘Yesusi molorumu mele kinie ungu mane sirimu unguma kinie yambomane pilkulie konopuni apuruku pilku teangi.’ ningu temanema pilku apuruku bokuna toringi.

Mateyu kinie Jonotolo mindi Yesusi lombili andoli yetolo moltkolo Yesusi pulu monjipe yunge kongonomo andopa terimu kinie pea andoringi, yuni terimu mele sumbi siku kanokolo, nirimu unguma sumbi siku piliringili. ‘Boku Mako ye Makone sike boku torumu liemo Yesusi lombili andorumu ye Pitane temane topa siriumpa pilipelie bokuna torumu.’ ningu pilimele. Yambo marene pilkulie ‘Mateyu LLukutolone Makone ou torumu bokumu kanokololie mare manda lelko toringilinje.’ ningu pilimele. LLuku yu konopu pilipe konginjili ye doketamo molopalie, Yesusi molopa andopa terimu mele yuyu andopa walsipe pilipe, temane aisili mimi sipe pilipe bokuna torumu (Kollosi 4:14, LLuku 1:1-4).

Yesusi yu sike Pulu Yemonga kandi Malo nakolo yu mana ye molombando meringi yambomanga anda kolepalime Mateyu LLukutolone temane bokuna toko

(Mateyu 1:1-17, LLuku 3:23-37); yu meringi mele temanemo kanu yetolone mindi toringilila.

Ungu te kamu piliéni: Ye talo molo yepokone temane telumu toringi kinie kanokolie, akuma pali mimi siku kanokolie laye lupe lupe toringi mele kanani.

Ya ungu pulumu pora nikimu.

### I Bokumunge Ungu Pulu Mare

Ungu pulu mare inie yakondo gomo 1 molemo.

Imbi Mateyunge ungu pulumu “Ailimuni we sirimumu”. Yu Romo gapomano kou takisi linjili yemo molopili Yesusini yundu “Na lombili oi.” nirimu. Yunge imbi te LLipai (Mako 2:14,15, LLuku 5:27-29). Yuni boku Mateyu sike torumu nimbe para silimo ungu te bokumunge sukundu naa nimbe molemo. Nakolo koronga ou pilipe kongnjili perimu yambo marene pilkulie ‘Mateyuni sike torumu.’ ningu piliringimunge kinié kepe aku sipu nimbu pilimolo.

Mateyuni Yesusinge temanemo bokuna tombando ‘Pulu Yemone yunge yambomando “Walse ene nokopa konjimbe ye nomi te ene molongena lipu mundumbu.” nimbe, ou nimbe panjipe mako torumu yemo, Yesusi yu kanu yemo ombo molorumu mele Isirele yambomane paa pilkulie “Yu sike aku yemo.” ningu tondolo munduku piliengi! nimbe, Yesusinge temanemo tombando kanu ye nomi Kirasimu pe ombo molopa temba mele ou Yesusi mana manie ombo naa molopili ou ningu siringi mele Yesusini ombla molopa terimu temanema wale aisili topa sirimu. Pe wendo ombá mele ou ningu siku bokuna toringi tungu mare Mateyuni mindi nimbe sirimu (Mateyu 1:22-23, 2:15, 2:17-18, 2:23, 4:14-16, 8:17, 12:17-21, 13:35, 27:9-10). “Ye nomi kingi Depisini kalopa lirimu yemo” wale aisili bokuna torumula, akumunge pulumu telu sipemo. Pulu Yemo ye nomi kingimu molombamonga ungu aisili bokuna torumula.

Yesusini ungu mane sirimu aisili bokuna torumu (Mateyu kolomongo aili 5-7 pali, 10 pali, 13 pali, 18 pali, 24-25 pali).

Ungu pulu mare boku ambolkonomonga alsena paa anjukundu i sipe mele molemo kanani: “23. Krais”, “32. Pikinini 32.1 Bilong Devit, 32.2. Bilong God, 32.3. Bilong Man”, “20. kingdom”.

Ya ungu pulumu pora nikimu.

**1** <sup>1</sup>Isirele yambomanga ou pulu pulu anda kolepa<sub>1</sub> Eporayamo kinie pe yandopa<sub>1</sub>enenga ye nomi kingi aili<sub>1</sub> Depisi kinie eltene Yesusi Kirasi kalko liringili mele i sipe:

<sup>2</sup>Eporayamone Aisake merimu;

Aisakene Jekopo merimu;

Jekopone Juda kinie Judanga angenupilime kinie merimu;

<sup>3</sup>Judane Peresi kinie Sera kinie merimu,

kanu yetolonga anumu Tema;

Peresini Esirono merimu;

Esironone Ramo merimu;

- <sup>4</sup>Ramone Aminadape merimu;  
 Aminadapene Nasono merimu;  
 Nasonone Sallimono merimu;
- <sup>5</sup>Sallimonone Boasi merimu, Boasi yunge anumu Reapa;  
 Boasini Opete merimu, Opete yunge anumu Rute;  
 Opetene Jesi merimu;
- <sup>6</sup>Jesini ye nomi kingi Depisi merimu.

Depisini Sollomon merimu. Sollomononga anumu  
 ou Yurayanga ambo menumu molorumu.  
 Pe Depisini kanu ambomo konopu monjipe  
 Yuraya topa konjipe ambomo yu lirimu.

- <sup>7</sup>Sollomonone Riapoamo merimu;  
 Riapoamone Apaya merimu;  
 Apayane Eta merimu;
- <sup>8</sup>Etane Josipate merimu;

- Josipatene Joramone merimu;  
 Joramone Asaya merimu;
- <sup>9</sup>Asayane Jotamo merimu;  
 Jotamone Eyasi merimu;  
 Eyasini Esikaya merimu;
- <sup>10</sup>Esikayane Manasa merimu;  
 Manasane Emosi merimu;  
 Emosini Josaya merimu;

- <sup>11</sup>Josayane Jekonaya kinie yunge angenupilime kinie  
 merimu. Josaya kolopili yunge malopili molangi opa  
 tou yamboma Isirele yamboma kinie ongo opa  
 tekolie toko munduku Isirele yambo aisili ka siku  
 enenga kolea aili Bepillono mengo puringi.

- <sup>12</sup>Ka siku mengo puringi kinie pe  
 Jekonayane Sialtele merimu;  
 Sialtelene Serapapele merimu;

- <sup>13</sup>Serapapelene Apayate merimu;  
 Apayatene Ellayakimu merimu;  
 Ellayakimuni Eso merimu;

- <sup>14</sup>Esone Sedoke merimu;  
 Sedokene Ekimu merimu;  
 Ekimuni Ellayate merimu;

- <sup>15</sup>Ellayatene Elliesa merimu;  
 Elliesane Matano merimu;  
 Matanone Jekopo merimu;

- <sup>16</sup>Jekopone Josepo merimu.

Josepo Maria menu. Josepone Maria ou naa lipili  
 Maria yu ambolango olona monjipe molorumu.  
 Pe ambo yetolo moloringili kinie  
 Mariane Yesusi merimu.

<sup>17</sup>Pulu Yemone “Ene nokopa konjimbe ye nomi te lipu mundumbu.” ou nimbe mako torumu yemo pe Yesusi aku yemo omba molorumuna, yunge imbi te pea sikulie ‘Kirasimu’ niringila.

<sup>18</sup>Eporayamo kinie Eporayamone yandopa yandopa kalopa lipe Depisi kalopa lipe terimu yema Yesusinge, anda kolepa tene po moloringi. Pe Depisini yandopa yandopa ou Bepillono yambomane Juda yambo mare ka siku Bepillono anju naa mengo pangia anda kolepa tene pola moloringi. Bepillono ka siku mengo puringi kinie pe yandopa ye nomi Kirasimu kinie kalko liringi ye tene pola moloringi.

<sup>19</sup>Yesusi, Pulu Yemone “Ene nokopa konjimbe ye te lipu mundumbu.” ou nimbe mako torumu ye nomi Kirasimu, yu meringi temanemo i sipe:

Yunge anumu Marianga pulu lerimu yambomane “Maria Josepone lipili.” ningua koronga niringi nakolo ou Josepo pea teluna naa peangili Mini Kake Telimuni Maria yunge olona ambolango te monjinjirimumu Maria yuyu pilirimu. <sup>20</sup>Kanu kinie yunge ye Josepo yu ye sumbi nilimu molorumuna Maria ambolango monjirimu kinie pilipelie ‘Maria olie naa polopili.’ nimbe ‘Yambo aisili molangi yu temu mele nimbu para naa sipu yu yuyu molomba kinie kiyongo nimbu we “Kamu pui.” niembo.’ konopu lerimu.

<sup>21</sup>Josepo aku sipe konopu lipe mundupe molopili Ailimunge angello tene Josepo uru kumbu sipelie nimbendo: “Josepo, ye nomi kingi Depisini kalopa lirimu yemo, Mini Kake Telimuni Maria ulu te terimuna yu ambolangomo olana monjilimo kene yu linindu pipili naa kolko li.” nirimu. <sup>22</sup>“Yu kango kanopa limbe. Kanu kangomone yunge yamboma ‘Enenga konopuna ulu pulu keri telemelema pepili molkolie mindili nonge.’ nimbe ene lipe taponjipe, mindili nolemelka ulkena wendo lipe, yu kinie pea molko konjingí aulkena lipe monjimbe kene yunge imbi lelko “Yesusi” nieni.” nirimu.

<sup>23</sup>Aku sipe wendo orumu ulumanga pali koronga ou Pulu Yemone ungu umbu tonjirimuma pilipe yamboma nimbe sirimu ye tene ulu mare pe wendo ombá ou nirimu mele kamu wendo orumu. Akumu i sipe:  
<sup>24</sup>“Pilieyo.

Ambo wenepo tene ambolango olona monjipelie  
 kango te memba.

Kanu kinie yunge imbi lelko “Imenuele” ningí.”  
 nirimu. I imbimunge ungu pulumu ‘Pulu Yemo olio kinie molemo’.

<sup>25</sup>Josepo uru pepa makilipelie Ailimunge angellomone nirimu mele pilipe lipe tepalie ambomo lirimu. <sup>26</sup>Nakolo yu ambolangomo ou naa

mepili “Teluna naa peambili.” nirimu. Pe Mariane kango te merimu kinie Josepo yuni yunge imbi lepa “Yesusi” nirimu.

**2** <sup>1</sup>Erote kolea Judia disiriki yambomanga ye nomi kingi molopili Mariane kolea Judia, Betellieme taonona Yesusi merimu. Kanu walemanga ena wendo oli koleana pilipe konginjili peli ye pokore alieli ‘Ulu mare wendo okomonje piliemili.’ ningu kombukandipime mimi siku kanoko moloringime kolea aili Jerusalleme ongolie ningindu:

<sup>2</sup>“Juda yambomanga ye nomi kingi molomba kango meringimu tena molemoye? Olio ena wendo olemo koleana molopolie ye te ye nomi kingi molomba meringimu lipe ora sili kombukandipi te pulu pulu wendo omba angilirimu kanopolie nirimulumuni, yu popo topo imbi ambolopo ola linjimulundu okomolo.” niringi.

<sup>3</sup>Ye nomi kingi Erote i ungumu pilipelie ‘Ye te yu kolo wangopa kingi molomba lepamo.’ nimbe pilipelie yu mini wale mundupe, Jerusalleme yamboma pali mini walela munduringi.

<sup>4</sup>Kanu kinie yuni Juda yambomanga Pulu Yemo popo tonjiringi ye ailime pali kinie Pulu Yemonga ungu manemanga puluma pilku mane siringi yema pali kinie “Sukundu wai.” nimbelie ene walsipe pilipelie nimbendo: “Pulu Yemone “Ene nokopa konjimbe ye te lipu mundumbu.” nimbe mako torumu ye nomi Kirasimu tena mengemondo niringiye?” nirimu.

<sup>5</sup>Enene yuntu ningindu: “Kolea Judia sukundu Betellieme taonona yu menge. Pulu Yemone ungu umbu tonjirimuma pilipe yamboma nimbe sirimu ye „Maikane„ pe aku sipe wendo ombamondo ou nimbe boku torumu akuna molemo kanumu. Yuni nimbendo:

<sup>6</sup>“Betellieme, kolea Juda lemo kolea te,  
yu kolea Juda sukundu kolea ailimenga  
yu kolea manie te molo.  
Yunge sukundu ye nomi aili te wendo ombá,  
akumuni nanga Isirele yambomanga  
sipisipi tapu yemo molopa ene nokomba.”  
nirimu kanumu.” niringi.

<sup>7</sup>Kanu kinie yambo lupema naa kanoko naa pilku molangi Erotene pilipe konginjili peli yema “Wai.” nimbe kombukandipimu pulu pulu wendo omba angilirimu walemo walsipe pilipelie nirimumuni, yuntu ningu siringi kinie <sup>8</sup>pilipelie enendo nimbendo: “Ene Betellieme puku kangomo wamoko koropayo! Kanoko lenjikulie na ongo ningu sieyo. Na kepe yu ombo popo topo imbi ambolopo ola linjembo.” nirimu.

<sup>9</sup>Kingimuniaku sipe nirimu pilkulie ene kelko puku kanopuringi.

Kanu kinie ena wendo oli koleana molkolie kombukandipi kanoringimu ene puringine kumbi lepa pumbe pupelie kangomo molorumu ulke imuna pupe ola angilirimu. <sup>10</sup>Enene kombukandipimu kanokolie konopu

paa aili teko siringi. <sup>11</sup> Ulkena sukundu pukulie kangomo kinie anumu Maria kinie moloringili puku kanoko lenjiringi. Kanokolie kangomonga kumbikerena kororongo langoko ma kanokolie yu popo toko imbi ambolko ola linjiringi. Linjikulie ene wale peanga mengo oringime apisiku mele peangama wendo liku yu siringi. Kou gollo kinie, paura kalemele kinie mune paa toli paura te kinie, kopongo wele mune paa toli te kinie, aku melema yu siringi.

<sup>12</sup> Kanu kinie Pulu Yemone ene uru kumbu sipelie enendo nimbendo: “Ene Erote molemona kelko pu naa pangi, molo.” nirimu kinie pilkulie ene aulke tenga lupe ongolie ulkendo puringi.

<sup>13</sup> Kanu kinie pilipe konginjili peli yema kelko puringi kinie Ailimunge angello tene Josepo uru kumbu sipelie nimbendo: “Ye nomi kingi Erotene nondopa yunge ami yemando “Kangomo koroko toko konjipai!” nimbé kene nu ola molkolie kangomo kinie anumu kinie liku mengo kolea Isipindu kowa puku molopayo. Ne anju molkolie ningímini, pe nane “Kelko yando wai.” nimbú kinie wangí. Ou molo.” nirimu. <sup>14</sup> Aku nirimu kinie pilipelie Josepo ola molopalie ipulueli anungulutolo lipe memba Isipindu purumu. <sup>15</sup> ‘Erote kolomba kinie kelepo ulkendo pumulú.’ ningu ou Isipi anju moloringi. Aku teringimunge Pulu Yemone ungu umbu tonjirimuma pilipe yamboma nimbe sirimu ye tene ulu te pe wendo ombá ou nirimu mele kamu wendo orumu. Akumu i sipe:

“Pulu Yemone nimbendo:

“Nanga kangomondo

“Kolea Isipi munduku kelko  
wendo oi.” nirindu.” nirimu.”

nimbe kanu ye [Osiane] nirimu kanumu.

<sup>16</sup> Kanu kinie anumu lapatolo Yesusi pea Isipi puku molangi, pilipe konginjili peli yemane Erote yu liku lou lenjiringi Erote yuni pilipelie mumindili paa pulumu kolorumu. Mumindili kolopalie ami ye marendo nimbendo: “Betellieme taono kinie Betellieme nondopa lemo koleama kinie kanumanga puku kango ponie talo omba puli kangoma kinie ponie talo naa pora nili kangoma kinie koroko toko konjipai!” nirimu. Kombukandipi kanoko pilipe konginjili peli yemane kombukandipimu pulu monjipe wendo omba angilirimu walemo yundu ningu siringi mele pilipelie ponie aku sipe nirimu.

<sup>17</sup> Aku sipe terimumunge koronga ou Pulu Yemone ungu umbu tonjirimuma pilipe yamboma nimbe sirimu ye Jeremayane ulu te pe wendo ombá ou nirimu mele wendo orumu. <sup>18</sup> Yuni nimbendo:

“Ene kolea Rama suku ungu te piliringi;

kola teringi pilku,

yambo kolemele kinie kola telemele mele

kola aku siku teringi piliringi.

Ambo Reselene yunge ambolangomanga kola terimu.  
 Yu ‘Konopu pe nipili.’ ningulie teringi nakolo  
 yunge ambolangoma naa moloringine  
 yu kondo kolopa mindi molorumu.”  
 nimbe Jeremayane ou aku nirimu kanumu.

<sup>19</sup>Pe Erote kolorumu kinie Ailimunge angello tene Josepo Isipi molopili uru kumbu sipelie nimbendo: <sup>20</sup>“Kangomo toko konjengi koropai.” nirimu yemo kolorumu kene ola moloko anumu malotolo liku mengo kolea Isirelendo kelko pui.” nirimu kinie <sup>21</sup>pilipelie yu ola molopa anumu malotolo lipe memba Isirelendo purumu.

<sup>22</sup>Nakolo Akellesi yunge lapa Erote kolo wangopa ye nomi kingimu molopa kolea Judia disiriki nokorumu pilipelie Josepo yu kanuna altopa pumbendo pipili kolorumu. Kanu kinie Pulu Yemone uru kumbu sipelie nimbendo: “Marena tongenje kene akuna naa pui.” nimbe yundu lepi lepi torumu kinie yu kelepa kolea Gallilli disiriki pupe <sup>23</sup>akuna lerimu Nasarete taonona pupe molorumuna Pulu Yemone ungu umbu tonjirimuma pilku yamboma ningu siringi yemane Yesusi kinie ulu te pe wendo ombá ou niringi mele kamu wendo orumu. Enene ningindu:

“Yambomane “Yu Nasarete taono ye te.” ningí.”  
 niringi kanumu.

**3** <sup>1</sup>Yesusi Nasarete taonona we molopili, No Linjili Jono omba kolea Judia disiriki sukundu kolea ku leline opa ungu nimbeline nimbendo: <sup>2</sup>“Pulu Yemo ye nomi kingimu molomba walemo nondopa wendo ombá tekemo kene enenga ulu pulu keri teringi konopuna pelemoma munduku kelko konopu alowa teai.” nirimu.

<sup>3</sup>Kanu yemo ou naa molopili paa koronga ou, Pulu Yemone ungu umbu tonjirimuma pilipe yamboma nimbe sirimu ye Aisayane Pulu Yemonga ungu te nimbe sipe boku torumu. Kanu ungumu i sipe:

“Kolea ku leline yambo tenga kerena  
 ungu te nimbendo:  
 “Ailimu ombá aulkemo teko mimi tenjei.  
 Yu ombá aulke kangama  
 toko sumbi siei.” nikimu.”

nirimu. Aisayane Jonone paa pe temba mele ou aku sipe nimbe panjipe boku torumu..

<sup>4</sup>Jono yu kongi kemelenga indini teli wale te pakopa, kongi kilumuni teli kako te topalie, kulikumbe kinie pilimu no kinie aku langitolo mindi nomba molorumu. <sup>5</sup>Kanu kinie kolea aili Jerusalleme yamboma kinie Jerusalleme lerimu kolea Judia disiriki pali yamboma kinie kolea Jodane pali yamboma kinie kanu yemo molorumuna pukulie niringimuni, <sup>6</sup>no Jodane sukundu pukulie enene ulu pulu keri teringime ningu para siringi kinie yuni ene no linjirimu. <sup>7</sup>Yuni Juda yambomanga ye aili Parisime

kinie Sadusime kinie aisili no lingíndu oringi kanopalie nirimumuni, ene iri topalie nimbendo:

“Kolo topa yamboma tepa kenjili wambyiyemonga waloma, Pulu Yemo mumindili kolomba walemonga naene “Ene talopa lelko pai.” nimu kinie ene ‘Pulu Yemone naa tepa kenjipili.’ ningu ‘No liemili.’ ningu okomeleye? <sup>8</sup>Ene sumbi siku molko, ulu peangama mindi tekо molonge kinie ene ulu pulu keri teringime paa sike munduku kelko konopu alowa tenge mele mona lemba. <sup>9</sup>“Olio anda kolepa Eporayamone kalopa lirimuma molemolomonga yambo peangama molemolo.” ningu aku siku ningu naa pilieme. Nane ene nimbu sikiru: ‘Pulu Yemone i koumando “Eporayamone kalopa lirimu yamboma au leangi.” nilkenje kouma Eporayamone kalopa lirimu yamboma molemelka.’ nikiru. Ene Eporayamone kalopa lirimu yamboma molemelemonga uluri naa telemo.

<sup>10</sup>“Unju peko tomba loumu Pulu Yemone koronga unju puluna ambolopa ola lipе molemo. Unju mongo peanga naa tomba unjuma yuni peko topalie tepena kalomba. <sup>11</sup>Nane ulu pulu kerime siye kolko konopu alowa telemel yamboma sike no linjilio. Nakolo te na akilipe ombámo yuni „Pulu Yemonga“ Mini Kake Telimu kinie tepemo kinie ene linjimbe „lingí“. I na akilipe ombá yemo yunge tondolomo paa olandopa, nanga tondolomo paa maniendopa. Na yu kinie manda molo. Yambo ailimenga kongono keri teli kendemande yambomane sike enenga ailimenga kongono keri tenjingindu kimbu su wendo linjilimele nakolo na akilipe ombámonga kimbu su wendo linjimbu kanu kongonomo paa olandopa mele nane tenjimbu kapola naa telka, „na ye paa keri.“

<sup>12</sup>“Yuni yunge rasi witi apuruli apulu pokomo ambolopalie yunge rasi witi mongo kinie rasi witi kilu kinie apurumbendo molemo. Yunge rasi witi apuruli polomo tepa mimi tembando rasi witi pali ‘wendо liembo.’ nimbe apurupelie mongoma lipе rasi witi nosilimo mingine ‘Lepili.’ nimbe nosimbendo mingi topa, pe kiluma lipе maku topa tepe naa kumbulupe nomba pepa mindi pulimona kalomba.” nirimu.

<sup>13</sup>Jonone yamboma no linjipe molopili Yesusi kolea Gallilli disiriki mundupe kelepalie nirimumuni, ‘Jonone na no linjipili.’ nimbe Jono no Jodane molorumuna yu purumu. <sup>14</sup>Orumu kinie Jonone nimbendo: “Aku paa molo. Nane nu no nambe tepo linjembo ningu nikinuye? Nuni na no linjilinanje papu.” nirimu.

<sup>15</sup>Nakolo Yesusini pundu topa nimbendo: “Molo. Ulu kake teli uluma pali kapola tepili kene nikiru mele tei.” nirimu. Kanu kinie Jonone “Kapola.” nimbe yu no linjirimu.

<sup>16</sup>Yesusi no lipе pora sipelie nona sumbi sipe wendo orumu. Wendo ombá orumu kinie mulúmu kengeya lepa anju yando purumu, Pulu Yemonga Minimu, kera waembono mele, manie om̄ba Yesusi molorumuna pupe kangine ola molorumu kanorumu. <sup>17</sup>Kanu kinie muluna ola ungu te

wendo ombalie, “I nanga konopu monjilio kangomo. Yu kinie konopu sipu molio.” nirimu.

**4** <sup>1</sup>Yesusi „no lirimu kinie Pulu Yemonga Minimu yu kinie omba molopalie nirimumuni,“ Minimu yuni ‘Kurumanga nomi depelemone yu kondi topili.’ nimbe Yesusi kolea ku leline memba purumu. <sup>2</sup>Akuna Yesusi oli te koro talo mele langi naa noli we molopa perimu kinie yu engelene kolopa molorumu.

<sup>3</sup>Kanu kinie „kuru,“ kondi toli „Setene,“ ombalie yundu nimbendo: “Nu Pulu Yemonga Malo liemo i kouma ‘Pillawa kaloli au lepili.’ ni.” nirimu.

<sup>4</sup>Nakolo yuni pundu topa nimbendo: “Pulu Yemonga bokumuni nimbendo:

‘Langimene mindi yamboma konde mololi ulu pulumu naa silimo.

Pulu Yemone ungu nilimoma pali  
pilku liku teko molonge kinie  
konde mololi ulu pulumu lingí.’

nimbe molemo.” nirimu.

<sup>5</sup>Kanu kinie depelemone Yesusi lipe kolea aili Jerusalleme, akumundu ‘kolea aili kake teli’ nilimu, akuna memba pupe Pulu Yemo popo toko kaloringi ulke tembelena memba, paa ola imuna pupe anjipelie nirimumuni, <sup>6</sup>yundu nimbendo: “Nu Pulu Yemonga Malo liemo nu lipe taponjimbe kene pou ningu manie pui.” „nirimu.“ “Pulu Yemonga bokumuni nimbendo:

‘Pulu Yemone yunge angellomane  
‘Nu ongo nokangi.’ nimbé.

Enene nu ‘Kou tene kepe na topili.’ ningu  
nu enenga kimene oko polko lingí.’

nimbe molemo kanumu. Aku sipe nirimu kene pilkulie aku siku tei.” nirimu.

<sup>7</sup>Yesusini yundu nimbendo: “Pulu Yemonga yambomando ungu te pea nimbe molemola. Akumu i sipe:

‘Pulu Yemo enenga Ailimuni “Tembo.” nilimo mele  
‘Sike nilimonje molo kolo tolemonje kanamili.’  
ningu enene yu manda manjiku na teangi.’  
nimbe molemola kanumu.” nirimu.

<sup>8</sup>Altopa depelemone yu lipe mulu te paa olandopa lerimuna ola memba pupe anjipelie, yu ma koleama pali kinie koleamanga mele peangama pea lipe ora sipelie <sup>9</sup>yundu nimbendo: “Nu nanga kumbikerena koporongo langoko manie molko na popo toko nanga imbi ambolko ola linjinu liemo i nu kanokono ma koleana lemo melema pali nu simbu.” nirimu.

<sup>10</sup>Kanu kinie Yesusini yundu nimbendo: “Setene, nu anju pa! Pulu Yemonga bokumuni nimbendo:

‘Pulu Yemo enenga Ailimu manjiku popo toko  
imbi ambolko ola linjiku,  
yunge kongonoma manjiku tenjiku molangi.’  
nimbe molemo kanumu.” nirimu.

<sup>11</sup> Kanu kinie depelemo Yesusi yu mundupe kelepa yu purumu. Purumu kinie mulu koleana angelloma ongo Yesusi nokoringi.

<sup>12</sup> Kanu kinie „No Linjili, Jono ka siku ka ulkena panjiringi kinie pilipelie Yesusi kelepa kolea Gallilli disirikindu yando omba <sup>13</sup>Nasarete taonona ombalie nirimumuni, pe aku taonomo mundupe kelepa Kapeniamē taono, nomu Gallilli kélona lerimu, akuna pupe ‘Kinié i koleamo nanga molombo kamu koleamo lepili.’ nimbe akuna molorumu. Kapeniamē ye Sepullano kinie Napatallaitolone kalko liringili yamboma ou moloringi koleana lerimu. <sup>14</sup>Kapeniamē taonona pupe molorumumunge koronga ou Pulu Yemone ungu umbu tonjirimuma pilipe yamboma nimbe sirimu ye Aisayane ulu te pe wendo ombá ou nirimu mele kamu wendo orumu. Aisayane nimbendo:

<sup>15</sup>“Sepullanone kalopa lirimu yamboma  
pelemele koleamo kinie,  
Napatallaine kalopa lirimu yamboma  
pelemele koleamo kinie,  
nomuna pulimo aulkemo no Jodane nekendo  
lemo koleamo kinie,  
kolea Gallilli wikindu yambo lupe aisili  
molemele koleamo kinie,  
aku koleamanga molemele yamboma  
„paa sumbulu tolina molemele.”

<sup>16</sup> Kanu yambo paa sumbulu tolina molemelema  
pa tondolo paa aili tepa teli te kanoringi.  
Kololi ulu pulumu aki topa sumbulu tonjilimo  
koleana pelemele yambomanga koleana  
pa tenjikimu.” nirimu.

<sup>17</sup> Kapeniamē omba molorumu kanu walemonga Yesusini yamboma pulu monjipe unguma nimbe sipelie nimbendo: “Pulu Yemo ye nomi kingimu molopa nokomba walemo nondopa wendo ombá tekemo kene ‘Pulu Yemo yuni nokomba yambomanga talapena sukundu molamili.’ ningū ulu pulu keri telemelema munduku kelko konopu alowa teai.” nirimu.

<sup>18</sup> Yesusi Nomu Gallilli kélona andopalie angenungulu talo kanorumu, akutolo Saimono kinie angenu Enderutolo oma lili wale te nomuna toko munduku moloringili kanorumu. Pe Saimononga imbi te Pita niringila. Oma liringili akumu eltenga kou kongono teringili kanumu. <sup>19</sup>Aku siku teko moloringili kanopalie nimbendo: “Na lombili wangili. Oma

lingilindu oma lili wale te liku nona manie mundulimbele kinie omama walena omba pelemo mele, pe ‘nanga kongonomo tengelendo nanga ungumu pilkulu ningu siliku andongele kinie yamboma nanga talapena sukundu ongo molangi.’ nimbu ‘Elte na lombili wale.’ nikiru.” nirimu.  
**20** Aku nirimu kinie pilkululie tamburembu eltenga oma lili walema munduku kelkololie Yesusi lombili puringili.

**21** Kanu kinie yu laye kolte wilsu pupelie angenungulu talo lupe kanorumu, akutolo Seperi malo Jemisi kinie Jemisi angenu Jonotolo, lapa Seperi kinie enenga nona andoli sipine sukundu oma lili walema toko tambulku moloringi kanopalie elte walsipelie “Na lombili wale.” nirimu.  
**22** Aku nirimu kinie pilkululie eltenga lapa Seperi kinie nona andoli sipimu kinie tamburembu munduku kelkololie Yesusi lombili puringili.

**23** Kanu kinie Yesusi kolea Gallilli disiriki sukundu koleamanga pali andopa, yamboma maku toko Pulu Yemonga ungumu piliringi ulkemanga yamboma ungu mane sipe, Pulu Yemo nondopa ye nomi kingimu molopa nokomba mele temane peangamo topa sipe, yambo kuru lupe lupe torumuma kinie kagine ulu aisili terimuma kinie tepa konde lirimu.

**24** Yu terimu mele temanemo kolea Siria poropinji koleamanga pali anju anju purumu pilkulie enenga yambo kuru lupe lupe torumu yamboma kinie, mindili lupe lupe nongo moloringi yamboma kinie, yambomanga konopuna kuru molko amboloringi yamboma kinie, kuru kopalli torumu yamboma kinie, kimbu ki kukurumu yamboma kinie, yu molorumuna mengo oringi kinie yuniene tepa konde lirimu. **25** Yambo paa aisili yu lombili puringi. Kolea Gallilli disiriki yamboma kinie, ‘Kolea Aili Rureponga Talo’ niringi kolea yamboma kinie, kolea Judia disiriki lerimu kolea aili Jerusalleme yamboma kinie, kolea Judia sukundu lerimu we koleamanga moloringi yamboma kinie, no Jodane nekendo koleamanga yamboma kinie, paa aisili yu lombili puringi.

**5** **1** Yesusini yambo aisili maku toko yu lombili puringime kanopalie ma pangine ola pupe molorumu kinie yu lombili andolime yu molorumuna oringi. **2** Kanu kinie yuniene ungu mane sipelie nimbendo:

**3** “Yambo konopuna koropa pulimo pilimele yamboma Pulu Yemo enenga ye nomi kingimu molopa ene nokolemomonga ene malo.

**4** “Yambo kola teko konopu keri pepili molemele yamboma Pulu Yemone “Ene konopu peanga pepa toembo topili.” nimbemonga ene malo.

**5** “Yambo taka lelko molko yambo lupema pilku molemele yamboma ma koleama pali Pulu Yemone ene simbe lingimunge ene malo.

**6** “Pulu Yemone “Teai.” nilimo ulu sumbi nilime tengendo waka kolko molemele yamboma manda molongemonga ene malo.

**7** “Yambo lupema kondo kolemele yamboma Pulu Yemone kondo kolombamonga ene malo.

**8** “Yambo konopu kake tepili molemele yambomane Pulu Yemo kanongemonga ene malo.

9 “‘Yamboma konopu teluna pupili molangi.’ nilimele yamboma Pulu Yemone ‘Ene nanga ambolangoma.’ nimbemonga ene malo.

10 “Pulu Yemone “Teai.” nilimo ulu sumbi nilime teko molemelemonga yambo lupemane ene mindili silimele „akumunge” Pulu Yemo enenga ye nomi kingimu molombamonga ene malo.

11 “Na pilku molemele yamboma, ene nanga yamboma molemelemonga we yambomane ene ungu taka tonjiku mindili siku, ungu keri lupe lupema enenga bulkundu kolo toko ninjingí kinie ene malo.

12 „Yambomane ene aku siku mele telemelemonga, ene mulu koleana pungí kinie kanuna Pulu Yemone ene mele kalopa konjimbe kene konopu paa aili teko siku konopu peanga pepili molayo. Yambomane kinié ene mindili silimele mele aku siku ene na molangi koro ou Pulu Yemone ungu umbu tonjirimuma pilku yamboma ningu siliku andoringi yamboma we yambomane ene kepe mindili siringila kanumu.” „nirimu.”

13 “Ene ma koleana yambomanga api kusa mele molemele. „Akumu mele peanga,“ nakolo yu songo na temba kinie ‘Yu kelepa songo tepili.’ nimbu ulu te manda temoloye? Yu kongono temba tondolo te altopa na pembamonga we topo ele temolo kinie yamboma kimbu kongono teko andoko kambilingí kinie papu.

14 “Ene ma koleana yambomanga pa tenjilime molemele. Kolea aili ma pangine ola lembamo manda lopi na tenge. 15 Yambomane tepe llame kandokolie mingine suku na panjilimele. ‘Melema kanangi, ulke sukundu pa tepili.’ ningu polo tengen ola nosilimele. 16 Aku sipe mele ‘Olione ulu peangama telemolo mele yambomane kanokolie olionga Lapa, mulu koleana molemomo, kapi niengi.’ ningu enenga pa telemomone yamboma kanangi, pa tenjengi.” „nirimu.”

17 “Nane ‘Pulu Yemonga ungu manema „Mosisini,“ bokuna torumu unguma kinie Pulu Yemone ungu umbu tonjirimuma pilku yamboma ningu siringi yemane bokuna toringi unguma kinie ‘manie pupili.’ nimbé okomo.’ ningu na piliengi! Nane ‘Kanu unguma kamu manie pupili.’ nimbú naa okoro. ‘Aku ungumanga ungu pulu pelemoma kamu wendo opili.’ nimbú okoro. 18 Nane enendo paa sike nikiru: Mulu matolo ou pora na nipili Pulu Yemonga ungu manemanga ungu wallo kolte kepe paa we manie na pumbe. Ungu manemanga pali ungu aili kangamanga pali kongonoma ou wendo ombá. 19 Akumunge, yambo tene kanu ungu manemanga ungu mane kanga te kepe pulue topa, yambo lupema mane sipelie “Palue tangi.” nimbé yambomo Pulu Yemo ye nomi kingi molopa nokolemo koleana yunge imbi paa manie molomba. Nakolo yambo tene kanu ungu manema pilipe lipa tenge panjipe molopa, yambo lupema mane simbe yambomo Pulu Yemo ye nomi kingi molopa nokolemo koleana yunge imbi paa olandopa molomba. 20 Nane ene nimbu sikiru: Parisime kinie Pulu Yemonga ungu manemanga puluma mane silimele

yema kinie enene ulu sumbi nilime telemele ulumanga olandopa ene we yambomane na tengi liemo, Pulu Yemo ye nomi kingi molopa yambo nokolemo talapena sukundu ene paa na puku molonge. „Kanu yemane ungu manema pilkulie telemele mele lupe. Pulu Yemone kanopa ulu sumbi nilime nimbe kanolemo mele lupe..” ,nirimu.,

21 “Koro ou ,Mosisini, anda kolepalimendo ungu mane te sirimumu ene pilimele. Kanu ungu manemo i sipe:

“Ene yamboma toko na konjengi.

Yambo topa konjimbe yambomo mongo limbe,

,kote pilimele yambomane,

yu kote tenjikulie mongo liku singí.”

nirimu kanumu. 22 Nakolo kinié nane ene kanu ungu manemonga ungu pulumu i nimbu simbu tekero: Yambo tene yunge angenu kinie mumindili kolomba yambomo willisi kotena mengo puku kote tenjingí. Yambo tene yunge angenundu “Nu kamakoye?” nimbé yambomo poropinjili kotena mengo puku kote tenjingí. Yambo tene yambo tendo “Nu paa kongi mele aroma tolimu!” nimbé yambomo tepe koleana pumbe.

23 “Aku siku tenge yamboma mongo lingí kene nuni ‘Pulu Yemone na kanopa peanga kanopili.’ ningu yunge melema tepena kaloli polona Pulu Yemo kongi molo kera popo toko kalko sinindu mengo ongolie nu angenane nu kinie we mumindili te kolomba pilkulie ninimuni, 24 nu Pulu Yemo kalko sini melema Pulu Yemo popo toko kaloli polo alsekondo we lepili nosikulie kelko anju puku angenando “Teluna kapola kapola molambili.” ningu puku nipukulie, pe kelko ongo nu Pulu Yemo kaloni melema ongo yu kalko sieni.

25 “Nu kote tenjimbe temba yambomo ‘Kapola kapola molambili ulu te teambo.’ ningulie welea teani. Aku na tenu liemo nu kote tenjimbe yambomone nunge kote pilili yemo molombana memba pupe simbenje. Pe kote pilili yemone nu ka ulke nokoli yemo lipe simbe, yuni nu ka ulkena lipe mundumbe. 26 Nane nundu paa sike nimbu sikirumu: Nu ka ulkena wendo onindu pundu paa pali tokolie mindi wendo onimu. We manda wendo na oni.” ,nirimu.,

27 “Ou Mosisini, ungu mane te sirimumu ene pilimele. Kanu ungu manemo i sipe:

‘Ambo ye pulime ye lupema kinie  
wa ulu kerinele na teko,  
ye ambo lilime ambo lupema kinie  
wa ulu kerinele na teangi.’

nirimu kanumu. 28 Nakolo kinié nane ene ,kanu ungu manemonga ungu pulumu, i nimbu sikiru: Ye tene ambo te kanopalie ‘Yu pea tapu topo pelembelkanje papu.’ konopu lemo akumu konopu sukundu ambomo kinie kamu wa ulu kerinele telemo.

<sup>29</sup>Nunge mongotolone melte kanokolie konopuni ‘Liemboa.’ nengu pilku ulu pulu keri te tenu liemo mongotolo akuku ele teami. Nunge mongotolo angilipili nu tepe koleana liku mundungí kinie kapola na temba kene kangimunge melte wendo liku ele tekolie molko konjini kinie papu.

<sup>30</sup>Nunge kitolone ulu pulu keri te tenu liemo aku kitolo kari lelko ele teami. Nunge kitolo angilipili nu tepe koleana liku mundungí kinie kapola na temba kene kangimunge melte wendo liku ele tekolie molko konjini kinie papu.” „nirimu.”

<sup>31</sup>“Ou Mosisini ungu mane te sipelie nimbendo:

“Ye tene yunge ambomondo

‘Kamu pupili.’ nimbe makorombando

ambomo “Kamu pui.” nimbé mele

pepá te topa ambomo sipelie

yundu “Kamu pui.” nimbe aku tepili.”

nirimu kanumu. <sup>32</sup>Nakolo nane kinié ene nimbu sikiru: Ye puli ambo te ye te kinie wa ulu kerinele na tepili yunge yemone yu makoropa “Kamu pui.” nimu liemo ‘Wa ulu kerinele teli ambomo molopili.’ nimbe aku telemo. “Pui.” nimbe makorolemo ambomo pe ye tene yu limo kinie kanu yemo kepe wa ulu kerinele telemola.” „nirimu.”

<sup>33</sup>“Koro ou Mosisini, anda kolepalimendo ungu mane te pea sirimumu ene pilimele. Kanu ungu manemo i sipe:

‘ “Paa sike tembo.” nengu, nengu panjiku

mi lenge ungumu pulue na tangi.

Ailimundu “Paa sike tembo.” nengu, nengu panjiku

mi lenge mele paa sike aku siku teangi.’

nirimu kanumu. <sup>34</sup>Nakolo kinié nane ene nimbu sikiru: ‘ “Paa sike nikimu.” nengu piliengi!” nengu mele aili tengah imbi lelko paa mi na leangi. Mulu koleamo kepe imbi lelko mi na leangi. Aku koleamo Pulu Yemo molopa melema nokolemo koleamo kene aku na teangi. <sup>35</sup>Ma koleamo kepe imbi lelko mi na leangila. Akumu Pulu Yemo yunge kimbu mundulimo polomo kanumu. Jerusalleme kepe imbi naa la leangi.

Akumu Ye Nomi Kingi Paa Ailimunge kolea ailimu kanumu. <sup>36</sup>Nunge penge kepe. Akumu nuni penge indi te ‘Kake tepili.’ molo ‘Pombera topili.’ nengu ulu te manda na teni kene pengemo walsiku imbi lelko mi na leai. <sup>37</sup>Ulu te sike teni liemo sumbi siku “Tembo.” nieni. Naa teni liemo “Naa tembo.” nieni. Ulu kerimenga pali ulu pulumu pelemo kuru, muni ambolemo yambomane mindi ungu sulu teko niliku puku mi lemele.” „nirimu.”

<sup>38</sup>“Ou Mosisini ungu mane te sirimumu ene pilimele. Kanu ungu manemo i sipe:

“Yambo tene yambo tengah mongomo  
topa akumbe kinie

yunge mongomo toko akunjengila.

Yambo tene yambo tenga ungú topa langomba kinie  
yunge ungú toko langonjengila.”

nirimu kanumu. <sup>39</sup>Nakolo kinié nane ene nimbu sikiru: Ene tepa kenjimbe yambomo anju uluri na teko, ‘We tepa kenjipili.’ niengi. Yambo tene nunge kumbikere ekendonga laruve tomba kinie topele toko ‘ekendonga kamu laruve topili.’ nieni. <sup>40</sup>Yambo tene ‘Nunge wale pakolimu liembo.’ nimbe kote tenjimbe temba yambomo nunge wale sulu peangamo kepe ‘pea we lipili.’ nieni. <sup>41</sup>Romo ami, ye tene nu ambolopalie “Nuni na liku taponjiku mako tengā nanga melema menjeni, pambilī.” nimbé kinie mako tengā pea yu we liku taponjiku melema menjiku pani. <sup>42</sup>“Melte si.” nimbe mawa temba yambomo mawa temba melemo we sieni. “Kou te pundu anjiku si.” nimbé yambomo “Molo.” na nieni.” nirimu.

<sup>43</sup>“Ou Mosisini, ungu mane te sirimumu ene pilimele. Kanu ungu manemo i sipe:

“Opa lkerayemo konopu monjiku,  
opa toumu kanoko keri kanani.”

nirimu kanumu. <sup>44</sup>Nakolo kinié nane ene nimbu sikiru: Enene enega opa touma konopu monjiku, ene teko kenjilimele yamboma ‘Pulu Yemone tepa konjipili.’ ningū Pulu Yemo enega mawa tenjengi. <sup>45</sup>Enene ‘Lapa mulu koleana molemomonga ambolangoma molamili.’ ningū aku siku teangi. Yuni yambo keri peangama molemelena ‘Ena topili.’ nilimo. Yambo ulu sumbi nilime telemelē yamboma kepe yambo ulu sumbi nilime na telemelē yamboma kepe enega pea pali ‘Lo topili.’ nilimola.

<sup>46</sup>“Ene konopu monjilimele yamboma mindi konopu monjilimele kinie Pulu Yemone kanopa peanga kanombaye? Romo gapomano, kou takisi limele yambo kerime, kepe anju yando akula telemelē kene ene kanoko keri kanolemele yamboma pea konopu monjingí kinie peanga.” <sup>47</sup>Enene enega pulu lemo yambomando mindi “Ene manda molemeleye?” nilimele kinie we yambomane telemelē mele maniendopa, enene telemelē mele olandopaye? Ulsukundu yambomane aku sikula na telemelē?

<sup>48</sup>Akumunge Mosisini sirimu ungu manema we pilku na teko, enega Lapa mulu koleana molemo ye paa sumbi nilimu molemo mele ene aku siku yambo sumbi nilime molangi.” nirimu.

**6** <sup>1</sup>Yesusini ungu mare nimbe molopalie ungu mare pea nimbendo:

“Yambomane ‘Olio yambo paa peangama. Uluma paa tepo konjilimolo.’ ningū kanangi.’ ningū yamboma kanoko molangi enega ulu peangama paa na teangi. Aku siku tengē kinie yambomane ene kapi ningí. Kanu kapi ningí unguma enega mele kalolimu lingímunge enega mulu koleana molemo Lapamone ene mele na kalomba.

<sup>2</sup>“Enenga mulu koleana molemo Lapamone ene siku tengē yamboma mele na kalomba, kene enene yambo koropa pulime kondo kolko ‘Lipu

taponjemili.’ ningu kou mone te singíndu ‘Temolo mele yambomane kanangi.’ ningu, ru ningu melte naa siengi. Topele mapele toli yemane ‘Na yambomane kapi niengi.’ ningu yamboma maku toko Pulu Yemonga ungumu pilili ulkemanga kinie aulkemanga kinie we yambo aisilini mongone kanangi yambo koropama liku taponjilimele. Aku yemane telemele mele enene aku siku na teangi. Nane enendo paa sike nimbu sikiru: Aku telemelemonga ene yambomane kapi nilimele unguma enenga mele kalolimu koronga limele.

<sup>3</sup>“Nakolo enene yambo koropama kondo kolko melte singíndu ‘Yambomane paa naa kanangi. Yambo te pea tapu topo andolembolomone kepe naa kanopili, lopi tepo kiyongo nimbu lipu taponjembo.’ niengi. <sup>4</sup>Kanu kinie yambomane naa kanangi, tengen mele yambo te naa ningu sikulie koropa puli yambo te liku taponjingí kinie enenga „mulu koleana molemo“ Lapamone lopi teko telemele uluma kanolemomone ene mele kalomba.” „nirimu.“

<sup>5</sup>“Ene Pulu Yemo kinie ungu ningindu topele mapele toli yemane Pulu Yemo kinie ungu nilimele mele aku siku naa teayo. Kanu topele mapele toli yemane ‘Na ye paa peangamo molio mele yambo aisilini mongone kanoko na kapi niengi.’ ningu yamboma maku toko Pulu Yemonga ungu pilili ulkemanga kinie aulkemanga kinie yamboma kanoko molangi konopu siku angilku Pulu Yemo kinie ungu nilimele. Nane enendo paa sike nimbu sikiru: Aku siku telemelemonga ene enenga mele kalolimu koronga limele kanumu. <sup>6</sup>Nakolo ene Pulu Yemo kinie ungu ningindu enenga suluminiana sukundu puku nambune sikulie kanu lopi teli koleana enenga „mulu koleana molemo“ Lapa naa kanolemele yemo kinie ungu nieyo. „Yu akuna molemo.“ Aku tengen kinie enenga „mulu koleana molemo“ Lapa lopi teko telemele uluma kanolemomone ene pe mele kalomba.

<sup>7</sup>“Na Pulu Yemo kinie ungu niembo.’ ningulie Isirele talapemonga ulsu molemele yambomane enenga kuruma molo pulu ye kolo tolime kinie ungu ningindu we ungu aisili nilimele mele aku siku naa teangi. Kanu yambomane ‘Na ungu aisili nimbu kinie pilimbe.’ ningu aku siku nilimele kanumu. <sup>8</sup>Enenga „mulu koleana molemo“ Lapamo ou mawa naa teangi ene molo tolema melema yuni pilipe kanolemo kene aku yambomane telemele mele aku siku naa teangi.

<sup>9</sup>“Ene Pulu Yemo kinie ungu ningindu i siku niengi:

“Olionga mulu koleana moleno Lapamo,  
yambomane ‘Nu imbi ola molopa  
ye kake teli peangamo moleno.’  
ningu molangi.

<sup>10</sup>Nu ye nomi kingimu molko  
yamboma nokoni walemo wendo opili.

Nunge ungumu mulu koleana pilku liku telemele mele  
aku siku ya ma koleana pilku liku teangi.

<sup>11</sup>Olio kinié langi nomolo mele kinié siyo.

<sup>12</sup>Yambomane olio teko kenjíngi kinie  
siye kolopo ulu te na temulu mele  
aku sikula olione nu tepo kenjímulu uluma  
siye kolko olio ulu te na teyo.

<sup>13</sup>Olio ‘Ulu tene kondi topili.’ naa ningu  
ulu kerimenga pali ulu pulumu pelemo kuru muni  
‘olio na ambolopili.’ ningu yunge kíne wendo liyo.  
(Nu koleama kinie melemanga pali ye nomi kingimu molko, tondolo  
olandopamo nu kinie pepa, nu imbi paa olandopa molopa nu kinie  
pa tondolo tepa tepili alieli molko mindi pulino kene  
aku sipe tepili.)”

ningu aku siku Pulu Yemo kinie niengi.

<sup>14</sup>“Yambomane ene teko kenjingí uluma ‘We manie pupili.’ ningu siye  
kolongi liemo enenga mulu koleana molemo Lapamone enenga ulu pulu  
kerime ‘Manie pupili.’ nimbe siye kolombala. <sup>15</sup>Nakolo yambomane ene  
teko kenjingí uluma ‘We manie naa pupili.’ ningu siye naa kolongi liemo  
enenga mulu koleana molemo, Lapamone enenga ulu pulu kerime ‘Manie  
naa pupili.’ nimbe siye naa kolombala.” nirimu.

<sup>16</sup>“Ene langi naa nongo mi toko we molonge ulu pulumu tengendo  
topele mapele toli yemane ‘Na nono nimbu molambo.’ nilimele mele  
aku siku naa niengi. Kanu yemane ‘Na langi naa nombondo mi topo  
molio mele yambomane kanangi.’ ningu ene kumbikere teko enenga  
kumbikerema teko kenjiku molemele. Nane enendo paa sike nimbu  
sikiru: Kanu yemane aku telemelemonga yambomane ene kapi nilimele  
unguma enenga mele kalolimu koronga limele.

<sup>17-18</sup>“Nakolo ene langi na nongo mi toko we molongendo ‘We  
yambomane na aku tekero mele naa kanangi. Tarane manjipe  
kanopili.’ ningu we yambomane kanonge uluma naa teangi. Aku teng  
kinie enenga mulu koleana molemo, Lapa lopi teko telemele uluma  
kanolemomone ene mele kalomba.” nirimu.

<sup>19</sup>“Ya ma koleana mele nosilimelema urelo tepa koka molo lkurinia  
melemane ongo teko kenjiku, wa lili yema ongo melema wa limele kene  
‘ya mana kamako molopo mele aisili lipu nosemili.’ ni naa niengi. <sup>20</sup>Aku  
naa tekolie mulu koleana melema urelo naa tepa koka molo lkurinia  
meltene ombo tepa na kenjipe, wa lili yema ongo wa na limele kene ene  
mulu koleana pe pungímunge ‘mele aisili pe limulúma ou lepili.’ ningu  
ya ma koleana ulu peangama teko molangi. <sup>21</sup>Enenga nosilimele melema  
lemo kolea akuna ene konopuni pilku konopu monjiku molemele kene  
‘mulu koleana mindi melema lepili.’ ningu molangi.” nirimu.

22 “Nunge mongomo nunge kangimunge tepe llame mélemo. Aku kene nunge mongo peanga angilimo kinie nu kangi pali pa tepili moleni kinie nu molko konjilino. 23 Nakolo nunge mongomo keri lemba kinie nunge kangi pali sumbulu topili andoni. Kanu kinie nunge kagine pa teli pembamo alowa tepa sumbulu tomba kinie akumu paa kamu sumbulu tomba.” *[nirimu.]*

24 “Yambo tene ye aili talonga kongono lipe tere lepa manda naa tenjimbe. Ye aili te konopu keri panjipe, te konopu monjimbe. Molo aku naa temu liemo ye aili tengu ungu nimbéma paa konopu sipe pilipe lipe kongono nimbéma tondolo mundupe tenjipe, te konopu keri panjipe yunge ungu nimbéma ta nimbé. Yambomane Pulu Yemonga kongonomo kinie Kou Monemonga kongonomo kinie liku tere lelko manda na tenjingí.

25 “Akumunge nane ene *[tenge mele]* nimbu siembo. ‘Kangikundu molopo konjemili.’ ningu konopu aisili liku na mundengi. Langi nongemonga kepe no nongemonga kepe mulu wambale pakongemonga kepe akumanga konopu aisili liku munduku naa molangi. Ene kapola molonge mele ulu pulumu langi kinie mulu wambale kinie mindiyé? 26 Kerama kaname. Langi te panjikulie nou lemo kinie liku mengo ulkendo puku nosiku naa nolemele nakolo ene yambomanga mulu koleana molemo Lapamone kerama langi silimo. Kerama we mele ene yamboma olandopamonga yuni ene naa nokombaye? 27 Enenga yambo tene konopu aisili lipe mundumbemone yu kolomba ena te manda ‘We lepili.’ nimbeye? Manda naa nimbé.

28 “Ene pakonge melemanga konopu aisili nambemuna liku mundulimeleye? Pillawa sindime mana olemo mele ene naa kanolemeleye? Pillawa sindimene kongono mindili siku na tekó, mulu wambale te tekó mimi naa telemele 29 nakolo pillawa sindime molemele mele olandopa, *[ye nomi kingi]* Sollomon Kongono aisili tepalie wale paa peangama pakopa au *nirimu* mele maniendopa. 30 Era sindi tolemoma kinié mele molemo, opali mele poroko tepena kalemelema Pulu Yemone aku sipe nokopa konjilimo liemo ene ‘Pulu Yemone olio manda nokombanje.’ ningu laye kolte mindi pilimele yamboma pakonge melemanga yuni manda lipe naa taponjimbeye? Ene paa sike lipe taponjimbe.

31 “*[Pulu Yemone kerama kinie era sindime kinie aku we melemaaku sipe nokolemo]* kene ene konopu aisili liku mundukulie ‘Esi, langi te tena lipu nomolonje?’; molo ‘No tena kolopo nomolonje?’; molo ‘Wale pakoli tena lipu pakolonje?’ ningu pilku naa molangi. 32 Pulu Yemonga yamboma naa molko ulsukundu molemele yambomane aku siku telemele nakolo enenga mulu koleana molemo Lapamone ene yunge yambomanga mele molo tolemoma kanopa molemo. 33 *[Ene langi nongemanga kinie]*

mulu wambale pakongemanga kinie konopu naa liku munduku,<sup>1</sup> Pulu Yemo ye nomi kingi molopa yamboma nokolemo uluma kinie yu kanopa kake telemo kanolemo uluma kinie melema kinie ‘Kumbi lepo teambo.’ konopu lelko molangi. Aku tengé kinie yuni we melema kepe ene simbe.<sup>34</sup> Yuni aku temba kene ‘Opali nambe tembonje?’ ningú kinié konopu aisili liku na mundengi. Opalimunge langi molo melema aku opali, kiniémonga langi molo melema kinie, opalimunge kinie, liku tere lelko naa piliengi! Enamanga yu mele mele umbunime pelemo pembama kanu enamanga mindi. Kinié umbuni wendo ombáma kinie, opali talu umbuni wendo ombámanga kinie tere lelko konopu liku naa mundengi.”<sup>1</sup> nirimu.

**7** <sup>1-2</sup> Yesusini ungu mare nimbe molopalie ungu mare pea nimbendo:<sup>1</sup> “Enene anju yamboma telemele uluma, apurungí kinie aku sipe Pulu Yemone, ene telemele mele yando apurumbela. Enene anju yambomane telemele mele apuruku kanokolie “Teko kenjikimili. Tekemele mele Pulu Yemone kanopa keri kanopili.” ningí mele Pulu Yemone, aku sipe ene apurumbe. Aku temba kene ‘Pulu Yemone, olio ulu telemoloma naa apurupili.’ ningú enene yamboma telemele uluma naa apurengila.

<sup>3</sup> “Nuni angenanga mongona nurupulu te lemo kanoleno nakolo nunge mongona unju aili te lemomo naa kanoleno akumu nambemuna telenoye? <sup>4</sup> Nunge mongona unju aili lemomo naa kanokolie angenando “Ano, nunge mongona nurupulu te lemomo wendo linjembo.” nambe teko nilinoye? <sup>5</sup> Topele mapele toli yambomo, nuni nunge mongona lemo unju ailimu ou wendo likulie pe kanoko konjiku angenanga mongona lemo nurupulumu manda wendo linjini.”<sup>1</sup> nirimu.

<sup>6</sup> ‘Pulu Yemonga’ nilimele melema liku owa naa sieme. Nombalie pe topele topa ene nombanje kene aku naa teangi. Enenga mele peangama kongi angilimbena toko naa mundengi. Kimbuni kambilimbenje kene aku naa teangi.”<sup>1</sup> nirimu.

<sup>7</sup> “Lapa, mulu koleana molemo yemo<sup>1</sup> melema mawa teko “Si.” niengi. Aku tengé kinie melema sike simbe lingí. Lapa molemona, melema korangi. Aku tengé kinie melema sike kanoko lingí. Ulke kerepuluna angilku “Sukundu wamili.” niengi. Aku ningí kinie “Sukundu wai.” nimbe nambune tonjimbe. <sup>8</sup> Mawa tengé melema sike simbe lingí, koronge melema sike kanoko lingí, “Sukundu wamili.” ningí kinie sike nambune tonjimbe. Aku temba kene aku teai.

<sup>9</sup> “Enenga ye te yunge malo ombalie “Tara, pillawa kaloli te nambo si.” nimbé kinie yunge lapane yu kou mulú te simbeye? <sup>10</sup> Molo kangomone “Tara, oma te nambo si.” nimbé kinie yunge lapane wambyie te simbeye? <sup>11</sup> Pe ene konopu keri pepili molemele yambomane aku siku enenga ambolangoma mele peangama silimele liemo enenga Lapa mulu koleana molemomone “Melema si.” ningú mawa tengé yamboma mele

peangama paa olandopa na simbeye? „Paa simbemo.“<sup>12</sup> Akumunge, ‘Yambomane nu kinie teangi.’ konopu leno mele nuni anju yamboma aku siku teami. ‘Aku teangi.’ nikinu ulumuni Mosisini Pulu Yemonga ungu mane sirimu bokuna torumumanga pulumu kinie, Pulu Yemone ungu umbu tonjirimuma pilku yamboma ningu siringi yemane bokuna toringi ungumanga pulumu kinie, lipe tere lepa nilimo kene aku siku anju yando yamboma kinie teko konjengi.” „nirimu.“

<sup>13</sup> “Ene pala kerepulu kangamonga paa pang. Kolea kerine pulimo kerepulumu paa ailimu, akuna pulimo aulkemo paa anju yando pupe paa pará lemo akuna yambo aisili mindili naa siku we we teko pulimele. <sup>14</sup> Nakolo alieli kondé molopa konjipe mindi puli koleana pulimo kerepulumu paa kanga, yunge aulkemo paa tengepea teli kangamo lemona yamboma akuna pungindu mindili silimelemonga yambo telu telu ningu mindi aku aulkemo kanokolie pulimele. Aku telemele kene ene kanu kerepulu kangamonga pang.” „nirimu.“

<sup>15</sup> “Pulu Yemone ungu umbu tonjilime na pilku we kolo toko yando ningu singí yema onge kene kanoko konjiku molayo. Kongi sipisipi paa taka lelko molemele mele aku siku kanu yamboma ongo molonge nakolo owa takara paa engelene kolkolie ‘Melte topo namili.’ ningu andoko molemele mele aku siku kanu yambomane ‘Ene mindili nangi. Ene tepo kenjemili.’ ningu molemele. <sup>16</sup> Kanu kolo toli yamboma ongo ulu tengema kanokolie, ‘Ene sike kolo tolime.’ ningu kanonge. ‘Amu namili.’ ningu takeme manda olko toko nolemelkaye? Molo ‘Me te namili.’ ningu silipu manda akuku nolemelkaye? Paa molo. ‘Amu lupe takeme lupela, me lupe silipu lupela.’ ningu kanolemele. „Aku siku mele Pulu Yemone sike ungu umbu tonjilime pilku yamboma sike ningu silimele mele lupe, Pulu Yemone ungu umbu na tonjilime yamboma kolo toko ningu silimele mele lupela ningu kanonge.“ Unjuma mongo tolemo kinie kanokolie ‘Ime nomolo lemo. Ime naa nomolo lemo.’ ningu kanoko imbi silimele kanumu. <sup>17</sup> Unju peangamone mongo peangamo tolemo; unju kerimuni mongo kerimu tolemo. <sup>18</sup> Unju peangamone mongo keri te manda naa tomba; unju kerimuni mongo peanga te manda naa tombala. <sup>19</sup> Unju mongo peangama naa tomba unjuma pali peko tokolie tepena kalemele. <sup>20</sup> Unjuma mongo tolemo kinie kanokolie, “Imu peanga, imu keri.” ningu apurulimele mele, onge yambo kanumane tenge uluma enene kanokolie yamboma molemele mele sike aku siku kanonge.

<sup>21</sup> “‘Yambomane nando ‘Ailimu.’ nilimele yamboma pali Pulu Yemone nokolemo mulu koleana suku pungí.’ ningu na pilieyo. Tara mulu koleana molemomonga unguma pilku liku tenge yamboma mindi akuna pungí. <sup>22</sup> Yamboma apurumbe wale kanumu wendo ombá kinie yambo aisilini nando ningindu: “Ailimu, nane nunge imbi lepo nunge unguma nimbu sirindu kanumu; nunge imbi lepo yambomanga konopuna kuru

moloringime “Ongo ulsu pai.” nirindu kanumu; nunge imbi lepo ulu tondolo aisili terindu kanumu.” ningí.<sup>23</sup> Nakolo aku siku ningí kinie nane enendo nimbundu: “Na enenga imbime paa na pilipu ene kanopo imbi naa silio. Ene Pulu Yemonga ungumu na pilku liku teringi kene nanga kumbikerena naa ongo anju pai.” nimbú.

<sup>24</sup>“Akumunge, i nanga unguma pilku liku tenge yamboma ene ye te molemo mele niembo: Ye pilipe konginjili perimu ye te yuni yunge ulkemo ‘Ingi nimbe angilipili.’ nimbe kou polona ola takorumu.<sup>25</sup> Pe lo topa no topa poporome topalie ulkemo paa topa kalalu simbe terimu nakolo ulke simumu kou polona angilirimuna topa tekisi naa tekisipe ingi nimbe we angilirimu. Nanga unguma pilku liku telemele yamboma ene kanu yemo mele molemele.

<sup>26</sup>“I nanga unguma pilku liku na tenge yamboma ene ye te molemo mele niembo: Ye pilipe konginjili naa perimu ye tene yunge ulkemo okiana ola takorumu.<sup>27</sup> Pe lo topa no topa poporome topalie ulke kanumu topa kalalu sipe paa bulu balu sirimu. Nanga unguma na pilku liku tenge yamboma ene kanu yemo mele molemele.” nirimu.

<sup>28</sup>Jesusiniakuungumanimbepora sirimu kinie yuni manesirimu pilku moloringiyambomane yuni ungu mane sirimu mele pilkulie miniwale munduringi.<sup>29</sup>PuluYemongaugu manemangapulumapilkuene manesiringiyemane wemanesiringimeleYesusinikusipe manenaa sirimu. Namba lerimu yemane pipili naa kolko tondolo munduku manesiringimeleaku sipe manesirimunapilkulie eneminiwalemunduringi.

**8** <sup>1</sup>Yesusi ma panginemaniendoombá orumu kinie yamboaisili likumakutokoyulombilioringi.

<sup>2</sup>Kanukinieyete kuru kendi nomba perimumu Yesusi orumuna ombayunge kumbikerenakoporongolangopalie yundunimbendo: “Ailimu, nungekonopumuni na‘kondepambo.’konopulenu liemo nuni na manda teko konde lini.” nirimukinie<sup>3</sup>Yesusiniyemokini ambolopalie yundunimbendo: “Nu kondepani.” konopulekero kene konde pui.” nirimukinietamburembukurukendimunomba kelerimu.<sup>4</sup>KanukinieYesusiniyundualtopanimbendo: “Nuniyalulutekeromoyambo telurindukepe paa naaniyo. SumbisikupukuPuluYemopopotonjili yemokangimu liku ora siku, ‘Na altopo kangi peanga lepili molkoro kene.’ ningu Mosisini “Tei.” nimbe panjirimumele pilku likutenindu “Pulu Yemopopotokalkosi.” nirimumélemoliкуPuluYemopopotonjili yemondo “Kalonji.” ningu yusieni. Pe yambomane nu kanokolie ‘Yu sike kangi peanga lepili molemo.’ ningu piliengikene nikirumeleisili ou tepui.” nirimu. “Aku siku tenikinie yambomane nu kanoko keri naakanonge, nutlunkotoweyambomamolemelena manda telunapuku moloni.” nirimu.

<sup>5</sup>Yesusi Kapaniame taonona sukundupurumu kinie Romoyambomangamiye waneanderetekoromuyeteyoruomunaomba

yundu mawa tepalie nimbendo: <sup>6</sup>“Ailimu, nanga kendemande yemo kimbu ki kolopa pora sipe mindili nomba perepa ulkena lepili okoro.” nirimu.

<sup>7</sup>Yesusini yundu “Ombo tepo konde limbu.” nirimu.

<sup>8-9</sup>„Aku nirimu kinie pilipelie“ ami ye wane anderete nokorumu yemone yundu pundu topa nimbendo: “Ailimu, na ye kerimu mele molio, nu nanga ulkena oni kinie kapola naa temba. Na ye tene kepe nokopa molemo, yunge ungu mu pilipu lipu telio. Nane kepe ami ye mare nokopo molio. Kanu yemanga tendo “Pui.” nilio kinie yu pulimo. Molo tendo “Oi.” nilio kinie yu olemo. Molo nanga kongono tenjili kendemande yambo tendo “I siku tei.” nilio kinie yu aku sipe telemo kanumu. Aku sipela, nuni ungu te we nini kinie nanga kendemande yemo konde pumbe kene nuni we ni.” nirimu.

<sup>10</sup>Yesusini yu nirimu mele pilipelie yu konopu aisili lipe mundupelie yu lombili oringi yambomando nimbendo: “Nane enendo paa sike nimbu sikirumu: I Isirele yambomanga talapena ulsu mololi yemone na ungu munni mindi manda tembo mele nimbe tondolo mundupe pilimo mele koleamanga pali, Isirele koleana sukundu kepe, yambo telurini kepe aku siku ningu piliringi mele paa na kanoruntu. <sup>11</sup>Nane enendo paa sike nimbu sikirumu: Ena mundi olemo koleamanga kinie ena pulimo koleamanga kinie yambo aisili wendo ongo Pulu Yemo ye nomi kingimu molopa nokolemo mulu koleana sukundu Eporayamo kinie Aisake kinie Jekopo kinie pea ongo langi nongo molonge. <sup>12</sup>Nakolo Pulu Yemone ‘yunge yamboma’ nimbe mako torumu „Isirele“ yamboma yu nokopa molemo koleana puku molemelka yamboma yuni topa makoropa sumbulu tolina mundumbe. Kanuna paa mindili nongolie kola teko pereko molonge.” nirimu.

<sup>13</sup>Aku nimbeline yuni ami ye wane anderete nokorumu yemondo nimbendo: “Nane nu ‘manda tenjimbe’ konopu lenu mele tenjindu kene pui.” nirimu. Kanu kinie yuni aku sipe nirimu enamonga kendemande yemo yu kuru topa kelepa konde pupe molorumu.

<sup>14</sup>Kanu kinie Yesusi Pitanga ulkena sukundu ombalie Pitanga kolepa ambomo kuru topa kangi norumuna aniembo lerimu kanopalie, <sup>15</sup>yunge kimu ambolorumu kinie kangi nomba kelerimu kinie ambomo ola angilipe wendo ombalie Yesusi langi sipe yu nokorumu.

<sup>16</sup>Pe kolea ipu lemba terimu kinie konopuna kuru molorumu yambo aisili Yesusi molorumuna mengo oringi kinie yuni kurumando “Ongo wendo pai.” nirimu kinie ongo wendo puringi. Kuru torumu yamboma pali tepa konde lirimula. <sup>17</sup>Aku sipe terimumunge koronga ou Pulu Yemone ungu umbu tonjirimuma pilipe yamboma nimbe sirimu ye Aisayane ulu te pe wendo ombá ou nirimu mele kamu wendo orumu. Aisayane nimbendo:

“Yuni yuyu olio kuru torumuma makoropa,  
olio aniembo lerimulu kuruma  
lipe ulsu mundurumu.”

nirimu.

<sup>18</sup> Walse, Yesusi *nomu Gallilli kélona molopili*, yambo aisili liku maku toko yu liku makaye teko moloringi kanopalie nirimumuni, *lombili andolimendo*, “Nomuna nekendo pamili wai.” nirimu.

<sup>19</sup> Nakolo ou naa pupe we angilipili, Pulu Yemonga ungu manemanga puluma pilipe mane sirimu ye te yu angilirimuna ombo yundu nimbendo: “Ungu Mane Silimu, nu puni koleamanga pali nu lombili ombó.” nirimu.

<sup>20</sup> Aku nirimu kinie, Yesusini yundu nimbendo: “Pílie! Owa takarama ulke pelemelemanga pelemele; kerama enenga mi takolemelemanga pelemele, nakolo Manie Ombo Mana Ye Au Lerimu Yemonga pelemo kolea te naa lemo *kene*, nu ‘Yu lombili pupulie kapola naa molombo.’ ningu pilkulie na lombili wani. We naa wani.” nirimu.

<sup>21</sup> Kanu kinie yu lombili andorumu ye tene yundu nimbendo: “Ailimu, nu kamu lombili wambo mangali ou pupu nanga lapamo *kinie pea molambo*. Pe yu kolomba kinie, ono tepolie nu lombili ombó.” nirimu.

<sup>22</sup> Nakolo Yesusini yundu nimbendo: “*Nanga ungumu naa pilku*, yambo kololi *none teli*, yambomane yambo kolongema ono teangi. Nakolo nu na lombili oi.” nirimu.

<sup>23</sup> Aku nimbelie *nomu Gallilli nekendo pumbendo*, nona andoli sipi tenga sukundu purumu kinie yu lombili andolime yu lombili sukundu puringila. <sup>24</sup> Kanu kinie *nomuna pungí puringi kinie*, poporome aili te nomuna torumu. Aku terimuna nomumu apisipe ola ombalie sipimu lipe aki tomba terimu nakolo Yesusi we uru perimu. <sup>25</sup> Kanu kinie enene yu uru perimuna puku toko makinjikulie ningindu: “Ailimu, olio liku taponjiyo. Olio no wangokomolo.” niringi.

<sup>26</sup> Yu *makilipelie*, enendo nimbendo: “‘Pulu Yemone olio nokomba.’ ningu konopu tondolo naa pekemo yema, ene nambemuna mini wale mundukumiliye?” nirimu. Aku nimbelie ola molopa poporamemo kinie nomumu kinie iri torumu. Kanu kinie poporamemo topa kelepa nomumu lope naa tepa paa we lerimu. <sup>27</sup> Yuni terimu mele kanokolie, yemane mini wale mundukulie ningindu: “Apa! I yemo nambolka yerenje? Poporamemone kepe nomumuni kepe yunge ungumu pilku liku kelkembele.” niringi.

<sup>28</sup> Kanu kinie yu *lombili andolime kinie pea*, nomu nekendo pupe kolea Gadara puringi kinie kanu kolea Gadara ye talo, konopuna kuru molorumu yetolo, yambo ono koleana wendo ongolo yu molorumuna oringili. Elte paa enge ningulu yamboma tonguele teringilimunge we yamboma elte peringili koleana ‘Eltene ene tonguele.’ ningu aulkena ongo naa puringi. <sup>29</sup> Yesusi kanokololie tondolo munduku walsikululie

ningilindu: "Pulu Yemonga Malo, olio kinie ulu nambolka uluri tenindu onuye? Olio mongo lipe simbe walemo ou wendo naa opili nuni isili ou olio mindili liku sini okonoye?" niringili.

<sup>30</sup> Akuna anjupe kolea tenga umbu kongi aisili ímu nongo moloringi „kanokolie,” <sup>31</sup> kurumane Yesusi mawa tekolie ningindu: “Olio toko makorokolie ‘ne kongimenga konopuna molopangi.’ ni.” niringi kinie

<sup>32</sup> Yuni enendo nimbendo: “Kapola, akuna pang.” nirimu kanu kinie „kuruma” kanu yetolonga konopuna wendo ongolie kongi akuna moloringimenga konopuna puku moloringi kinie kanu kongime pali kekelepa toko lkisiku puku kopona pukue toko nomuna suku puku no wangoringi.

<sup>33</sup> Ulu akuma wendo orumu kinie kanokolie, kongi tapu teko moloringi yema talopa lelko pukulie niringimuni, taonona puku akuna moloringi yamboma enenga kongime terimu mele kepe kuruma konopuna moloringi yetolo terimu mele kepe temane toko siringi. <sup>34</sup> Niringi mele pilkulie taonona moloringi yamboma pali Yesusi molorumuna ongo kanokolie yu mawa tekolie ningindu: “Olionga koleana naa mololi kelko pui.” niringi.

**9** <sup>1</sup> Kanu kinie Yesusi altopa nona andoli sipi tengā sukundu pupelie nirimununi, nomu „Gallilli,” yakondo omba yunge kolea „Kapeniame taono” orumu.

<sup>2</sup> Yu „Kapeniame kelepa” omba molorumuna ye marene kimbu ki kolopa pora sirimu ye te taropola teko mengo oringi. Enene ‘Yesusini i yemo manda tepe konde limbe.’ ningū pilkulie yu mengo oringi, Yesusini kanopa pilipelie kimbu ki kolopa pora sirimu yemondo nimbendo: “Nanga kangomo, nunge konopu wayongo nipili. Nunge konopuna ulu pulu keri terinu pelemoma manie pupili, siye kolkoro.” nirimu.

<sup>3</sup> Aku nirimu kinie pilkulie Pulu Yemonga ungu manemanga puluma pilku mane siringi ye marene eneno konopuni pilkulie, ‘I yemone Pulu Yemo marake tekemo.’ ningū piliringi.

<sup>4</sup> Ene konopu leringi mele Yesusini pilipelie nimbendo: “Ene nambemuna konopu lelko kenjikimiliye? <sup>5</sup> I yemondo “Nunge ulu pulu kerime manie pupili, siye kolkoro.” nimbú kinie ene ulu te naa kanokolie ‘We we tepe nikimu.’ konopu lengeye? Molo “Ola angilku nunge kunungumu liku mengo kimbu kongono teko andoi.” nimbú kinie yu ola angilimbene naa angilimbenje mona lemba manda kanokolie ‘Aku sipe mindili sipe nikimunjé?’ konopu lengeye? <sup>6</sup> Nakolo ‘‘Manie Omba Mana Ye Au Lerimu Yemo tondolo pelemomone ya ma koleana yambomanga ulu pulu kerime “Manie pupili, siye kolkoro.” manda nimbé.’ ningū piliengi!” nimbu aku sipu nindu.” nirimu.

Aku nimbeline kimbu ki kolopa pora sili yemondo nimbendo: “Nu ola angilku nunge kunungumu liku mengo ulkendo pui.” nirimu. <sup>7</sup> Aku

nirimu kinie yemo ola angilipe ulkendo purumu.<sup>8</sup> Yambo aisili akuna maku toko moloringimene yu aku terimu kanoko mini wale mundukulie, mana yamboma ulu tondolo aku mele tengen tondolomo sirimu Pulu Yemonga imbi ambolko ola linjiku kapi niringi.

<sup>9</sup>Kanu kinie Yesusi pumbe pupelie nirimumuni, kou takisi lipe molorumu ye te, yunge imbi Mateyu, kanopalie yundu “Na kinie pea pambili lombili oi.” nirimu. Kanu kinie Mateyu yu ola angilipe yu lombili purumu.

<sup>10</sup>Pe Yesusi Mateyunge ulkena langi nomba molorumu kinie kou takisi lili yema kinie, „Juda ye ailimene,“ „ulu pulu kerime teli ye“ „niringi,“ wema kinie aisili ongo Yesusi kinie yu lombili andoli yema kinie ene pea manie molko langi norangi.<sup>11</sup> Ene aku siku teluna langi nongo moloringine, Parisi yemane kanokolie yu lombili andolimendo walsiku pilkulie ningindu: “Enenga ungu mane sili yemo kou takisi lili yema kinie ulu pulu kerime teli ye wema kinie ene kinie yu nambemuna langi pea nokomeleye?” niringi.

<sup>12</sup>Aku siku niringi mele pilipelie Yesusini enendo nimbendo: “Kuru naa tolemo yamboma doketana naa pulimele. Kuru tolemo yamboma mindi doketana pulimele kanumu.<sup>13</sup> Nane “Yambo sumbi nilime na molombona wangi.” nimbundu ma koleana naa oruntu. ‘Ulu pulu keri teli yamboma na molombona wangi.’ nimbundu oruntu. Ulu pulu keri teli yamboma lipu taponjimbundu oruntu kene ene puku Pulu Yemonga bokuna molemo ungu tenga pulumu puku pilipayo. Pulu Yemone nimbendo:

“‘Na melema popo toko kalko siengi.’

nimbu pilipu naa molio.

‘Ene yambo lupema konopu monjiku  
kondo kolangi.’

nimbu pilipu mindi molio.”

nirimu kanumu.” nimbe Yesusini nirimu.

<sup>14</sup>Pe „No Linjili, Jono lombili andoringi yema Yesusi molorumuna ongolie yundu walsiku pilkulie ningindu: “Olio kinie Parisi yema kinie olio aliei langi mi topo naa nolemolo nakolo nu lombili andolime aku siku naa telemele akumu nambemuna na telemeleye?” niringi.

<sup>15</sup>Aku siku niringi kinie pilipelie Yesusini pundu topa enendo „ungu iku te topa yu kinie ulu te wendo ombá mele nimbeline, nimbendo: “Ambo limbe ye te yunge pulu lemo yema kinie molemo kinie ene konopu sikulie “Kola tepo langi naa namili.” manda ningíye? Manda na ningí. Pe mindi, ambo limbe yemo ene molongena ongo wendo liku „tonge“ kinie kanu walemanga sike „konopu keri panjiku“ langi naa nongendo mi tonge. „Isili ou molo.“

<sup>16</sup>“Mulu wambale ou te sungu nilimo kinie olione mulu wambale paa konde tengen te kopisipu lipu, sungu nilimomonga naa topo tambululimolo

kanumu. Yambo tene aku sipe topa tambulkenje kanu mulu wambalemo nona panjilke kinie mulu wambale konde kopisilimu kanga lepa lli nimbelie mulu wambale oumu kelepa kamu aili tepa sungu nilke.

<sup>17</sup>“Kongi meme kalumuni teli mungo ou tengen no waene konde naa la kolemolo kanumu. Yambo tene mungo ou tengen no waene konde te kolkanje kanu no waenemo mingine sukundu pepalie pe akolka kinie kanu mungo oumu naa akopa sungu nilke. Kanu kinie nomo kepe mingimmo kepe kamu keri lelka. Akumunge no waene konde kongi meme kalumuni teli mungo kondena mindi kolemolo kanumu. „Pe nomo akolemo kinie kalumuni teli mungo kondemo anju yando pupe sungu naa nilimomonga, nomo kinie mungo kondemo pea kapola lemo.” nirimu.

<sup>18</sup> Yesusini Jononga lombili andoli yemando ungu nimbe molopili „Juda yamboma maku toko Pulu Yemonga ungumu piliringi ulke te, nokorumu ye te Yesusi molorumuna omba yunge kumbikerena korporongo langopa yundu nimbendo: “Nanga ambolamo kinié isili kolopa pora siki mu. Nakolo nu ongo yu kimuni amboloni kinie yu konde pumbe.” nirimu.

<sup>19</sup> Aku nirimu kinie Yesusi ola angilipe yu lombili purumu. Yesusi lombili andolime pea puringila.

<sup>20-21</sup> Kanu kinie ambo te molorumu kanumunge pena perimu walema pora na nirimu. Yu pena mindi pepili ponie engaki rurepo omba purumu. Kanu ambomone ‘Yunge wale pakolimu mindi ambolondu liemo na konde pumbu.’ nimbe pilipelie Yesusi pumbe purumu kinie bulkundu omba, yunge wale pakolimunge pundumu ambolorumu. <sup>22</sup> Ambolorumu kinie Yesusi topele topa yu kanopalie nimbendo: ‘Ambolamo, nu konopu wayongo nipili moloyo. ‘Nu manda tepa konde limbe.’ konopu lenu kanu ulumuni nu konde pukunu.’ nirimu. Kanu enamonga ambomo konde pupelie we molorumu.

<sup>23</sup> Kanu kinie Yesusi „Juda yamboma maku toko Pulu Yemonga ungumu piliringi ulkemo, nokoli yemonga ulkena sukundu ombalie yambo aisili molko kondo kolko, kolape mungo langoko, kola aili teko teko moloringi kanopalie yuni nimbendo: <sup>24</sup>“Ene anju tame! Ambolamo kolou na kolomu. We uru mindi pelemo.” nirimu. Aku nirimu kinie „ambola kanumu sike kolopa pora sirimu pilkulie yuni “We uru pelemo.” nirimumunge, yu ungu taka tonjiku tae tenjiringi.

<sup>25</sup> Kanu kinie yambo maku toko moloringime pulu sipe pena pena tepalie „ambola onomo lerimu, suluminiana pupe yunge kimu ambolorumu kinie ambolamo ola molorumu. <sup>26</sup> I ulu tondolo terimumunge temanemo kanu koleamonga sukundu lerimu koleamanga pali anju anju purumu piliringi.

<sup>27</sup> Yesusi kanu koleamo mundupe kelepa pumbe purumu kinie mongo keri lerimu ye talo yu lombili ongo walsikululie ningilindu: “Ye nomi kingi Depisini kalopa lirimu yemo, nu olto kondo koloi.” ningu wale aisili niliku oringili.

<sup>28</sup> Yu ulke tengā sukundu purumu kinie mongo keri leli yetolo yu molorumuna lombili oringili kinie yuni elte walsipelie: “Elte na mawa tekembele mele ‘Manda temba.’ konopu lekembele molo moloye?” nirimu kinie

eltene ningilindu: “Ailimu, ‘Manda teni.’ konopu lekembolo.” niringili.

<sup>29</sup> Kanu kinie yuni eltenga mongotolonga ambolopalie nimbendo: “Nane ‘manda temba.’ konopu lekembele mele aku sipe wendo opili.” nirimu

<sup>30</sup> kinie eltenga mongotolo peanga lerimu, melema altoko kanoringili.

Yesusini elte tondolo mundupe mane sipelie nimbendo: “Eltene i ulu wendo okomomo yambo teluri kepe paa naa piliengi, naa ningu siele!” nirimu. <sup>31</sup> Nakolo elte pena pukulu Yesusini terimu mele aku koleamonga sukundu lerimu koleamanga pali temane toko silikulu andoringili.

<sup>32</sup> Kanu yetolo Yesusi munduku kelkolo pungilí puringili kinie ye te konopuna kuru molorumumunge ungu te naa nirimu ye te Yesusi molorumuna mengo oringi. <sup>33</sup> Yesusini yemonga konopuna molorumu kuru kanumu topa makororumu kinie ungu naa nirimu ye kanumuni ungu nirimuna yambo maku toko moloringimene kanokolie konopu aisili liku mundukulie ningindu: “Ou Isirele koleana sukundu i sipe ulu te wendo na orumu kanumu.” niringi.

<sup>34</sup> Nakolo Parisi yemane ningindu: “Kurumanga nomimuni yu lipe taponjilimona yuni kuruma topa makorolemo.” niringi.

<sup>35</sup> Yesusi kolea ailimenga kinie, kolea kangamanga kinie pelipe andopalie nirimununi, Juda yamboma maku toko Pulu Yemonga ungumu piliringi ulkemanga pupe ungu mane sipe; Pulu Yemo ye nomi kingi molopa yamboma nokolemo nokomba ungu pulumunge temane peangama topa sipe; kuru lupe lupema torumu yamboma tepa konde lirimula. <sup>36</sup> Yambo paa aisili yu molorumuna ongo liku maku toko moloringime kanopalie ene umbu konopu naa pepili andoko, kangime enge naa perimuna ene eneno manda liku na taponjiku molkolie ene kongi sipisipime enenga tapu ye te na molorumumunge we moloringi mele ene aku siku moloringine kanopalie ene paa kondo kolorumu.

<sup>37</sup> Kanu kinie „yambo aisili ‘Yuni lipe taponjipili.’ ningu moloringine kanopalie,“ lombili andolimendo nimbendo: “Langi pulumu ponienou lemo nakolo kongono ye aisili molo. <sup>38</sup> Na ye telumu mindi i kongonomo tekero kene, Langi Pulu Yemo mawa tekolie yuni “Langi nou lelime lingí kongono tengé yamboma yunge ponienou lipe mundupili.” niei.” nirimu.

**10** <sup>1</sup> Yesusini yu lombili andoli ye engaki rurepondo “Yando wai.”

nimbeline enene yambomanga konopuna kuru molemoma “Ong wendo pai.” ningu toko makoronge tondolomo sipelie, yambo kuru tolime kinie kangi pange mange telime kinie ‘Konde pangí.’ ningí nambamo sirimu.

<sup>2</sup> Yuni “Nanga kongonomo tenjipai.” nimbe lipe mundurumu ye engaki rureponga imbime i sipe: Ou Saimono, yunge imbi te ‘Pita’ niringila, yu

keme yunge angenu Enderu keme, Jeperinge malo Jemisi keme Jemisi yunge angenu Jono keme,<sup>3</sup> Pillipu keme Batollomiu keme, Tomasi keme kou takisi lirimu ye Mateyu keme, Allapiasinge malo Jemisi keme Tadiasi keme,<sup>4</sup> “Olio Juda yamboma oliolio gapomano molamili.” niringi talape ye Saimono keme Yesusi pe lipe opa touma sirimu ye Judasi Isikeriote keme, akuma.

<sup>5</sup> Yesusini aku ye engaki rurepo lipe mundupelie enendo nimbendo: “Yambo lupema molemelena naa la pang. Sameria yambomanga taono tengnaa la pang. <sup>6</sup> Isirele yamboma mindi enenga kongi sipisipi pena lou lelko pelemele mele aku siku molemele yamboma molemelena mindi pang. <sup>7</sup> Ene molemelena pungí pukulie, enendo “Pulu Yemo ye nomi kingi molopa yamboma nokomba walemo nondopa wendo ombá tekemo.” niliku pang.

<sup>8</sup> “Kuru tomba yamboma tekoconde liku, kolko lenge yamboma ‘Lomboroko ola molai.’ ningu, kuru laká nombá yamboma ‘Umbu kangi angilipili.’ ningu, kuru konopuna molopili molonge yamboma ‘Konopuna naa molangi, ongo wendo pang.’ ningu teliku pang. I kongonomo tengemonga tondolomo kou te molo meltene topo toko naa likimili kene anju yamboma aku siku liku taponjikulie ningímuni, ‘Kou te liemili.’ ningu naa la teangi. We teangi.

<sup>9</sup> “Pungindu kou gollo mare molo kou sillipa mare molo kou kopa mare kakona panjiku mengo pu naa pang. <sup>10</sup> Mele wale kepe wale pakoli talo kepe kimbu su kepe apulu mingi kepe naa mengo we pang. Yambo kongono tenjilimomo kongono tenjilimo yambomone langi simbe kinie papu kene melte mei naa meangi. We pang.

<sup>11</sup> “Pe kolea aili tenga molo kolea kanga tenga suku pukulie ningímuni, yamboma walsiku pilkulie “Ye nae ye peanga te molemomonga oliondo “Pea peamili wai.” nimbeye?” niengi. Kanu kinie te ningu singí kinie pilku yu kanoko lenjikulie kanu yemonga ulkena puku yu kinie mindi pea peko molkolie pe aku koleamo munduku kelko pang. Ulke pinie pinie na andoko ulke teluringe mindi langi nongo peangi.<sup>12</sup> Kolea tenga puku ye peanga te liku ora singí kinie kanoko lenjiku, yunge ulkena sukundu pukulie ningímuni, ulke pulu yambomando “Ene konopu peanga pepili molai.” nieyo. <sup>13</sup> Kanu kinie kanu yambomane “Pea peamili sukundu wai.” níngi liemo, enenga ungu peanga ningí kanumu kanu yamboma kinie pepili. Nakolo kanu yambomane konopu peanga naa panjiku, “Pea peamili wai.” na níngi liemo ungu peanga ou sukundu pukulie ningí kanumu “Ene kinie naa pepili.” ningu, kelko mengo <sup>14</sup> ene munduku kelko yando wang.

<sup>14</sup> “Yambo tene enendo “Pea peamili wai.” ni naa ningu enene ungu ningíme pilku naa língi liemo kanu ulkemo molo kanu taonona yambo kerime munduku kelko pungindu kanu koleana yamboma ‘Kamu molko

kenjengi! Pulu Yemone ene lipa naa taponjimbe mele piliengi.' ningu, enenga kimbuna kanu koleamanga ma angilimbe mamo kulu toko pang. 15 Nane ene paa sike nimbu sikirumu: Kote walemo wendo ombá kinie kolea aili Sodomo kinie Gomoratolo eltenga yamboma ,ou ulu pulu keri aisili sike teringi nakolo, eltenga kote kanga mele pemba. Nakolo i yambo enendo "Sukundu wai." ni naa ningu enenga ungu pilku na lingí yamboma kote walemo wendo ombá kinie enenga kote ailimu pemba.

16 "Ene lipu mundukuru yema ene sipisipi melema, yambo owa takara aili kerimene sipisipi topa nolemo mele yamboma molemelena ene lipu mundukuru. „Nanga ungumu andoko ningu singí kinie pilku keri pilkulie yambomane ene mindili liku singí.„ Yamboma owa takara mele aku siku molemele kene kongi ka wambyiyema pilipe konginjilimu paa pelemona uluma tembando mimi sipe pilipe telemo mele ene aku wambyiyema mele molko, kera waembono molemo mele molangi. „Aku keramone melema mindili sipe tepe kenjimbe ulu pulu te naa pelemo.„

17 "Yamboma mimi siku kanangi. Enene „Na lombili andoli yamboma mindili nongo, kolangi." ningu, „ene „mare liku ambolkolie" kanjollomanga makumanga mengo puku kote tenjiku, ene „mare" Juda yamboma maku toko Pulu Yemonga ungumu pilimele ulkemanga liku mengo puku kopene tongela. 18 Ene nanga yamboma molongemonga ene „mare ka siku" yambo lupemanga gapomano ye ailime kinie ye nomi kingime kinie molongena „kote tenjingindu" mengo pungíla. Aku siku tengen kene ene eneno kanoko konjiku molayo. Nakolo kote tenjingí kinie kotena angilkulie kanu yema kinie kanu yema nokonge ye nomime kinie enene 'Nanga ungumu piliengi!' ningu ene ningu singí. 19 Nakolo ene ka siku kote tenjingí kinie 'Kotena nambolka unguri nimulúnje? Olio ungu te walsiku pilingí kinie nambolka unguri pundu topo nimulúnje?' ningu mini wale naa mundengi. Aku tengen enamonga ene ungu ningí mele pilingí. 20 Ene ungu ningíme eneno pilkulie naa ningí. Enenga „mulu koleana molemo" Lapanga Minimu enenga kerena molopalie nimbe simbe unguma enene anju ningí kene konopu kimbu naa siku, pilingí mele niengi.

21 "„Aku walemanga, angenuni yunge angenu „nanga yambo molombamonga, „Kolopili toko konjengi." nimbe kote tenjimbe. Lapane yunge ambolangoma akula temba. Ambolangomane kepe enenga anupili lapali kinie mumindili kolko kotena mengo puku "Toko konjengi." ningíla. 22 Nanga yamboma molongemonga yambomane pali ene kinie konopu keri panjingí, nakolo na munduku naa kelko walema pora naa nipili tondolo munduku molonge yamboma „Pulu Yemone" lipa taponjipe 'Mindili nonge koleana naa puku pea molopo konjipu mindi pamili.' nimbé. 23 Kolea tengen yambomane 'ene mindili nangi.' ningu teko kenjingí kinie kolea tengen kowa pang. Nane enendo paa sike nikirumu: Ene kolea Isirele sukundu koleamanga pali andoko nanga kongonomo

teko pora naa sinjengi Manie Omba Mana Ye Au Lerimu Yemo „kelepa yando, ombá.

<sup>24</sup>“Mane sili ye te lombili puku unguma pilimele yamboma ‘Enenga mane silimu maniendopa, ene olandopa.’ manda naa ningí. Kendemande yambo tene ‘yunge nokoli yemo maniendopa, yu olandopa.’ manda naa la nimbé. <sup>25</sup>Lombili pupe unguma pilimo yambomo kinie yunge ungu mane silimo yemo kinie kapola kapola molembele akumu manda. Kendemande yambomo kinie yunge nokoli yemo kinie kapola kapola molembele akumu mandala. Ulke pulu yemonga ungu na pilimele yambomane yu kinie mumindili kolko iri tongendo „kurumanga nomi Setenenga imbi manda lelko, “Yu Belsipuli” ningi imbi lemele kanumu. Pe kinié ulke pulu yemondo aku siku níngi liemo yunge ulkena pelemele yambomando pali paa aili teko olandopa ungu kerime ningíla.

<sup>26</sup>“Nanga opa toumane na teko kenjilimele mele ene na lombili andoli yema sike teko kenjingíla, akumunge ene kanu yamboma pipili naa kolayo. Aki tolemo ulumanga telu kepe pe aki naa topa pali mona lemba. Lopi telemo ulumanga telu kepe pe lopi naa temba. Kanu uluma kinie unguma pali yambomane pali pilingí kene pipili naa kolangi. <sup>27</sup>Nane enendo sumbulu tolina nilio unguma pa teline nieyo. Ungu ólo toko ningí eneno komuna pilingí unguma ulke imuna ola angilku ru ningi niengi.

<sup>28</sup>“Kangimu mindi toko konjikulie minimu manda toko naa konjingí yamboma pipili naa kolayo. „Pulu Yemo mindi pipili kolayo.“ Yuni kangimu kinie minimu kinie peatolo tepe koleana manda topa konjimbe kene yu mindi pipili kolai.

<sup>29</sup>“Kera kalsindipele paa kangamo molemo, topo toko lingíndu kera talo pea tene toya mele mindi pulimo kanumu. Nakolo te kolopa we manie naa pulimo. Kanu kerama na lombili andoli yambomanga „mulu koleana molemo“ Lapamone kanolemo. <sup>30</sup>Ene „na lombili andolime“, enenga penge indime kepe yuni koronga telu telu nimbe pali kambu torumu. <sup>31</sup>Enenga „mulu koleana molemo“ Lapamone aku sipe ene molemele mele kanopa mololipe pulimo kene „Yambomane olio teko kenjingí.“ ningi pipili naa kolayo. Kera kalsindipele yu kou paa wallotolo mele pulimo nakolo kanu keramo Pulu Yemone kanopa molemo. Ene yamboma paa olandopa ailime kanopalie ene paa nokopa konjipe molomba.

<sup>32</sup>“Yambo tene yambomanga kumbikerena ola angilipe “Na Yesusinge yambomo molio.” nimbé kinie nane Tara mulu koleana molemomonga kumbikerena ola angilipu “Kanu yambomo nanga yambomo.” nimbula.

<sup>33</sup>Nakolo yambomanga kumbikerena “Yesusi yu naeye? Yu na naa pilkiru.”aku mele nimbé yambomo yu nane Tara mulu koleana molemomonga kumbikerena “Aku yambomo yu naeye? Yu na naa pilkiru.” nimbúla.

34 “ ‘Ya mana yamboma opa naa teko teluna kapola kapola molangi.’ nimbu oruntu.’ konopu naa leangi. Ene yamboma ‘Taka lelko molko kapola kapola molangi.’ nimbundu naa oruntu. ‘Mumindili kolko opa teangi.’ nimbundu oruntu. 35-36 ‘Yambomane teangi.’ nimbundu oruntu mele i sipe:

“Ye tene yunge lapa kinie opa tepili,  
lemenu tene yunge anumu kinie opa tepili,  
malo tengā menuni yunge bamu kinie opa tepili.  
Ulke teluna pelemele yamboma opa tou molonge.”

‘Aku teangi.’ nimbundu oruntu.

37 “Yambo tene na olandopa konopu naa monjipe, yunge lapa molo anumu olandopa konopu monjimbe yambomo ‘Nanga yambomo molopili.’ nimbú kapola naa temba. Yambo tene na olandopa konopu naa monjipe, yunge malo molo lemenu olandopa konopu monjimbe yambomo ‘Nanga yambomo molopili.’ nimbú kapola naa temba. 38 Yambo tene ‘Yu lombili pambo.’ nimbelie yamboma unju perana angilku mindili nongo kolemele mele yuni unju pera mele gomo lembando ‘Na yu lombili pumbundu mindili nondu liemo papula; kolondu liemo papula.’ naa nimu liemo ‘Nanga yambomo molopili.’ nimbú kapola naa temba. 39 Yambo te ya ma koleana ‘Na molopo konjipu, nondopo naa kolombo.’ nimbe pilimo yambomo kolopalie kolea kerine mindili nomba molopa mindi pumbe. Nakolo yambo te na lombili andopa nanga kongonomo tenjimbendo ‘Ya mana mindili nombo molombo kinie mandala, kolombo kinie mandala.’ nimbé yambomo konde molopa konjipe mindi pumbe.

40 “Ene kolea tengā pungí kinie yambo tene ‘Pea molamili wai.’ nimbe lipe taponjilimo yambomo na pea aku sipe lipe taponjilimo. Na ‘Pea molambili oi.’ nilimo yambomone na “Ma koleana pui.” nimbe lipe mundurumu yemo ‘Pea molambili oi.’ nilimola. 41 Yambo tene Pulu Yemone ungu umbu tonjilimoma pilipe yamboma nimbe silimo yambo te olemo kinie ‘Yu Pulu Yemone ungu umbu tonjilimoma pilipe yamboma nimbe silimo yambo te kene’ nimbe pilipelie “Pea molambili oi.” nimbe lipe taponjilimo yambomo Pulu Yemone yunge ungumu nimbe silimo yambomo mele kalomba mele kanu lipe taponjilimo yambomo kepe telu sipe mele kalombala. Yambo tene Pulu Yemonga ungumu pilipe lipe konopu sumbi nipili molemo yambo te olemo kinie ‘Yu Pulu Yemonga ungumu pilipe lipe konopu sumbi nipili molemo yambo te kene.’ nimbe pilipelie ‘Pea molambili oi.’ nimbe lipe taponjilimo yambomo [Pulu Yemone] kanu yambo sumbi nilimu mele kalomba kinie yu lipe taponjilimo yambomo kepe telu sipe mele kalombala. 42 Yambo tene ene nanga lombili andoli yambo imbi naa mololi yambo te kanopa ‘yu nanga lombili andoli yambo te kene’ nimbe kanopalie yu lipe taponjipe we no kepe kolopa simu liemo nane ene paa sike nimbu sikirumu, kanu yambomo paa sike mele kalolimu limbe.” nirimu.

**11** <sup>1</sup>Yesusini yu lombili andoli ye rurepondo yunge kongono tenjingí mele mane sipe pora sipelie nirimumuni, yuaku koleamo mundupe kelepa kolea Gallilli disiriki taonomanga andopa mane sipe Pulu Yemonga, ungu mu nimbe sirimu.

<sup>2</sup>Pulu Yemone “Nanga yamboma nokopa konjimbe ye te lipu mundumbu.” nimbe ou mako torumu ye nomi<sup>j</sup> Kirasimuni ulu tondoloma terimumunge Jono ka ulkena pepa pilipelie nirimumuni, “Yesusindu i siku i siku walsiku pilinjengi!” nimbe yu lombili andoli mare Yesusi molorumuna lipe mundurumu. <sup>3</sup>Kanu yema Yesusi molorumuna ongo yu walsiku pilinjikulie ningindu: “Pulu Yemone olio nokopa konjimbe yere “Lipu mundumbu.” nimbe, nimbe panjirimu yemo ‘Ombá.’ nimbu nokopo molemolo kanumu nu molo te lupe ombámo nokopo molamiliye?” niringi.

<sup>4</sup> Yesusini enendo pundu topa nimbendo:  
“Enene ya kanokomele mele kepe pilkimili mele kepe puku Jono ningu sipayo.

5 Mongo keri leli yamboma mongone kanoko,  
kimbu keri leli yamboma kapola andoko,  
kuru laká nolime umbu kangí angilipe,  
komu silime komuni pilku,  
kolopa lelime ola molemele kepe,  
koropa pulime temane peangama topo silio pilimelela kanumu. Aku siku Jono ningu sieyo. <sup>6</sup>Na kanokolie ‘Yu sike kanu yemo molemo.’ ningu tondolo munduku pilkulie, altoko konopu talo naa panjiku molonge yamboma ene malo.” nirimu.

<sup>7</sup>Jono lombili andolime pungí purungi kinie Yesusini kelepa yambo aisili maku toko moloringimendo Jonondo nimbendo: “Kolea ku leline Jono no linjipe molorumu kinie, ene kanu kolea ku leline nambolka kanonge purungiye? Lkepanie mele poporomene lope lope tenjipe molorumu te kanonge purungiye? <sup>8</sup>Molo kanumu. Alieli kanolemele mele kanonge naa purungi liemo, ulu nambolkare kanongendo purungiye? Ye te mulu wambale paa peangama pakopa molorumuna kanonge purungiye? Akumu molola. Yambo mulu wambale paa peangama pakolemelema ye nomi kingimenga ulkena manjiku molemele kanumu.

<sup>9</sup>“Aku sili te kanonge na purungi liemo, Pulu Yemone ungu umbu tonjilimoma pilipe yamboma nimbe sili ye te kanonge purungiye? Akumu sike nakolo nane enendo nimbu sikiru: Jono yu sike Pulu Yemone ungu umbu tonjilimoma pilipe yamboma nimbe sili ye te nakolo yu Pulu Yemone ungu umbu tonjirimuma pilipe nimbe sili ye we te molo. <sup>10</sup>Yuni Pulu Yemone ou “Lipu mundumbu.” nirimu yemonga aulkemo tepa mimi temu kanumu. Kanu yemondo Pulu Yemonga bokuna sukundu molemo ungu te i sipe:

‘Pulu Yemone yunge Malondo nimbendo:’

“Pilieyo. Nanga ungu te ninjimbe yemo  
nane nu puni aulkena yu kumbi lepo  
lipu mundukuru.

Yuni nunge aulkemo akisinjimbe.” nirimu.’

kanu ungumu bokuna molemo. <sup>11</sup>Nane enendo paa sike nimbu sikirumu: Ou mana moloringi yambomanga te No Linjili Jono kinie manda molo. Jono olandopa mele. Nakolo kinié wale kondemo wendo okomo. Kanu walemo Pulu Yemo ye nomi kingi molopa nokolemo yambomanga te paa imbi naa molopa paa koropa puli yambomo olandopa; Jono yu maniendopa. Ou moloringi yamboma manie mele; kinié na ‘Sike.’ ningu tondolo munduku pilingímunge konopu peanga pemba yamboma olandopa.<sup>12-13</sup> Jono ou mana na ombo molopili ungu manema pelemo boku Mosisini torumuma kinie, Pulu Yemone ungu umbu tonjirimuma pilku yamboma ningu siku bokuna toringi bokuma kinie, aku bokumane Pulu Yemonga unguma ningu siku, Jono kinie Pulu Yemone “Ene nokomba ye nomi te lipu mundumbu.” nimbe panjirimu yemo kinie ongele mele unguma niringi. Nakolo Jono orumu kinie yandopa Pulu Yemo ye nomi kingi molopa yamboma nokolemo ulumu paa tondolo mundupe wendo ombo yunge opa touma topa manie mundulimola; ye enge nilimene aku ulumu ambolongendo tondolo munduku karaye teko lingí tekemelela.<sup>14</sup> Ungu te nimbú tekeromo pilimulú konopu lingí liemo piliengi! Pulu Yemonga bokuna “Pulu Yemone ungu umbu tonjilimoma pilipe yamboma nimbe simbe ye, Illainja ombá.” nirimu ye kanumu Jonondo nirimu.<sup>15</sup> I nikiru mele komu angilimo yambomane paa mimi siku piliei!” nirimu.”

<sup>16</sup>“Kinié mana molemele yamboma nambolka melte ene manda lepo manda nim bunje? Ene molemele mele i sipu nimbu siembo; Ene yamboma maku tolemele koleana ambolangoma pepe pereko molemele mele. Aku ambolangomanga marene ne anju molemele ambolango mare Pea pepe pereko molonge aulke te koroko kelkolie, enendo walsikulie ningindu:

<sup>17</sup>“Konana nímulu kinie

ene ‘Pea konana niemili.’ na ningu “Molo.”níngi.

Pe kelepo kola temulu kinie

ene ‘Pea kola teamili.’ ni naníngi.

Pea pepe perepo molomolo aulke te molo lepamo.”

nilimele. Kinié molemele yamboma ene aku ambolangoma mele molemele.<sup>18</sup> Na kinie No Linjili Jono kinie oltone nilimbolo unguma enene pilku keri pilimele; telembolo mele kanoko keri kanolemelela. Jono ombalie ga kinie no waene kinie na nomba molorumu kinie kanoko keri kanokolie, ningindu: “Yunge konopuna kuru te molemo.” niringi.<sup>19</sup> Pe Manie Ombo Mana Ye Au Lerimu Yemo ombo ga kinie no

waene kinie norumu kinie „kanoko kerila kanokolie“ ningindu: “Yu ga aisili nomba keri pilipe, no waene aisili nomba kekelepa topa telemo yemo. Yu kou takisi lili yema kinie, ulu pulu keri telemele yambo wema kinie ‘Yu kinie pulu lepili pea tapu topo molamili.’ nimbe telemo.” nilimelela. „Enene aku siku Jono kanoko kerila kanolemele. Na kanoko kerila kanolemele, Nakolo pilipe konginjili ulu pulumu Pulu Yemo kinie pelemona yuni telemo temba mele kanokolie ‘Papu telemo.’ ningí.” nirimu.

<sup>20</sup>Aku nimbeline Yesusi kolea ou andopa ulu tondolo aisili terimu koleamanga „moloringi yamboma“ yuni terimu mele kanokolie enenga ulu pulu kerime kanoko keri kanoko munduku kelko konopu alowa naa teringi kanopalie yuni ene iri topalie nimbendo: <sup>21</sup>“Kolea Korasini kinie Besaida taonotolonga „molemele yamboma“ mindili nongo paa molko kenjingí! Kanu koleatolonga sukundu ulu tondolo aisili terindu „nakolo akuna molemele yamboma konopu alowa naa telemele.“ Kolea aili Taya kinie Saidonotolonga sukundu „ulu tondolo te naa terindu nakolo kanu koleatolonga sukundu“ nane ulu tondolo aku sipu telka kanolemelkanje kanu koleatolonga „yambomane“ ene ulu pulu keri telemelena koronga munduku kelko, bulu siku, konopu alowa telemelka. <sup>22</sup>Akumunge nane enendo nimbu sikiru: Pe kote walemo wendo ombá kinie kanu kolea Taya kinie Saidonotolonga „yamboma ulu pulu keri telemelomaga“ enenga kote kanga mele pemba. Nakolo ene kolea Korasini kinie Besaidatolonga „yamboma nane ulu tondoloma terindu kinie kanokolie konopu alowa naa teringimunge“ kote walemo wendo ombá kinie enenga kote aili mele pemba.

<sup>23</sup>“Kapeniame taono „yamboma enene“ ‘Mulu koleana pupu molamili.’ konopu lekemeleye? Aku manda molo. „Enene nanga unguma alieli pilimele nakolo konopu alowa naa telemelomaga“ ene kolea kerine puku molonge. Enenga koleana sukundu ulu tondolo aisili terindu „nakolo ene konopu alowa na teringi“. Kolea aili Sodomo sukundu „ulu tondolo te na terindu nakolo kanu koleana sukundu“ nane ulu tondolo aku sipu telka kanolemelkanje yamboma konopu alowa telemelka, pe kinié kepe kanu koleamo we lelka. <sup>24</sup>Akumunge nane ene „Kapeniame yambomando“ nimbu sikirumu: Kote walemo wendo ombá kinie kolea Sodomo „yamboma ou ulu pulu keri aisili sike teringi nakolo“ enenga kote kanga mele pemba. Nakolo ene kolea Kapeniame „yamboma nane ulu tondolo terinduma kanokolie konopu alowa na teringi yamboma,“ kote walemo wendo ombá kinie enenga kote aili mele pemba.” nirimu.

<sup>25</sup>Aku walemanga Yesusini nimbendo:

“Tara, Mulu Matolo Nokoko Moleno Ye Nomimu, nane nu kinie ‘Ange’ nikiru. “Olio pilipe konginjili pelemo. Olio ololio ungumanga puluma pali pilipu konjilimolo.” ningu pilimele yamboma ene nane kinié telio

ulumanga pulumu nuni ‘Naa piliengi!’ ningu naa ningu sirinu. Yambo ambolango pame mele molko nane nilio unguma komu tenjiku molemele yamboma mindi nane telio ulumanga pulumu ‘Piliengi’ ningu, ene ningu sirinu kanumunge nu kapi nimbu ‘Papu terinu.’ nikiru.<sup>26</sup> Sike, Tara, nuni ‘aku sipe wendo ombá kinie konopu simbu.’ ningu aku siku terinumunge ‘aku sipe wendo okomo.’<sup>27</sup> nirimu.

<sup>27</sup> Pulu Yemondo aku sipe nimbelie kelepa yambo moloringimendo nimbendo: “Melema pali Tarane na sirimu. Yambo tene Malo paa sike molemo mele pilipe kanopa imbi silimo yambo te molo; Lapane mindi yu kanopa imbi silimo. Yambo tene Lapa paa sike molemo mele pilipe kanopa imbi silimo yambo te molo. Malone mindi kanopa imbi silimo; Malone ‘Lapa lipu ora siembo.’ nimbé yamboma ene Lapa kanoko imbi singíla.

<sup>28</sup> “Ene kongono mindili siku telemele yamboma kinie, konopuna umbuni telemo yamboma kinie, na moliona wayo. Onge kinie na pea konopu teluna pumbemonga nane ‘Konopu pe nipili koro molai.’ nimbú. <sup>29</sup> Nando “Nunge kongono teleno mele pea ambolambil. Nu nanga ungu mane silimu molani. Nunge ungu ninime pilipu lipu molambo.” ningu teayo. Na taka lepo molopo, yambomane na teko kenjilimele kinie pilipu siye kolopo moliona i nikiru mele ene na molombona ongo tengé kinie enenga konopuma pe nimbe. <sup>30</sup> Nanga kongono teliomo pea ambolomboko kinie taka lelko teni. Mele pe nilime mindi silio kene moliona wai.” nirimu.

**12** <sup>1</sup> Walse, „Juda yambomanga koro moloringi“ wale Sambate tenga, Yesusi kinie yu lombili andolime kinie rasi witi poniemanga ongo purungi kinie yu lombili andoli yema engelene kolkolie rasi witi mongo mare inie toko norangi. <sup>2</sup> Aku teringi kinie kanokolie Parisi yemane Yesusi yundu ningindu: “Kána! „Koro molemolo“ wale Sambatemonga ‘Kongono naa teangi.’ nimbe pelemo ungu manemo nu lombili andoli yemane manemo pulue tokolie aku siku tekemele.” niringi.

<sup>3</sup> Yesusini pundu topa nimbendo: “Ene Pulu Yemonga bokuna sukundu ‘anda kolepa ye nomi kingi’ Depisini terimu mele nimbe molemo temanemo kanokolie temanemonga pulumu naa pilimeleye? Depisi kinie yu pea purungi yema kinie ene engelene kolkolie niringimuni, <sup>4</sup> Depisi Pulu Yemo molorumu sele ulkena sukundu pupe, Pulu Yemonga kumbi kerena lerimu pillawa kalolime lipe nomba, yu pea purungi yema sirimu noringila kanumu. Kanu pillawa kalolimendo Pulu Yemone ungu mane te sipelie nimbendo:

“We yambomane paa na nangi!

Pulu Yemo popo tonjili yema manjiku nangi!”

aku sipe mele nirimu ‘kanu ungu manemo pulue torumu’ kanumu. Ene konopu talo nambemuna lemeleye? Depisi yuni ou aku terimu mele ene

pilku keri naa pilimelemonga pe kinié na lombili andoli yemane tekemele mele na kanoko keri kanai.” *nirimu.*

<sup>5</sup>“Ungu mane te pelemola. “Pulu Yemo popo tonjili yemane koro mololi wale Sambatemanga Pulu Yemonga ulkena kongono telemele kinie Sambate walemanga ungu manemo pulue tolemele nakolo aku kongono telemelemonga mongo naa pemba.” nimbe molemo akumu naa la pilimeleye? <sup>6</sup>Nane enendo nimbu sikiru: Mele konde te kinié pelemo akumu Pulu Yemo popo toko kalemele ulke tembelemonga olandopamo. <sup>7</sup>*Pulu Yemone nirimu ungu te yunge bokuna molemo mele i sipe:*

“Enene yamboma kondo kolemele kinie  
kanopo peanga kanolio.

Na popo toko kongime kalemele akumu uluri molo.”  
nilimo, akumunge ungu pulumu ene Parisi yemane pilimelkanje i ye ulu teko naa kenjikimili yema “Teko kenjikimili.” na nilimelka. <sup>8</sup>Manie Ombo Mana Ye Au Lerimu Yemone Sambate walema nokolemo yemo molemona *“Sambate wale kinie yamboma molko konjingindu tengen mele manda nimbé kanumu.”* nirimu.

<sup>9</sup>Kanu kinie Yesusi aku koleamo mundupe kelepa pupe Juda yamboma maku toko Pulu Yemonga ungumu piliringi ulke tengen purumu. <sup>10</sup>Kanu ulkena ye te molorumu, yunge ki te kamu kolopa kukurumu. Kanu kinie akuna moloringi ye marene ‘Yesusini tepa kenjimbe kinie kote tenjemili.’ ningu yu walsiku pilkulie ningindu: “Koro molemolo wale Sambate kinie yambo kuru tolemoma tepo konde limulú kinie manda molo aku temulu liemo Pulu Yemonga ungu manemo pulue tomoloye?” nirungi.

<sup>11</sup>Yesusini yemando pundu topa nimbendo: “Sambate wale kinie ye tengen kongi sipisipi te muruna topa manie mundumbe kinie sipisipi ari telemo yemone kundupe ola lipa memba naa ombáye? <sup>12</sup>Aku liemo sipisipi maniendopa mele, yamboma paa olandopa, akumunge Sambate wale kinie ulu peangama manda na temoloye?” nirimu.

<sup>13</sup>Aku nimbeline ki kolopa kukurumu yemondo nimbendo: “Nunge kimu sinio si.” nirimu kinie yemone yunge kimu sinio sirimu kinie yunge ki ekendo peanga lerimu mele ki keri lerimumu altopa kamu peanga lerimu. <sup>14</sup>Nakolo *[Yesusini aku terimu kinie kanokolie]* Parisi yemane pena puku maku toko “Yu nambe tepo topo konjimulíye?” ningu aulke te kororingi.

<sup>15</sup>*Parisi yemane*, yu tonge teringi pilipelie Yesusi aku koleamo mundupe kelepa purumu. Kanu kinie yambo aisili Yesusi purumu mele yu lombili puringi kinie yuni yambo kuru torumuma pali tepa konde lipelie <sup>16</sup>nimbendo: “Na sike yemo molopolie i ulu tondoloma tekero mele enene yambo lupe marendo na ningu siei!” nirimu. <sup>17</sup>Aku sipe wendo orumumunge koronga ou Pulu Yemone ungu umbu tonjirimuma pilipe yamboma nimbe sirimu ye Aisayane ulu te pe wendo ombá ou nirimu mele kamu wendo orumu. Aisayane nimbendo:

**18** “I yemo

nanga mako torundu kongonomo tenjili yemo;  
 nane i yemo konopu monjipu,  
 yu kanopo paa peanga kanolio yemo.  
 Nanga Minimu yunge konopuna panjinjimbu.  
 Yuni ma koleana yamboma pali  
 nane ene sumbi sipu nokombo mele nimbe simbe.

**19** Yambomane yu iri tonge kinie

yuni pundu topa ungu te naa nimbe,  
 ungu te tondolo mundupe naa nimbe,  
 yamboma andoko molemele koleamanga  
 yuni opa ungu naa nimbé.

**20** Kamaye enge naa nilimo te elke naa topa,

tepe llame mimi sipe naa nolemo kinie  
 kamu topa naa kumunjimbe.

‘Pulu Yemone yamboma kamu sumbi sipe  
 nokomba walemo kamu wendo opili.’ nimbe  
 yu aku sipe naa tepa taka lepa molomba.

**21** Kanu kinie mana yamboma pali

‘Yuni ‘olio mongo naa liemili.’ nimbe  
 lipe taponjimbe.’ ningu molonge.”

nirimu ungu akumu wendo orumu.

**22** Kanu kinie ye te yunge konopuna kuru te molorumuna mongo keri  
 lepa melema naa kanopa ungu naa nirimu ye te Yesusi molorumuna mengo  
 oringi kinie Yesusini yemo tepa konde lirimu kinie kanu yemo ungu nimbe  
 melema kanorumu. **23** Aku terimu kanokolie yambomane pali mini wale  
 mundukulie ningindu: “I yemo ye nomi kingi Depisinge malonje?” niringi.

**24** Nakolo aku niringi ungumu pilkulie Parisi yemane ningindu: “Molo.  
 Kurumanga nomi Belsipuli mindi i ye Yesusinge konopuna molopalie yu  
 tondolo silimona yuni kuruma topa makorolemo.” niringi.

**25** Enene aku siku konopuni piliringi mele Yesusini pilipelie ‘Yesusi  
 ‘Setene kinie opa tou moloringimunge Setenene yu naa lipe taponjilke.’  
 ningu paa piliengil’ nimbe, enendo nimbendo: “Yambo talape te konopu  
 teluna naa pupili molko suku singine owe panjiku ene eneno opa tek  
 lupe lupe molemele kinie kanu talapemo pora nilimo. „Molo, kolea teng  
 yamboma molo ulke teluna pelemele yamboma konopu teluna pupili naa  
 molko ene eneno opa telememele kinie kanu yambo talapemo sungu siku yu  
 mele mele molemele. **26** Aku sipela, Setenene yunge kuru te makorolkanje  
 aku telkamonga yunge talapemo kinie opa mele telka. Pe yunge  
 talapemo nambe tepa kapola molemelkaye? „Pora nilke..”

**27** “Ungu te piliengila! Nane Belsipulinge tondolomone kuruma  
 makorolio liemo enenga yemane naenga tondolomone kuruma

makorolemeleye? Akumunge enenga ye kuruma makorolemele yemane ‘Pulu Yemone oliong tondolo silimona olione kuruma makorolemolo.’ ningu pilimelena, enene nando i nikimili unguma kanu yemane pilku apurukulie “Ene kolo tokomele.” ningi.<sup>28</sup> Nakolo sike Pulu Yemonga Minimuni na tondolo silimona nane kuruma makorondu liemo Pulu Yemo ye nomi kingimu molopa yamboma nokomba walemo ene molemelena koronga wendo omu.” nirimu.

<sup>29</sup>“Ungu te pea i sipe: Ye enge nili tene yunge ulkemo nokopa konjilimo kinie ye tene we manda sukundu omba melema wa lipa memba pulimoye? Akumu manda molo. Ou wa noli yemone ye enge nilimunge kimbu kime ka topalie yunge ulkena manda omba melema wa limo kanumu.

<sup>30</sup>“Na naa lipa taponjilimo yambomone na kinie opa tou molemo. Yambo tene na lipa taponjipe kongi sipisipime sukundu naa limo yambomone kongi sipisipime topa bulu balu silimo.<sup>31</sup> Akumunge nane enendo nikiru: Yambo tene ulu pulu kerime tepe, ungu taka tonjipe nimbe kenjilimo uluma Pulu Yemone manda ‘Manie pupili.’ nimbe siye kolomba. Nakolo yambo tene Pulu Yemonga Minimu nimbe kenjipe ungu taka tonjimbe uluma Pulu Yemone ‘Manie naa pupili.’ nimbe siye naa kolomba.<sup>32</sup> Manie Omba Mana Ye Au Lerimu Yemo ungu taka tonjipe ungu nimbe kenjilimo yambomo aku sipe ulu keri telemoma Pulu Yemone ‘Manie pupili.’ nimbe siye kolomba. Nakolo Mini Kake Telimu ni ulu te telemo kinie<sup>33</sup> yambo tene ungu taka tonjipe, opa tepe sipe “Yuni naa tekemo. Kurumanga nomi Setenene yu lipa taponjilimona aku telemo.” nilimo yambomo aku sipe ulu keri telemomo kinié kepe mulu ma pora nimbé wale kinie kepe ‘Manie naa pupili.’ nimbe paa siye naa kolomba.

<sup>33</sup>“Unju peanga te kanokolie ‘Mongo peangama tomba nomolo.’ ningu kanolemele. Unju keri te kanokolie ‘Mongo kerime tomba manda naa nomolo.’ ningu kanolemele. Unju te mongo tolemo kinie kanokolie ‘I unjumu peanga, i unjumu keri.’ ningu apuruku kanolemelemongaaku siku ningu kanolemele.<sup>34</sup> Ene Parisi yema, kolo topa yamboma tepe kenjili wambiyemonga waloma, ene ye keri molemelemane nambe teko ungu peangama manda ningiye? Yambo te yunge konopuna pelemo unguma mindi kerena nilimo akumunge ene ye kerimene nambe teko ungu peangama manda ningiye?<sup>35</sup> Aku sipe mele, yambo peanga tene yunge konopuna ulu peanga pelemoma telemo, nakolo yambo keri tene yunge konopuna ulu keri pelemoma telemo.<sup>36-37</sup> Akumunge nane enendo nimbu sikirumu: Pulu Yemone yamboma kote tenjimbe walemonga eneno ungu nilimelema apurupe pilipelie “Nu yambo peangamo, nu yambo kerimu.” nimbé akumunge yambomane mana we ungu nilimelema pali kepe apurupe pilipelie “Aku unguma nambemuna niringiye?” nimbé.” nirimu.

<sup>38</sup> Kanu kinie Parisi ye mare kinie Pulu Yemonga ungu manemanga puluma pilku mane siringi ye mare kinie enene Yesusindu ningindu: “Ungu Mane Silimu, ‘Nu sike Pulu Yemone ‘Kongono tenjeni.’ nimbe mana lipe mundurumunje olio kanamili.’ ningu Pulu Yemone mindi manda ulu tondolo telemo mele te tei.” niringi.

<sup>39</sup> Yesusini pundu topa nimbendo: “Kinié mana molemele yamboma keri mindi molemele. Ene teko kenjiku Pulu Yemo liku su silimele yambomane “Pulu Yemone mindi ulu tondoloma manda telemo mele kanamili tei.” ningu na mawa telemele. Nakolo „Pulu Yemone na lipe mundurumuna ombo molkoro. Yu kinie tapu topo kongono telembole mele lipe ora simbe ulu, tondolo te wendo naa ombá. Pulu Yemone ungu umbu tonjirimuna pilipe yamboma nimbe sirimu ye Jona kinie wendo orumu ulu akumuni mindi lipe ora silimo manda kanonge. <sup>40</sup> Oma aili tene Jona topa penge mundurumu kinie yu omamonga olona ipulueli tangoli wale yepoko molopa perimu „kinie omamone yu nomu kélona meku topa wendo mundurumu kinie yu altopa we molorumu, mele Manie Omba Mana Ye Au Lerimu Yemo „ono teko panjingí kinie,“ aku sipe ipulueli tangoli wale yepoko mana sukundu pepalie „lomboropa ola molomba..”

<sup>41</sup> “Ou kolea aili Ninipa yamboma „sike molko kenjiringi nakolo Pulu Yemone ungu umbu tonjirimu mele, Jonane „pilipe,“ Ninipa yamboma pupe nimbe sirimu kinie pilkulie teko kenjiringi mele kanoko keri kanoko konopu alowa teko molko konjiringi. Aku teringimunge kinié molemele yambomane Jonanga olandopa ye te ya molemo yemonga ungumu liku su siku naa pilimelemonga kote walemo pe wendo ombá kinie Ninipa yambomane kotena angliku, kinié molemele yambomando “Teko kenjiringi. Mindili nonge kinie papu.” ningí,” „nirimu..”

<sup>42</sup> “Ou olio Isirele yambomanga ye nomi kingi Sollomonu yu ye paa tondolo te molopa, yu ungu lupe lupema pilipe kongnjilimu pepili molorumu mele kolea Sipa nokorumu ambo nomi kuinimu pilipelie, Sollomonone ungu peangama mindi nirimu mele pilimbendo yu kolea suluna molopalie „Sollomon molorumuna“ wale aisili aulkena pelipe orumu. Aku sipe terimumunge, ye nomi Sollomononga olandopa ya molemo yemone nilimo ungumu kinié mana molemele yambomane naa pilku, liku su silimelemonga kote walemo wendo ombá kinie kolea Sipa ambo nomi kuinimuni nimbendo: “Nane Sollomonone ungu peanga nirimu mele pilimbundu aulke suluna orundu nakolo Sollomononga olandopa molorumu yemone nirimu ungumu ene naa pilku, liku su siringi yamboma aku teringimunge ene papu mindili nonge.” nimbe.” „nirimu..”

<sup>43</sup> “Kuru te ye tenga konopuna wendo ombalie, no naa mololi koleamanga pupe manda koro molomba kolea te korolemo. Te naa

kanopa lenjipelie<sup>44</sup> yuni nimbendo: “Na ou molopolie wendo ondu ulkena kelepo pambo.” nimbe yu omba yu ou molopa purumu ulkemo kanolemo kinie ulke puri memba tepa peanga tepa we lepa yambo te naa molemo kinie kanopalie nilimomone,<sup>45</sup> yu kelepa anju pupelie kuru kara puli paa olandopa yepoko pakara lipa memba omba ene pea kanu ulkena sukundu puku molemele. Kanu kinie kanu yemo ou molopa kenjilimo nakolo pe paa kamu olandopa mele molopa kenjilimo. Aku sipe kinié ya tekō kenjiku molemele yamboma pe kamu molko kenjingí.” nirimu.

<sup>46</sup> Yesusi yambo maku toko moloringime ungu mane sipe molopili yunge anumu kinie angenupili kinie yu kinie ungu ningindu ongo pena angiliringi.<sup>47</sup> Yambo tene yundu nimbendo: “Aminie kinie angenali kinie enene nu kinie ungu ningindu ongo pena angilimele.” nirimu.

<sup>48</sup> Yesusini yundu pundu topa „ungu iku topalie” nimbendo: “Nanga anumu naeye? Nanga angenupili nameleye?” nimbelie nirimumuni,<sup>49</sup> yu lombili andoli yamboma lipa ora sipelie nimbendo: “I yamboma nanga anumu kinie nanga angenupili kinie molemele.<sup>50</sup> Nanga Lapa, mulu koleana molemomone “Teangi.” nilimo mele pilku liku telemele yamboma nanga anumu kinie nanga angenupili kinie nanga kemulupili kinie molemele monga aku sипу nikiru.” nirimu.

**13** <sup>1</sup> Yambo maku toko moloringimendo aku sipe nimbe pora sipelie nirimumuni, Yesusi ulkena molopa pena pupe nomu kélona pupe manie molorumu. <sup>2</sup> Yambo paa aisili yu molorumuna ongo maku toko moloringimunge nona andoli sipi te nona ola lerimumunge suku pupe manie molorumu, yamboma nomu kélona angiliringi. <sup>3</sup> Yuni enendo ungu aisili nimbe simbendo ungu iku pokore torumu.  
Ungu iku te i sipe topalie nimbendo: “Pilieme!

“Ye tene rasi witi umbu ponieno andopa tanda sirimu.

<sup>4</sup> Tanda silipe andorumu kinie umbu mare aulkena manie purumu, kanuma keramane ongo liku noringi.

<sup>5</sup> Umbu mare kou perimuna manie pupelie ma wallo kolte mindi lerimuna nondopa mulie topa wendo orumu. <sup>6</sup> Nakolo pulkeno naa mundurumuna ena terimu kinie kanuma kolorumu.

<sup>7</sup> Umbu mare kombulu siri ka mélemo molorumuna manie purumu, siri ka melemo wendo omba witi umbuma topa norumuna omba peanga naa lepa „mongo te na torumu”.

<sup>8</sup> Umbu mare ma peangana manie purumuma wendo omba mongo peangama torumu. Mare mongo tokapu kise mele topa, mare mongo tokapu yepoko mele topa, mare tokapu telu mele torumu.” „nirimu.”

<sup>9</sup> Aku nimbelie “Yambo komu peo lemomane i ungumu piliei.” nirimu.

<sup>10</sup> Yesusi lombili andolime yu molorumuna ongolie yundu ningindu: “Nu yambomando ungu te ninindu ungu ikuma alieli nambemuna tolenoye?” niringi.

<sup>11</sup> Yuni enendo pundu topa nimbendo: “Pulu Yemo ye nomi kingimu molopa yamboma kinie melema kinie nokolemomonga ulu pulu yu yuyu pilirimu kanu ulu puluma ‘Kinié ene „na lombili olemele yamboma, piliengi!’ nimbeline ene nimbe sikiimu. Nakolo we yamboma nimbe naa sikiimu. <sup>12</sup> Pulu Yemonga ungumu pilku molemele yamboma paa olandopa nimbe simbe pilingí. Pe paa aisili pilingí. Nakolo naa pilku molemele yamboma ene laye kolte pilimele ungumu kepe wendo limbe.

<sup>13</sup> ‘Ene mongone kanokolie naa kanoko,

komuni pilkulie naa pilimele.’

akumunge nane we yamboma enendo ‘Unguma nimbu siembo.’ nimbeline ungu ikuma mindi topo silio.

<sup>14</sup> “Aku siku teko molemelemonga koronga ou Pulu Yemone ungu umbu tonjirimuma yamboma nimbe sirimu ye Aisayane “Aku siku tenge.” ou nirimu mele wendo olemo. Aisayane nimbendo:

“Enene alieli komuni pilingí nakolo  
konopuni pilkulie paa naa pilingí;  
mongone kanonge nakolo  
melte paa sike na kanonge.

<sup>15</sup> I yambomanga konopuma paa pipi silimo;

enene ungu pilingindu komu na tenjiku molemele;  
enenga mongoma kumbulku molemele.

Aku siku teko molemelemonga  
na kanoko na pilku molemele.

I uluma aku sipe na telkanje  
enene enenga mongone kanoko  
komuni pilku

konopuni pilkulie alowa telemelka,  
kanu kinie nane ‘Ene konde pang.’ nilke.”

nirimu. Aisayane aku sipe nirimu mele, aku siku kinié we yamboma teko molemele.

<sup>16</sup> “Nakolo „na lombili andolime, enene mongone paa sike kanoko komuni paa sike pilku molemelemonga ene malo. <sup>17</sup> Nane enendo paa sike nimbu sikirumu: Ou moloringi yamboma, Pulu Yemone ungu umbu tonjirimuma pilku yamboma ningu siringi yema kinie, Pulu Yemonga unguma pilku liku sumbi siku moloringi yamboma kinie, kanu yambo aisili kinié ene mongone kanoko molemele melema kinie uluma kinie kanongendo “Kanamola!” ningu moloringi nakolo na kanoringi. Ene kinié komuni pilku molemele unguma pilingindu “Piliemola!” ningu moloringi nakolo naa piliringi akumunge „nane ‘Kinié sike kanoko sike pilimelemonga ene malo.’ nikiru.”

<sup>18</sup> “Akumunge, yambo tene rasi witi umbu tanda sirimu ungu ikumunge pulumu kinié niembo pilieyo.

<sup>19</sup> Umbu mare tanda sirimu aulkena manie purumu kanumanga ungu pulumu i sipe: „Yambo tene Pulu Yemo ye nomi kingimu molopa melema nokolemomonga ungumu pilipelie na pilimo kinie ulu kerimenga pali ulu pulumu pelemo [kuru] muni ombo umbu tanda sili konopuna pupe pelemoma walsikale toropa wendo limo.

<sup>20</sup> Umbu mare tanda sirimu kou perimuna manie purumuma yambo mare aku silime molemele. Enene ungumu pilkulie walsikale sumbi siku konopu siku pilku limele. <sup>21</sup> Nakolo ene pulkeno naa mundukulie ungumu laye kolte mindi pilku molemele. Pe ene konopuna umbuni telemo kinie molo ene Pulu Yemonga ungumu pilku liku molemele mele yambo lupemanekanoko keri kanokolie ungu taka tonjiku teko kenjiku mindili silimele kinie enenga pilimele unguma siye kolemele.

<sup>22</sup> Umbu mare tanda sirimu siri ka mele molorumuna manie purumuma yambo mare kepe aku silime molemele. Enene ungumu pilimele kinie konopuna umbuni telemo umbunime kinie, mele aisili nosikulie ‘Aku melemane olio lipe taponjilimo taponjimbe.’ ningi pilku molemele uluma kinie, kanu sili ulu mare wendo ombo ungu kanumu topa nolemo kinie ungumuni uluri naa tepa langi mongo na tolemo.

<sup>23</sup> Umbu mare tanda sirimu ma peangana manie purumuma yambo mare aku silime molemele. Enene ungumu pilkulie ungu pulumu pilku konjilimele. Pe ene langi mongo tolemele. Kanu yambo marenga langi mongo tokapu kise mele topa, yambo marenga mongo tokapu yepoko mele topa, marenga mongo tokapu telu mele topa, aku sipe tolemo. Unku ikumunge ungu pulumu aku sipe.” nirimu.

<sup>24</sup> Yesusini ungu iku te pea yamboma topa sipelie nimbendo: “Pulu Yemo ye nomi kingimu molopa melema nokolemo akumu i sipe mele:

Ye tene yunge ponienasrasiti umbu peangama tanda sirimu.

<sup>25</sup> Nakolo yamboma uru peringi kinie yunge opa tou ye te ombo era [rasi witi none teli era] umbu te witi ponienasrasiti kelepa purumu.

<sup>26</sup> Kanu kinie umbu peangama wendo ombo witi mongo torumu kinie era kinie pea wendo orumu mele mona molorumu kanoringi.

<sup>27</sup> Kanu kinie ponie pulu yemonga kongono tenjili yema ongo yundu ningindu: “Ailimu, nunge ponienasrasiti langi umbu peangare tanda naa sirinuye? Pe kinié era nambe tepa wendo okomoye?” nirringi.

<sup>28</sup> Yuni enendo nimbendo: “Tena. Opa tou ye tene aku era umbuma ombo tanda sirimu lepamo.” nirimu.

Kongono tenjili yemane ningindu: “‘Era pea waka maka wendo okombele kene pupu erama akupu lipu maku tamili.’ konopu lekenoye?” nirringi.

<sup>29</sup> Nakolo yuni nimbendo: “Molo. Era tengi liemo witi pea pulu akungínje. <sup>30</sup> Pe witi kamu lipu maku tomolondo ou pea ongolo molangili.

Pe witi kamu limulú walemo wendo ombá kinie nane witi kari lelko linjingí yambomando nimbundu: “Ou era kalongendo liku piye teko maku tokolie ningímini, pe witi liku nanga witi nosilio ulkena maku toko nosengi.” nimbú.” nirimu.” nimbe, Yesusini “Pulu Yemo ye nomi kingimu molopa yamboma nokolemo akumu aku sipe mele.” nirimu.

<sup>31</sup> Ungu iku te pea yamboma topa sipelie nimbendo:

“Pulu Yemo ye nomi kingimu molopa yamboma nokolemo akumu i sipe mele:

Ye tene unju masetete umbu te lipé <sup>32</sup>yunge ponienä umbumu mundurumu. Masetete umbu akumu langi umbumanga pali yu paa kangamo nakolo wendo om̄ba ai lemo kinie ponienä molemo melemanga pali yu paa ailimu. Kamu ai lepa unju mele angilimo kinie kerama kanu unjuna ongo kolamanga pelemele. [Pulu Yemo ye nomi kingimu molomba mele aku sipe.]” nirimu.

<sup>33</sup> Ungu iku te pea yamboma topa sipelie nimbendo:

“Pulu Yemo ye nomi kingimu molopa yamboma nokolemo akumu i sipe mele:

Ambo tene yu langi pillawa akoli mele isi wallo kolte pillawa aisilinge mundurumu kinie pillawa pali akorumu. [Pulu Yemo ye nomi kingimu molomba mele aku sipe.]” nirimu.

<sup>34</sup> Kanu unguma pali Yesusini yambomando nimbendo yu ungu iku mindi topa nirimu. We ungu te enendo sumbi sipe naa nimbe ungu iku manjipe topa nirimu. <sup>35</sup>Aku sipe terimumunge koronga ou Pulu Yemone ungu umbu tonjirimuma pilipe yamboma nimbe sirimu ye tene ou nirimu ungu te kamu wendo orumu. Akumu i sipe:

“Nane i ungu nimbundu,  
ungu iku manjipu topo nimbú.

Pulu Yemone ou mulu matolo terimu kinie kepe  
yandopa yandopa kepe mona naa niringi,  
lopi tepe perimu unguma nimbundu  
ungu iku mindi topo nimbú.”

nirimu.

<sup>36</sup> Yesusini ungu iku akuma topa pora sipelie, „yu maku toko moloringi yamboma mundupe kelepa ulkendo purumu kinie yu lombili andolimene yu molorumuna ongolie ningindu: “Ponienä era orumu ungu ikumunge ungu pulumu olio ningu para si.” niringi.

<sup>37</sup> Yuni pundu topa nimbendo:

“Langi umbu peangama tanda sirimu yemo Manie Om̄ba Mana Ye Au Lerimu Yemo. <sup>38</sup>Poniemo ma kolea pali. Langi umbu peangama yambo ‘Pulu Yemo nanga ye nomi kingimu molopili.’ nilimelemonga enenga konopumanga Pulu Yemone tapu tepe molopa nokolemo yamboma. Era umbu akuma ulu kerimenga pali ulu pulumu pelemo kuru munge

yamboma. <sup>39</sup>Era umbu tanda sirimu opa tou akumu „kurumanga nomi depelemo. Witi sukundu liku maku tonge wale akumu ma kolea pora nimbé walemo. Witi mongoma sukundu lingí yamboma mulu koleana angelloma.

<sup>40</sup>“Erama liku maku tokolie tepena kalemele mele ma kolea pora nimbé walemanga aku sipe. <sup>41</sup>Manie Omba Mana Ye Au Lerimu Yemone yunge angelloma lipe mundumbe, enene ‘Yamboma Pulu Yemonga unguma naa pilku, teko kenjiku molangi.’ nilimele yamboma pali kinie, ulu pulu keri telemele yamboma pali kinie, Pulu Yemone tapu tepe molopa nokolemo yamboma molongena wendo liku maku tokolie ningímini, <sup>42</sup>tepe aili nomba pelemo koleana sukundu toko mundungí, kanuna yamboma kola teko paa mindili nongo pereko molonge. <sup>43</sup>Kanu walemanga konopu sumbi nili yamboma enenga Lapa ye nomi kingimu molopa nokolemo koleana ena pa telemo mele ene aku siku kanuna pa tepili molonge.

“Yambo komu peo lemomane i ungumu piliei.” „nirimu.„

<sup>44</sup>„Yesusini aku nimbeline kelepa nimbendo:„

“Pulu Yemo ye nomi kingimu molopa yamboma nokolemo akumu i sipe mele:

Sumele ombele te laku teko ponie tengou lopi teringi we perimu kanumu ye tene pe walse kanopa lipelie kelepa aki torumu. Aki topalie konopu sipe pupe yunge melema pali lipe makete tepe kou pokore yando lipelie kanu poniemo pupe topo topa yando lirimu. „Pulu Yemo ye nomi kingimu molomba mele aku sipe.” „nirimu.„

<sup>45</sup>“Pulu Yemo ye nomi kingimu molopa yamboma nokolemo akumu i sipela:

Kou bisinete teli ye tene siripelu ‘péllé’ nili peangama koropa molorumu. <sup>46</sup>Kanu kinie siripelu péllé kou paa aisili puli te kanopalie nirimumuni, yu pupe yunge melema pali makete tepe kou yando lipelie kanu siripelu péllemo topo topa yando lirimu. „Pulu Yemo ye nomi kingimu molomba mele aku sipe.” „nirimu.„

<sup>47</sup>“Pulu Yemo ye nomi kingimu molopa yamboma nokolemo akumu i sipe melela:

Oma lili wale te nomuna toko munduringi kanumuni oma lupe lupema lirimu. <sup>48</sup>Walemo paa peke lerimu kinie kunduku liku nomu kélona nosikulie, manie molko apurukulie peangama liku wale basikete pokorenga munduringi nakolo kerime toko ele teringi.

<sup>49</sup>“Ma koleamo pora nimbé walemanga aku sipela. Mulu koleana angelloma ongolie ningímini, yambo teko kenjiku molongema kinie yambo sumbi siku molko konjingíme kinie apuruku <sup>50</sup>yambo teko kenjiku molongema liku tepe aili we nomba pelemo koleana toko suku mundungí, kanuna kola teko paa mindili nongo pereko molonge.” „nirimu.„

<sup>51</sup>Ungu ikuma topa pora sipelie Yesusini lombili andolime walsipe pilipelie nimbendo: „Aku unguma pali ungu puluma ene pilíngiye?” nirimu.

Enene yundu ningindu: “Pilímulu.” niringi.

<sup>52</sup>Yuni enendo nimbendo: “Aku liemo Pulu Yemonga ungu manemanga puluma pilku mane silimele yemane Pulu Yemo ye nomi kingimu molopa yamboma nokolemomonga unguma mane silimolo kinie pilku liku molemele kanu yema ene i sipe: Ulke pulu ye tene yunge mele peanga aisili nosilimomanga mele kondema kinie mele ouma kinie pea wendo limo.” nirimu.

<sup>53</sup>Yesusini aku ungu ikuma topa pora sipelie kanu koleamo mundupe kelepa yu purumu.

<sup>54</sup>Mundupe kelepa pupelie yunge pulu kolea „Nasarete” ombalie Juda yamboma maku toko Pulu Yemonga ungumu piliringi ulkena suku pupe yamboma mane sirimu kinie pilkulie ene suru ningu mini wale mundukulie ningindu: “I yemo yunge pilipe konginjilimu kinie yunge ulu tondolo telemomanga tondolomo kinie yu tena lirimuye? <sup>55</sup>Yuulkema takorumu yemonga malo moloye? Maria yunge anumu naa molemoye? Jemisi keme, Josepo keme, Saimono keme, Judasi keme, yunge angenupili moloye? <sup>56</sup>Yunge kemulupili kinie pali olio kinie pea na molemoye? Yu paa sike aku yemo molemomo. Aku liemo yunge pilipe konginjilimu kinie yunge ulu tondolo telemomanga tondolomo kinie yu tena lirimuye?” niringi. <sup>57</sup>Aku siku unguma ningu yu ungu nimbe uluma tepa molorumu mele kanoko keri kanoko yu kinie paa konopu keri panjiringi.

Kanu kinie ene yu kinie mumindili koloringimunge ulu pulumu pilipelie, Yesusini enendo nimbendo: “Pulu Yemone ungu umbu tonjilimoma pilipe yamboma nimbe silimo ye te koleamanga pali imbi ola molemo, yambomane pali yunge unguma pilku limele. Nakolo yunge pulu koleana yu kinie pea tapu toko molemele yamboma mindi yuni nilimo ungumu pilkulie ‘Yu olionga we yere. Yu imbi mololi ye te molo.’ ningu yu nilimo unguma naa pilku, liku su silimele.” nirimu.

<sup>58</sup>Kanu kinie yu ungu nimbe uluma tepa yu yuyu molorumu mele ‘Sike.’ ningu tondolo munduku naa piliringimunge yu kanu koleana ulu tondolo aisili na terimu, wallotolo mindi terimu.

**14** <sup>1</sup>Kanu walemanga kolea Gallilli disiriki nokorumu ye nomi kingi Erotene Yesusini terimu mele temane toringi pilipelie <sup>2</sup>yu kinie tapu toko molko yu liku taponjiringi tapu yemando nimbendo: “I uluma telemo yemo No Linjili Jono lepamo! Yu kolopalie lomboropa wendo omumunge ulu tondoloma temba tondolomo yu kinie pelemo.” nirimu.

<sup>3-4</sup>Kingi Erotene aku sipe nirimu ungumunge pulumu i sipe; Ou walse Erotene yunge angenu Pillipunge ambo menu Erodiasi mangopa

lirimu. „No Linjili, Jonone Erote aku sipe terimu kanopalie yuntu alieli nimbendo: “Nuni [Pulu Yemonga] ungu mane te pulue toko angenanga ambomo mangoko lirinu. Akumu teko kenjirinu.” nirimu kinie Eretene yu lipe ka sipe ka ulkena panjirimu.<sup>5</sup> Ka ulkena panjipelie ‘Yu topo konjembo.’ konopu lerimu nakolo we yambomane ‘Jono yu Pulu Yemone ungu umbu tonjilimoma pilipe yamboma nimbe silimo ye te molemo.’ ningu kanoringimunge yu pipili kolopalie Jono topa na konjirimu.

<sup>6</sup> Pe walse kingi Erotenga meringi walemo wendo orumu kinie Erodiasi lemenu ulkena sukundu ombo, yema maku toko kanoko molangi yu denisi terimu. Eretene ambo wenepomo aku terimu kanopa paa peanga kanopalie<sup>7</sup> yuntu nimbendo: “Nando “Si.” nini melemo paa sike simbu.” nimbe, nimbe panjipe Pulu Yemonga imbi lepa mi lerimu.<sup>8</sup> Yuni aku sipe nirimuna anumuni pilipelie lemenu ungu te nimbe sirimu kinie pilipelie ambo wenepomone Eretendo nimbendo: “No Linjili Jononga „nomimu karu lelko yunge, pengemo pellete tengu nosiku yando si.” nirimu. „Jonone ou alieli “Erote kinie Erodiasitolone teko kenjiringili.” nirimununge mumindili kolopalie Erodiasini ‘Yu kolopili. Sike kolomunje na kanambo.’ nimbe “Pengemo ongo si.” nirimu..

<sup>9-10</sup> Yuni aku sipe mele mawa terimuna pilipelie Erote konopu umbuni terimu nakolo yuni “Paa sike simbu.” nimbe, nimbe panjipe Pulu Yemonga imbi lepa mi lerimu mele kepe, yu konopu alowa temba kinie yu kinie pea langi nongo moloringi yema yu kanoko keri kanonge mele kepe, aku ulutolo pilipelie, ka ulkena nokoringi yemandu ungu te nimbe mundupelie “Yuni mawa tepa “Si.” nikimu mele siengi kene „No Linjili, Jononga „nomimu karu lelko yunge, pengemo yando mengo wai.” nirimu.<sup>11</sup> Aku nirimu kinie pilkulie Jono toko konjiku, yunge pengemo pellete tengu nosiku, yando mengo ongo ambo wenepomo siringi kinie yuni lipe anumu molorumuna memba pupe sirimu.

<sup>12</sup> Aku teringi pilkulie Jono lombili andoringi yema ongo yunge onomo liku mengo puku ono tekolie Yesusi molorumuna puku temane toko siringi. Kingi Eretene No Linjili Jono ou aku sipe topa konjirimu kolorumununge pe Yesusini ulu tondoloma terimu mele pilipelie “Jono nomi karu lerindu yemo lomboropa ola molemo lemo.” nirimu..

<sup>13</sup> Ye nomi kingi Eretene No Linjili Jono topa konjirimu pilipelie nirimunumi, Yesusi yu molorumu koleamo mundupe kelepa ‘Tenga nanu molambo.’ nimbe nona andoli sipi tengu sukundu pupe nomu „Gallilli” nekendo pupe kolea ku leli tengu yuyu pumbe purumu. Nakolo yambo aisili yu aku terimumu pilkulie enenga koleama munduku kelko kimbu kongono teko nomu kélona makaye teko puku yu purumuna akilku lombili puringi.<sup>14</sup> Yesusi no kélona ombalie yambo paa aisili akuna maku toko moloringi kanopalie ene kondo kolopa enenga kuru torumuma ‘Konde pangi.’ nimbe ene tepa konde lirimu.

<sup>15</sup> Pe ipupini ena pumbe terimu kinie yu lombili andolime yu molorumuna ongo yundu ningindu: “I koleana yambo te naa pelemo, ena kamu pukumu kene ya maku toko molemele yamboma ‘Puku kolea marenga langi topo toko lipangi.’ ni.” nirimu.

<sup>16</sup> Nakolo yuni yu lombili andolimendo pundu topa nimbendo: “Nambemuna ‘yambo akuma ‘We pang.’ niembo.’ ningu nikimiliye? Enene eneno yamboma langi mare liku siei.” nirimu.

<sup>17</sup> Enene yundu ningindu: “Ya langi aisili molo. Pillawa kaloli kanga te pakara kinie oma kaloli talo kinie aku langi pokore mindi lemo.” nirimu.

<sup>18</sup> Yuni “Na moliona yando mengo wai.” nirimu.

<sup>19</sup> Kanu kinie yambomando “Erana manie molai.” nimbeline yuni kanu pillawa kaloli te pakara kinie oma talo kinie lipelie mulu koleana olando sipe kanopa „Pulu Yemo kinie, “Ange.” nimbe pillawa kalolime ambolopa pike lepa „oma kinie, lombili andolime moke tepa sipelie “Anju yamboma siei.” nirimu, enene yamboma moke teko siringi. <sup>20</sup>Ene pali kanu langime norangi kinie olo terimu. Pe lombili andolimene langi goli lerimuma liku maku toko wale basikete engaki rurepo toko peke siringi. <sup>21</sup>Langi norangi yema manjipe pape tausini mele. Ambo ambolango „mare pea langi norangi, akuma olandopa.

<sup>22</sup> Yamboma langi sirimu norangi, kinie Yesusini yu lombili andoli yemando sumbi sipe nimbendo: “Maku toko molemele yamboma nane “Pangi.” niembo. Ene nona andoli sipine ola puku no nekendo kumbi lelko pai.” nirimu. <sup>23</sup>Yambomando “Pai.” nimbeline yu yuyu Pulu Yemo kinie ungu nimbendo ma pangine ola purumu. Kanu kinie ena pupe kolea kala torumu kinie akuna yuyu molorumu.

<sup>24</sup> Sipimu no nekendo pumbendo nomu ai suku singine kokele pumbe purumu kinie sipi kumbikundu mendo sipe poporomene topa, nomu torumula kinie nomo ola pupe manie ombo terimu, sipimu topa ola munde manie munde tepa topele mapele torumu.

<sup>25</sup> Kanu kinie ipulueli kolea muni naa lepili „yu lombili andolime sipine ola molko,“ puringine Yesusi nona ola kimbu kongono tepa ombá orumu.

<sup>26</sup> Enene yu nona ola kimbu kongono tepa orumu kanokolie niringimuni, pipili aili teko kolkolie “Kuru te okomaa!” ningu mini wale munduringi kinie <sup>27</sup>Yesusini tamburembu enendo nimbendo: “Ene konopu tondolo pupili molayo. Na mindi okoro. Pipili naa kolai.” nirimu.

<sup>28</sup> Yuni aku nirimu piliringi kinie, Pitane pundu topa nimbendo: “Ailimu, akumu sike nu nunu onu liemo nu okonona na nona ola angilipu wambo walsi.” nirimu.

<sup>29</sup> Yuni “Oi.” nirimu kinie Pita sipine ulsu pupe pukue topa nona manie pupelie nona ola kimbu kambilipe Yesusi molorumuna pumbe purumu.

<sup>30</sup> Nakolo poporome tondolo torumu kinie kanopalie pipili kolopa yu no wangomba tepalie, “Ailimu, na liku taponji!” nimbe ru nirimu.

<sup>31</sup>Kanu kinie Yesusini ki sinio sipe mundupe Pita kundupe ola lipelie yundu nimbendo: “Nane ulu telioma nu wallo kolte mindi pilino lemo. Ou ‘Yuni na lipe taponjimbe, sike nona ola manda pumbu.’ konopu lelkolie altoko konopu alowa nambemuna teko ‘Na no wangombonje?’ ningu pilinuye?” nirimu.

<sup>32</sup>Sipine suku puringili kinie poporome topa kelerimu. <sup>33</sup>Aku terimuna kanokolie sipine suku moloringi yemane Yesusinge imbi ambolko ola linjiku kapi ningu “Nu paa sike Pulu Yemonga Malo lepamo.” niringi.

<sup>34</sup>Kanu kinie „Yesusi kinie yu lombili andolime kinie“ nomu „Gallilli“ nekendo pukulie nomu kélona kolea Geneserete lerimuna wendo oringi.

<sup>35</sup>„Kanu koleana sipine manie oringi kinie“ akuna moloringi yemane Yesusi kanoko imbi sikulie akundu lerimu koleamanga moloringi yamboma pali ningu munduringi kinie yambomane kuru torumu

yamboma pali yu ombo molorumuna mengo ongolie niringimuni,  
<sup>36</sup>“‘Nunge wale pakoli pundumu kepe ambolangi.’ ni.” ningu mawa teringi. Kanu kinie kuru torumu yambomane yunge wale pakolimu amboloringi yamboma pali kamuconde puringi.

**15** <sup>1</sup>Kanu kinie Parisi ye mare kinie, Pulu Yemonga ungu manemanga puluma pilku mane siringi ye mare kinie ene Jerusalleme munduku kelko Yesusi molorumuna ongo yu walsiku pilkulie ningindu: <sup>2</sup>“Olionga anda kolepalimene “Teai.” niringi ungu manemo nu lombili andolimene nambemuna pulue tolemeleye? „Anda kolepalimene “Teai.” niringi mele mimi sипу pilipulie olione kíme kulumiye tolemolo mele“ enenga kíme aku siku kulumiye na toko langi we nolemele kanumu.” niringi.

<sup>3</sup> Yesusini pundu topa nimbendo: “Enene kepe enenga anda kolepalimene “Teai.” niringi mele mindi pilku liku tengendo Pulu Yemonga ungu manema nambemuna pulue tolemeleye? <sup>4</sup>Akumunge Pulu Yemone nimbendo:

“Aminiel i lanielinge unguma pilku liku,  
liku ai siku teai.”

nimbe

“Yambo tene yunge anumundu molo lapando  
ungu te nimbe kenjipe iri tomu liemo  
kanu yambomo toko konjengi.”

ningimbu kanumu. <sup>5</sup>Nakolo ene yemane ningindu: “Yambo tene yunge anumu lapatolondo nimbendo: “Nane elte mele mare lipu taponjipu silkema koronga ‘Pulu Yemo simbu.’ nimbu panjirindu kanumunge elte manda naa lipu taponjipu simbu.” nimbe kinie <sup>6</sup>„aku sipe nimbemonga“ yunge lapa imbi ambolopa ola linjimbe ungu te naa pemba.” nilimele. Aku siku nilimele ungumuni ‘Anda kolepalimene mane siringi unguma olandopa.’ ningu ‘Pulu Yemone nirimu ungumu uluri molo. Manie pupili.’ nilimele.

<sup>7</sup>“Ene ḥungu manema pilku mane silimele yema Parisi yema kinie, ene topele mapele toli yema molemele! Pulu Yemone ungu umbu tonjirimuma pilku yamboma nimbe sirimu ye Aisayane enendo nirimu mele papu nirimu. Ḫenene kinié telemele mele yuni ou nimbe Pulu Yemonga bokuna torumu molemo mele i sipe:”

<sup>8</sup> Pulu Yemone nimbendo:

“Kanu yamboma enenga keremane na kapi ningu  
 ‘Ye aili olandopamo.  
 Nu lipu ai silimolo.’ ningu  
 na imbi ambolko ola linjilimele nakolo  
 enenga konopuma kinie nanga konopumu kinie  
 teluna naa pulimo. Lupe lupe pelemo.

<sup>9</sup> Enene ‘Nanga imbi

ambolopo ola linjemili.’ ningu  
 na we popo toko kapi nilimele.  
 Mana yambomane mane silimele unguma mindi  
 mane sikulie  
 ‘I ungu manema Pulu Yemone  
 “Teai.” nilimo ungu manema.’  
 ningu pilku liku telemele,  
 akumunge na sike popo tonge kinie  
 uluri naa temba.”

nirimu kanumu.” nirimu.

<sup>10</sup> Aku nimbeline Yesusini maku toko moloringi yambomando “Na moliona wai.” nimbeline enendo nimbendo: “Nane ḥaku nikirumunge ungu te, nimbú tekero ungumu komu tenjiku ungumunge pulumu pilku konjeyo. <sup>11</sup> Yambomanga kangine ulsukundu lepalie kerena pupe olona suku pulimo meltene Pulu Yemo manda popo tonge aulkemo pipi silimo, kalaro te manda naa monjilimo. Yambomanga konopuna sukundu pepalie wendo olemo ulumane mindi yamboma kalaro monjilimo.” nirimu.

<sup>12</sup> Aku nirimu pilkulie niringimuni, yu lombili andolime yu molorumuna ongolie ningindu: “Nu aku siku nikinu mele pilkulie Parisi yemane paa pilku keri pilíngi mele nu pilkinuye?” niringi.

<sup>13</sup> Nakolo Yesusini pundu topa ḥungu iku topa Parisime moloringi mele nimbeline nimbendo: “Nanga mulu koleana molemo Lapamone umbu naa panjirimuma pali pulu akumbe. <sup>14</sup> I yemane nilimele mele konopu kimbu siku naa pilku molangi. Ene mongo keri lelimene ḥongo keri lelime, aulke liku ora silimele yema molemele. Mongo keri leli ye tene mongo keri leli ye te aulke te lipe ora sipe ki ambolopa memba pumbe kinie elte peatolo kombuna topa manie mundumbe.” nirimu.

<sup>15</sup> „Kalaro molemomonga ungu ikumu aku sipe torumu kinie pilipelie, Pitane yundu nimbendo: “Aku ungu ikumunge pulumu nambolkanje? Ningu para si.” nirimu kinie

<sup>16</sup> Yesusini enendo nimbendo: “Kinié kepe naa pilkimiliye? <sup>17</sup> Yambo tengā kagine ulsu lepalie kerena pulimo melte olona suku pupe ulsu omba le muruna kamu pulimo mele naa pilkimiliye? <sup>18-19</sup> Kerena sukundu pulimo melemane uluri na telemo kanumu. Ulu kerime ou konopuni pilkulie pe kamu wendo olemomonga konopuna pepalie kerena wendo olemo kanu melemane mindi „Pulu Yemo popo tomba aulkemo pipi silimo, kalaro te monjilimo. Kanu melema i sipe: Konopuni ulu kerime pilimile, yamboma toko konjilimele, ambo ye pulime molo ye ambo lilime yambo lupema kinie ulu kerinele telemele, wa ulu kerinele lupe lupema andoko telemele, wa nolemele, kolo toko yamboma kote tenjilimele, ‘Yamboma pipili kolko molko kenjengi!’ ningu ungu bulkundu ninjilimele, ulu pulu akuma pilku telemele. <sup>20</sup> Aku telemele ulu akumane yamboma „Pulu Yemonga kumbikerena pungí aulkemo pipi silimo, kalaro te monjilimo. Nakolo ki ou naa kulumiye toko langi we sumbi siku nolemele ulu pulumuni „yambo tengā konopuna suku, kalaro te naa monjilimo.” nirimu.

<sup>21</sup> Kanu kinie Yesusi molorumu kolea „Geneserete“ mundupe kelepa „Juda yamboma moloringi kolea Gallilli disiriki ulsukundu, kolea aili Taya kinie Saidonotolo lerimu koleana sukundu purumu. <sup>22</sup> Akuna purumu kinie kolea Kenane ambo te molorumu, yu wendo omba tondolo ru nimbeline nimbendo: “Ailimu, Ye Nomi Kingi Depisini Kalopa Lirimu Yemo, nanga ambolamo kuru te konopuna sukundu molopa yu tondolo ambolemo kene nuni na kondo koloi!” nirimu. <sup>23</sup> Nakolo Yesusini yundu ungu te pundu topa na nirimu.

Kanu kinie yu lombili andolimene ongo yundu ningindu: “Ambomone nu walsilipe olio lombili okomomo „siye tekemo“ kene ‘Anju pupili.’ ni.” niringi.

<sup>24</sup> „Ambomo yu ambo lupe, Juda ambo te molo, nimbe kanopalie,“ Yesusini „yundu“ nimbendo: “Pulu Yemone na Isirele yambo talapemonga kongi sipisipi talopa lemele mele molemele yamboma molemelena mindi lipe mundurumu kanumu. Yambo talape lupema molemelena lipe naa mundurumu.” nirimu.

<sup>25</sup> Aku sipe nirimu kinie pilipelie ambomo omba yunge kumbikerena koporongo langopa ma kanopalie nimbendo: “Ailimu, na liku taponji.” nirimu.

<sup>26</sup> Aku nirimu kinie Yesusini pundu topa „ungu iku te topalie“ nimbendo: “Ambolangomanga langime lipu owama simulú kinie kapola naa temba.” nirimu.

<sup>27</sup> Ambomone nimbendo: “Ailimu, sike nikinu nakolo owamane kepe enenga pulu yambomanga langi pundu manie pulimoma liku nolemele kanumu.” nirimu.

<sup>28</sup> Kanu kinie Yesusini yundu nimbendo: “Ambomo, nu manda tembo mele tondolo munduku pilino lemo kene mawa tekeno mele aku sipe wendo opili.” nirimu kinie yuni aku sipe nirimu mele aku enamonga ambomonga lemenu konde pupe kapola molorumu.

<sup>29</sup> Kanu kinie Yesusi kanu koleamo mundupe kelepa nomu Gallilli kélona „aulke te lerimuna „omba pupe ma pangtenga ola pupe manie molorumu.

<sup>30</sup> Kanu kinie yu molorumuna yambo paa aisili oringi.  
 Kimbu keri lerimuna aulke mimi siku na andoringi  
 yamboma kinie,  
 mongo keri lerimu yamboma kinie,  
 kimbu ki karaye terimu yamboma kinie,  
 ungu manda naa niringi yamboma kinie,  
 aku sipe kuru lupe lupe torumu yambo aisili  
 mengo ongo yu molorumuna nondoko nosiringi kinie  
 yuni ene tepa konde lirimu.

<sup>31</sup> Unku naa niringi yamboma ungu niringi;  
 kimbu ki karaye terimu yambomanga kimbu kime  
 kelepa sumbi sipe angilirimu;  
 kimbu keri lerimuna aulke mimi siku naa andoringi  
 yamboma kapola andoringi;  
 mongo keri lerimu yamboma mongone melema kanoringi;  
 aku sipe ulu tondoloma wendo orumu kinie kanokolie we maku toko  
 moloringi yambomane paa konopu aisili liku munduku, Pulu Yemo ene  
 Isirele yamboma nokoramu popo toringi Pulu Yemo kapi ningi imbi  
 ambolko ola linjiringi.

<sup>32</sup> Kanu kinie Yesusini yu lombili andolimendo “Na moliona wai.”  
 nimbelie enendo nimbendo: “I yambo maku toko molemelema na kondo  
 tekemo. Wale yepoko na kinie molongi, pe kinié ga nonge te naa lemo.  
 Ene langi naa nongo we pungí kinie aulkena kimbu ki pange mange tepa,  
 topa ne munde ya munde temba kene ‘ene engele tepa pepili ulkendo pai.’  
 naa nimbü.” nirimu.

<sup>33</sup> Aku nirimu kinie pilkulie yu lombili andolimene ningindu: “Sike  
 ninkinu nakolo, i kolea ku leline molemolo. I yambo paa aisili manda  
 nonge mele pillawa kaloli tena lembana lipu simulúye?” niringi.

<sup>34</sup> Yesusini enendo “Pillawa kaloli nambepa nosikimiliye?” nimbe  
 walsirimu kinie

enene “Pillawa kaloli yepoko pakara kinie oma wallotolo kinie  
 nosikimulu.” niringi.

<sup>35</sup> Kanu kinie yuni maku toko moloringi yambomando “Manie molai.”  
 nimbelie, <sup>36</sup> pillawa kaloli yepoko pakara kinie omama kinie lipe Pulu  
 Yemo kinie “Ange.” nimbe, langi akuma pike lepa yu lombili andolime

sirimu kinie enene yamboma moke teko siringi. <sup>37</sup>Yamboma pali nongo keri piliringi. Pe langi kakena lerimuma lombili andolimene liku wale basiketemanga lakiliringi, wale aili yepoko pakara peke lerimu. <sup>38</sup>Ye po tausinini aku langime noringi. Ambo ambolangoma kinie pea langi noringi.

<sup>39</sup>Kanu kinie Yesusini maku toko moloringi yambomando “Ulkendo pai.” nimbelie nirimumuni, nona andoli sipi tengah suku pupe, „nomuna nekendo“ kolea Makatane purumu.

**16** <sup>1</sup>Kolea Makatane purumu kinie Yesusi molorumuna Parisi yema kinie Sadusi yema kinie ene ongo, ‘Yuni nambe tembanje? Kanamili.’ ningu yu manda manjiku mawa tekolie ningindu: “Ungu Mane Silimu, ‘Nu sike Pulu Yemone ‘Kongono tenjeni.’ nimbe ya mana lipe mundurumunje kanamili.’ ningu mulu koleana molemo Pulu Yemone mindi manda ulu tondolo telemo mele te tei.” niringi.

<sup>2</sup>Yesusini pundu topa nimbendo: “Ipupini ena pumbendo mulúmu kondoli telemo kinie kanokolie ‘wale peangamo wendo ombá.’ nilimele. <sup>3</sup>Ipulueli ou kolea tangombando kolea kupe topa mulúmu sumbulu tolemo kinie kanokolie ‘Lo ombá lemo.’ ningu pilimele kanumu. Mulúmu kanokolie ‘koleamo i sipe i sipe temba.’ ningu kanolemele nakolo i walemanga uluma wendo olemoma kanokolie ulumanga pulumu manda naa pilimele. <sup>4</sup>Kinié mana molemele yamboma yambo kerime mindi molemele. Ene teko kenjiku Pulu Yemo liku su silimele kanu yambomane “Pulu Yemone mindi ulu tondoloma manda telemo mele kanamili tei.” ningu na mawa telemele. Nakolo „Pulu Yemone na lipe mundurumuna ya ombo moltoro. Yu kinie tapu topo kongono telembole mele, lipe ora simbe ulu tondolo te wendo naa ombá. „Pulu Yemone ungu umbu tonjirimuma pilipe yamboma nimbe sirimu ye, Jonane terimu ulumuni mindi lipe ora silimo mele manda kanonge. Te pea wendo naa ombá.” nimbelie ene mundupe kelepa purumu.

<sup>5</sup>Ene „nomu Gallilli“ nekendo pungindu „Yesusi“ lombili andoli yema pillawa kaloli komu siku na mengo puringi. <sup>6</sup>„Kanu kinie“ Yesusini enendo „lepi lepi topa ungu iku topalie“ nimbendo: “Paa mimi siku kanai! Parisi yema kinie Sadusi yema kinie enene pillawa akoli mele isi nosilimelemo kanoko konjei!” nirimu.

<sup>7</sup>Aku sipe nirimu kinie pilkulie yu lombili andoli yemane eneno kerepali ningulie ningindu: “Olio pillawa kaloli „nomolo“ mare na lipu membo omulumunge aku sipe nikimunje.” niringi.

<sup>8</sup>Aku siku niringi mele pilipelie Yesusini enendo nimbendo: “Ene ‘nane manda lipe taponjimbe.’ ningu wallop kolte mindi pilimele yema, “Pillawa kaloli naa memulu.” ningu nambemuna kerepali nikimiliye? <sup>9</sup>Ene kinié kepe naa pilku konjilimeleye? Pillawa kaloli te pakara ye pape tausini moke teko siringi mele komu silimeleye? „Nongo pora siringi kinie“ langi

kakena lerimuma liku wale basikete aisili toko peke siringi mele komu siku na pilkimiliye?

<sup>10</sup>“Molo pillawa kaloli yepoko pakara moke teko ye po tausini siringi mele naa pilku, „nongo pora siringi kinie“ wale basikete aili mare langi kakena lerimuma toko peke siringi mele naa pilku molemeleye? <sup>11</sup>‘Yuni sike pillawa kalolimundu naa nikimu.’ ningu nambemuna naa pilíngiye? ‘Parisi yema kinie Sadusi yema kinie pillawa akoli mele isi nosilimelemo mimi siku kanangi.’ nimbu nikiru.” nirimu. <sup>12</sup>Yuni aku nirimu kinie pilkulie enene ‘pillawa kalongendo isi mundulimele akumundu naa nikimu. Parisi yema kinie Sadusi yema kinie enene ungu mane siringi ungumando nikimu.’ ningu piliringi. ‘Parisi yema kinie Sadusi yema kinie enene ungu mane mare kolo toko siringime yunge lombili andolimene paa na piliengi!’ nimbe nirimu mele ningu piliringi..”

<sup>13</sup>Yesusi kolea aili Sisaria Pillipai lerimu koleana pupelie nirimumuni, yu lombili andolimendo walsipelie nimbendo: “Manie Ombo Mana Ye Au Lerimu Yemondo yambomane yu imbi lelko nae nilimeleye?” nirimu.

<sup>14</sup>Enene yundu ningindu: “Marene “Nu No Linjili Jono „kolorumu, kinié kelepa lomboropa ola molemo.“ ningu pilku, marene “Nu Pulu Yemone ou konde molopili olando lirimu ye, Illainja kelepa ombo molemo.” ningu pilku, marene nu “Jeremaya molo Pulu Yemone ungu umbu tonjirimuma pilipe yamboma nimbe sirimu ye „ou kolorumu kinié lomboropa ola molemo“ te lupe.” nilimele.” niringi.

<sup>15</sup>Aku niringi pilipelie Yesusini enendo nimbendo: “We yambomane aku siku nilimele, nakolo ene eneno na nae nilimeleye?” nirimu.

<sup>16</sup>Saimono Pitane pundu topa nimbendo: “Nu Konde Molopa Mindi Puli Pulu Yemonga Malo, „Pulu Yemone ‘Olio nokopa konjimbe ye te lipu mundumbu.’ ou nimbe mako torumu ye nomi, Kirasimu.” nirimu.

<sup>17</sup>Yuni aku nirimu pilipelie Yesusini yundu nimbendo: “Jona Malo Saimono, nu malo. I ninkinumu mana yambo tene nu na nimbe simu. Tara mulu koleana molemomone nimbe simu. <sup>18</sup>Ungu te pea nundu nikirula: Nunge imbi Pita, (kanu imbimunge ungu pulumu ‘kou’ kanumu). Kanu koumunge ola nanga yambo talapemo lipu maku topo monjimbu. Kanu kinie kololi ulu pulumunge tondolomone i nanga talapemo topa manie manda na mundumbe, molo. <sup>19</sup>Pulu Yemo ye nomi kingi molopa yamboma nokomba ulke kimu nu simbu. Kanu kinie nuni mana meltendo “Molo.” nini mélemo mulu koleana sukundu “Molo.” nimbéla. Nu mana meltendo “Kapola.” nini mélemo mulu koleana sukundu “Kapola.” nimbéla.” nirimu.

<sup>20</sup>Kanu kinie yu lombili andolimene Yesusindu “Pulu Yemone “Ene nokopa konjimbe yere lipu mundumbu.” nimbe mako torumu ye nomi Kirasimu nu ongo moleno.” niringi kanu ungu molumundu yuni enendo tondolo mundupe nimbendo: “Enene anju yambo telurindu kepe na kanu yemo molio mele „isili ou,“ paa na ningu siei!” nirimu.

<sup>21</sup> Kanu kinie Yesusi yu lombili andolimene yuntu „Pulu Yemone olio “Nokopa konjimbe ye te lipu mundumbu.” ou nimbe mako torumu ye nomi Kirasimu nu.” ningu, ningu para siringi kinie pilipelie, yuni yu kinie wendo ombá mele pulu monjipe ene sumbi sipe nimbe sipelie nimbendo: “ ‘Na mindili aisili nombondo kolea aili Jerusalleme paa pumbu.’ nimbu pilipu molio. Juda yamboma nokolemele tapu yema kinie, Pulu Yemo popo tonjili ye ailime kinie, Pulu Yemonga ungu manemanga puluma pilku mane silimele yema kinie, enene na paa toko mindili konjingí. Na toko konjingí kolombo kinie wale talo ombo pumbe kinie yepoko sipemonga Pulu Yemone nando ‘Lomboroko ola moloi.’ nimbé.” nirimu.

<sup>22</sup> Aku nirimu kinie pilipelie, Pitane yu anju lipe memba pupelie yu pulu monjipe iri topalie nimbendo: “Ailimu, aku siku paa naa ni! Nu nikinu mele aku sipe paa wendo naa ombámo.” nirimu.

<sup>23</sup> Nakolo „yuni kurumanga nomi Setenene ungu umbu tonjirimu mele pilipelie nirimuna pilipelie, Yesusini topele topa Pitando nimbendo: “Setene, nu anju pa! Pulu Yemone nando “Tei.” nirimu kongono tembo tekeromo pipi sini tekono kene nu anju pa! Nuni na teko embambo sini tekono. Nu Pulu Yemone konopu lemo mele naa leno. Yambomane konopu lemele mele mindi leno.” nirimu.

<sup>24</sup> Kanu kinie Yesusini yu lombili andolimendo nimbendo: “Yambo tene ‘Yu lombili pambo.’ nimbeline yuni yunge konopumuni pilimo melemanga ‘Topo manie mundembo.’ nimbe yamboma unju perana angilku mindili nongo kolemele mele yuni unju pera mele gomo lembando ‘Na yu lombili pumbundu mindili nondu liemo papula; kolondu liemo papula.’ nimbeline na lombili opili. We na opili. <sup>25</sup> Yambo tene yunge mana molopa na kololi ulu pulumu ambolomba temba kinie yu kolopalie sike molopa kenjipe mindi pumbe. Nakolo yambo tene na konopu monjipelie nanga kongonomo “Tenjumbo.” nimbe temba kinie yu kolopalie yuconde molopa konjipe mindi puli ulu pulumu sike kanopa limbe. <sup>26</sup> Akumu nambemuna nikiruye? Yambo tene mana melema pali yu yuyu lipe nosipelie yu mini pali Pulu Yemo na molomba koleana pupe mindili nomba molopa kenjilkenje kanu melemane kanu yambomo nambe tepa lipe taponjilkenje? Lipe na taponjilkemo. Molo yambo tene ‘Na mini pali konde molopo konjipu mindi pambo.’ nimbeline yu nambolka meltene mini pali konde molopa konjipe mindi puli ulu pulumu topo topa lilkeye? Meltene manda topo topa na limbe.

<sup>27</sup> “Manie Ombo Mana Ye Au Lerimu Yemo pe Lapanga tondolo pa telimu kinie yunge „mulu koleana,“ angelloma kinie pea ombá. Ombalie yuni olio ya mana yamboma yu mele mele telemolo ulumanga olio yu mele mele pundu tombamonga nane aku nikiru.

<sup>28</sup> “Nane enendo paa sike nimbu sikirumu: Ene ya angilkimilimenga mare ou kolou na kolangi Manie Ombo Mana Ye Au Lerimu Yemo ye

nomi kingimu ombo molopa melema kinie yamboma kinie pali nokomba ombá kanonge.” nirimu.

**17** <sup>1</sup>Yesusini „yu lombili andolimendo aku sipe nimbe sirimu kinie“ pe koro te ombo purumu kinie Pita keme Jemisi keme Jemisi angenu Jono keme ene lipe memba pupe mulú paa olandopa polorumu tengā ola purumu. ‘Olio oliolio mindi molamili.’ nimbe ene akuna lipe memba purumu. <sup>2</sup>Akuna puringi kinie ene kanoko molangi yunge kangimu alowa tepa, yunge kumbikeremo ena tondolo topa yambomanga mongo takele telemo mele pa aili tepa tepa, yu pakorumu mulu wambalema pa telemo mele aku sipe kake terimu. <sup>3</sup>Yu aku sipe molopili, „Juda yambomanga koronga ou moloringili ye aili talo,“ Mosisi kinie Illainjatolo ongolo Yesusi kinie ungu ningulu mona angiliringili kanoringi.

<sup>4</sup>Kanu kinie Pitane Yesusindu nimbendo: “Ailimu, olio ya molopamolo peanga lepamo. Nuni “E.” ninu liemo, ulke takaye yepoko takonjimbu. Te nunge, te Mosinge, te Illainjanga takonjimbu.” nirimu. <sup>5</sup>Yuni aku sipe nimbe molopili kupe tondolo pa teli te ombo ene aki torumu kinie kupena suku ungu te wendo ombalie nimbendo: “I yemo nanga konopu monjilio Malomo. Yu kanopo paa peanga kanolio. Yuni ungu nimbéma pilku liengi.” nirimu.

<sup>6</sup>Aku nirimu pilkulie yu lombili andoli ye „yepoko“ paa mini wale mundukulie mana manie molko tamalu peringi. <sup>7</sup>Ene tamalu peringine Yesusi ombo ene ambopalie nimbendo: “Mini wale na munduku ola angiliei.” nirimu. <sup>8</sup>Pe olando siku kanoringi kinie Yesusi yuyu molorumu kanoringi.

<sup>9</sup>Mulú polorumumunge manie onge oringi kinie Yesusini ene mane sipelie nimbendo: “Enene kinié kanongi mele isili ou yambo teluri kepe ningu na siengi. Pe mindi, Manie Ombo Mana Ye Au Lerimu Yemo kolopalie lomboropa ola molomba kinie temanemo toko anju siengi. Ou molo!” nirimu.

<sup>10</sup>Aku nirimu kinie pilkulie yu lombili andolimene „yu sike molorumu mele ningu kanokolie“ yundu walsiku pilkulie ningindu: “Pulu Yemone ‘olio nokopa konjipe lipe mundumbu.’ ou nimbe mako torumu ye nomi Kirasimu nu liemo, Pulu Yemonga ungu manemanga puluma pilku mane silimele yemane “Illainja „kelepa,“ kumbi lepa ombá. Ye nomi Kirasimu pe akilipe ombá.“ nilimele mele nambemuna nilimeleye? „Illainja kelepa na opili nu koronga orunu moleno kanumu.“ niringi.

<sup>11</sup>Yesusini pundu topa nimbendo: ““Illainja „kelepa,“ kumbi lepa ombalie melema pali tepa mimi temba.” nilimele kanumu sike nilimele.

<sup>12</sup>Nakolo „akumunge ungu te pea nimbu sikirula.“ Pilieme. Illainja koronga orumu. Yu orumu kinie „kanu yemane“ yu kanoko imbi na siku ‘Yu we yere.’ konopu lelkolie ‘Yu kinie temolo.’ ningu piliringi uluma pali

teringi. Aku siku mele Manie Omba Mana Ye Au Lerimu Yemo mindili liku singíla.” nirimu.

<sup>13</sup>Aku sipe nirimu kinie pilkulie lombili andolimene ‘No Linjili Jonondo nikimu.’ ningu piliringi.

<sup>14</sup>Yesusi kinie yu lombili andoli ye yepoko kinie, ene „muluna manie, ongolie yamboma maku toko moloringine oringi kinie ye te Yesusi orumuna omba koporongo langopa <sup>15</sup>mawa tepalie nimbendo: “Ailimu, nanga kangomo kondo koloyo. Yu kuru kopalli tolemona mindili aili tepe nolemo. Taki taki yu tepena pupe nomanga pulimo. <sup>16</sup>Nu lombili andoli yema molongine kangomo membo ondu kinie enene yu manda teko konde na língi.” nirimu.

<sup>17</sup>Aku nirimu kinie pilipelie Yesusini „yamboma iri topalie, nimbendo: ‘Kinié molemele yamboma ene ‘Pulu Yemone uluma sike manda temba.’ ningu, tondolo munduku na pilimele. Ene konopu karaye tepe pepili molemele yamboma, na ene wale nambe tepo mane sipu ulu mare lipu ora simbu kinie mimi siku pilingíye? ‘Na ene kinie siye tekemo..’” nimbelie

“Na moliona kangomo mengo wai.” nirimu. <sup>18</sup>Mengo oringi kinie Yesusini kanu kurumu iri torumu kinie yu kangomonga „konopuna, omba wendo purumu kinie kanu enamonga kangomo manda molorumu.

<sup>19</sup>Aku terimu kinie kanokolie Yesusi lombili andoli yema Yesusi yuyu molorumuna ongo walsiku pilkulie ningindu: “Kuru akumu olione nambemuna manda na makoromuluye?” nirangi kinie

<sup>20</sup>Yesusini pundu topa nimbendo: “‘Pulu Yemone sike olio lipe taponjimbe.’ ningu, tondolo munduku na pilimelemonga ulu tondolo isilime manda na telemele. Nane ene paa sike nimbu sikirumu: Unju tengi mongo akumu mele paa kanga nakolo kanu mongomo mana mundulimele kinie unju akopa ai lepa angilimo mele, aku sipe enene ‘Pulu Yemone olionga unguma pilimbe. Olio lipe taponjimbe.’ ningu wallo kolte mindi pilkulie i polemo mulúmundu “Anju puku ne koleana angili.” ningí kinie sike aku sipe pupe angilimbe. ‘Teamili.’ ningí ulumanga ulu manda na tengi ulu te na pumba. <sup>21</sup>(Pulu Yemo mawa teko langi mi toko na nongolie kuru isilime yambomanga konopumanga manda makoronge. Ulu tondolo isilime we manda na tengi.)” nirimu.

<sup>22</sup>„Pe walse,“ kolea Gallilli disiriki puku moloringi kinie Yesusini yu lombili andolimendo nimbendo: “Manie Omba Mana Ye Au Lerimu Yemo „ka sikulie yu tonge,“ yema anju singí kinie <sup>23</sup>enene yu toko konjingí. Kolopalie wale yepoko sipemonga Pulu Yemone yundu ‘Lomboroko ola moloi.’ nimbé.” nirimu. Aku nirimu pilkulie enenga konopuna sukundu meme kulupi perimuna pilkulie paa kondo koloringi.

<sup>24</sup>Pe Yesusi kinie yu lombili andolime kinie Kapeniame taonona oringi kinie Pulu Yemo popo toringi ulke tembelemonga kou takisi liringi yema

ongo Pita walsikulie ningindu: “‘Nunge ungu mane sili yemone ulke tembelemonga kou takisi tolemo.’ konopu lekemolomo. Sikeye?” niringi kinie<sup>25</sup> Pitane “Tolemo.” nirimu.

Kanu kinie Pita ulkena sukundu pupelie ungu te nimbé terimu kinie Yesusini yu ou walsipelie nimbendo: “Saimono, nu nambolka konopu lekenoye? Ye nomi kingimene kou takisi lupe lupema lingíndu namele “Tai.” nilimeleye? Enenga yamboma kinie kou takisi limele molo yambo lupema “Tai.” nilimeleye?” nirimu.

<sup>26</sup> Pitane pundu topa nimbendo: “Yambo lupemando “Takisi tai.” nilimele.” nirimu.

Aku nirimu kinie pilipelie Yesusini yundu nimbendo: “Aku liemo kingimunge yambomane takisi na tonge.<sup>27</sup> Nakolo takisi na tombolo kinie ulke tembele takisi limele yemane olto kanoko keri kanonge kapola na temba kene nomuna puku uku mundupani. Uku mundukulie oma te toni aku omamonga keremo aká tenjini kinie kou te pemba, aku koumu likulie mengo puku oltonga pea liku tere lelko takisi toi.” nirimu.

**18** <sup>1</sup>Aku walemonga Yesusi lombili andolimene yu molorumuna ongo yu walsiku pilkulie ningindu: “Pulu Yemo ye nomi kingimu molopa nokolemo yambomanga nae paa olandopa molemoye?” niringi.  
<sup>2</sup>Enene walsiringi mele Yesusini pilipelie yu ambolango kanga te “Na moliona oi.” nimbe ene moloringine monjipelie <sup>3</sup>enendo nimbendo: “Nane ene paa sike nimbu sikirumu: Ene konopu alowa teko ambolango kangama mele na molongi liemo Pulu Yemo ye nomi kingimu molopa yamboma nokolemo koleana suku paa manda na pungí.<sup>4</sup> Akumunge yambo tene ‘Na we yambomo molambo. Nanga imbi te olandopa na molopili.’ nimbe i ambolango kangamo mele na molemo yambomo yu Pulu Yemo ye nomi kingimu molopa nokolemo kolea na yambo imbi paa mololimu molemo.”<sup>5</sup> nirimu..

<sup>5</sup>“[I ambolangomondo ungu te pea niembo:] Yambo tene ‘Na Ailimunge yambomo molio.’ nimbe i ambolangomo mele lipé taponjimbe kinie kanu yambomone aku tembamonga na lipé taponjimbela. <sup>6</sup>Nakolo yambo tene i [ambolango] kangamonga [mele yambo] te [na ‘Sike’ nimbe] tondolo mundupe pilimo [ambolango] kanga te ‘Ulu kerime tepili.’ nimbe kondi tombamonga kanu [ambolango] kangamo tondolo mundupe pilimo mele mundupe kelepa bulu simu liemo [ambolango] kangamo ou kondi na topili kou paa aili te moko toko nomine lenjiku ‘Yu kamu kolopupili.’ ningu paka toko nomuna paa maniekondo mundulimelkanje paa papu.

<sup>7</sup>“[Na] ‘Sike’ ningu tondolo munduku pilimele yamboma kelko bulu siku munduku kelenge uluma ya mana lemomonga na ene kondo tekemo. Sike aku sipe uluma wendo ombá nakolo yambo tene nanga yambo te kondi tombamonga kanu yambomo na bulu sipe anju pumu liemo kanu kondi tomba yambomo mindili nomba paa molopa kenjimbe.

<sup>8</sup> “Nunge kitolone molo kimbutolone ulu pulu keri te temu liemo aku kitolo molo kimbutolo karu lelko ele teani. Nu konde mololiku mindi puni koleana kitolo molo kimbutolo na angilipili puni kinie peangamo. Nunge kimbu ki pali we angilipili tepe na kumbulupe nomba pepa mindi pumbe koleana liku toko mundungí kinie kerimu. <sup>9</sup>Molo nunge mongotolone melte kanokolie konopuni ‘liemboa.’ ningu pilku ulu pulu keri te tenu liemo aku mongotolo akuku ele teani. Nu konde mololiku mindi puni koleana mongotolo na angilipili puni kinie peangamo. Mongo talo we angilipili nu tepe koleana suku liku toko mundungí kinie kerimu.” „nirimu..”

<sup>10</sup> “I ambolango kangama „mele yamboma“ nga te kanoko keri kanoko ‘Yu koropamo.’ ningu paa na teangi. Enenga nokolemele mulu koleana angelloma alieli Tara mulu koleana molemona pea molemele kene „aku na teai..” <sup>11</sup>(Manie Ombo Mana Ye Au Lerimu Yemone ‘Yambo aulke lou lelko molko kenjilimele yamboma koropo lipu taponjembo.’ nimbe orumu kanumu.)” „nirimu..”

<sup>12</sup> “Ene nambolka ningu pilkimiliye? ‘Ye tene kongi sipisipi pape paono monjilke kinie, te talopa lelkanje, yuni sipisipi po paono tene kelepa nani wema ma pangine molangi mundupe kelepa pupe, talopa lelka sipisipimu kanopa limbendo korolipe na pulke.’ konopu lekemeleye? <sup>13</sup>Nane enendo paa sike nimbu sikirumu: Sipisipi talopa lelka kanumu kanopa lipelie kanu sipisipimu kinie paa olandopa konopu silke. Talopa na lemlekama we konopu silke. <sup>14</sup>Aku sipela enenga Lapa mulu koleana molemomone i ambolango kangama „mele molemele yamboma‘aulke lou lelko molko kenjingí kinie paa keri.’ nimbe molemola.” „nirimu..”

<sup>15</sup> „Na lombili andolimenga“ angenu tene nu tepa kenjimu liemo nu puku tepa kenjimbe yambomo pea eltelté molangili kanu ulu pulu kerimu yuni nu temba mele ningu sieni. Nuni nini ungumu tepa kenjimbe angena pilimu liemo angena kinie elte altoko kapola kapola molongele. <sup>16</sup>Nakolo nuni nini ungumu yu na pilimu liemo pe nuni ‘I ungumu pora nipili kene tembo mele yambo mare kanoko molangi altopo niembo.’ ningulie, kanonge yambo talo molo yepoko liku angena molombana mengo ongo ene kanoko molangi angenando ‘Teluna molambil.’ altoko nieni. Kanu kinie nuni teni kinie angenane temba mele kanu yambomane kanokolie yambo lupemando manda temane toko singí. <sup>17</sup>Kanu kinie yuni enenga ungumu kepe na pilimu liemo Kirasinge yambo talapemondo puku ningu sieni. Pe Kirasinge yambo talapemo kepe angenane na pilimu liemo ‘Yu olionga angenu molo. Yu ulsukundu molko konopu alowa na teli yamboma mele molemo lemo.’ ningu kanayo.

<sup>18</sup> “Nane enendo paa sike nimbu sikirumu: Ya mana enene „uluma kinie yamboma kinie“ “Molo.” ningí kinie Pulu Yemone mulu koleana sukundu

“Molo.” nimbéla; enene mana “Kapola.” ningíme Pulu Yemone mulu koleana sukundu “Kapola.” nimbéla.

<sup>19</sup>“Akumunge<sub>1</sub> nane enendo ungu te pea nimbu sikirumu: Enenga yambo talone ya mana “I sипу mawa teambili.” ningu panjíngili liemo eltene mawa tengèle mele mulu koleana molemo Tarane eltenga mawa tengèle mele aku sipe tenjimbe. <sup>20</sup>Yambo <sub>wallotolo</sub>,<sub>2</sub> talo molo yepoko, na enenga Ailimu imbi lelko walsiku, ‘Pea tapu topo molemolo.’ konopu lelko maku toko molemelemanga na ene kinie molemolona <sub>mawa</sub> tengèle mele Tara yuni aku sipe tenjimbemo.<sub>3</sub>” nirimu.

<sup>21</sup>Yesusini yambo teko kenjilimelemando ungu mane aku sipe sirimu, kinie yu molorumuna Pita nondopa ombalie yu walsipe pilipelie nimbendo: “Ailimu, nanga angenu tene na wale nambepe tepe kenjimbe kinie na we ‘Manie pupili.’ nimbu siye kolomboye? Wale sepene yuni temba mele siye kolopo we molopolie engaki sipemonga ‘Pundu topili.’ nimbú kinie papuye?” nirimu.

<sup>22</sup>Yesusini pundu topa nimbendo: “Nane “Wale sepene mindi yuni nu tepe kenjimbe kinie yuni tembama siye kolko altoko pilku na moloi.” ni na nikiru. “Wale sepene anderete sependi sepene yuni nu tepe kenjimbe walema pali yu tepili, siye kolko we moloi.” nikiru.

<sup>23</sup>“Akumunge Pulu Yemo ye nomi kingimu molopa melema nokolemo akumu i sipe mele:

“Walse ye nomi kingi tene yunge kongono nokonjiringi kendemandema kinie pundu angilirimuma ‘Kinié mimi sипу kanopolie pundu tangi.’ niembo.” nirimu. <sup>24</sup>Aku sipe nirimu kinie kingimuni kou tene milliene kina mele ou pundu angilirimu ye te kumbi lelko yu molorumuna mengo oringi. <sup>25</sup>Nakolo yu manda aku kou pundumu tomba aulke te paa na lerimuna ailimuni nimbendo: “Kapola, i yemo kinie yunge ambo ambolangoma kinie yunge melema pali kinie makete teko kou mone likulie koumu ongo pundu tonjengi.” nirimu.

<sup>26</sup>Aku nirimuna pilipelie kendemandemo ye nomimunge kumbikerena koporongo langopa tamalu pepa mawa tepalie nimbendo: “Nuni na kondo kolko we nokoko moloyo. Nane pundu pali tombo.” nirimu.

<sup>27</sup>Kanu kinie<sub>1</sub> ye nomimuni yunge kendemandemo paa kondo kolopa yu kendemandemo kinie pundu angilirimuma pali “Yu tepili. Altoko pundu na tani.” nimbe kamu siye kolopa yemo ka na sipe “We pui.” nirimu.

<sup>28</sup>Nakolo <sub>ka singí teringi</sub><sub>2</sub> kendemande kanumu yu pena pupe kendemande te yunge kou wane anderete kina mele sirimumu kanopolie, yu pupe yunge nomine ambolopa ‘Yu kolopili.’ nimbe ambolopa elkele lakurupelie “Nanga kou sirindumu pundu toi!” nirimu.

<sup>29</sup>Aku terimu kinie yuni tomba terimu yemo yunge kumbikerena koporongo langopa tamalu pepa mawa tepalie nimbendo: “Nuni na kondo kolko we nokoko moloyo. Nane pundu pali tombo.” nirimu.

<sup>30</sup>Nakolo kendemande lupemone “Molo, paa isili pundu tani.” nimbelie “Nu ka ulkena pekolie pundu toko pora siku wendo wani.” nimbe yu ka sipe ka ulkena panjirimu.

<sup>31</sup>Yuni aku terimu mele kendemande wemane kanokolie ene konopu keri panjiku puku enenga ye nomimundu kendemandetolo teringili kanoringi mele kondi toringi.

<sup>32</sup>Kanu kinie ye nomimuniaku niringi pilipelie kendemandeyunge pundu “Naa toko we pui.” nirimu kendemandekanumu “Yando oi.” nimbelie yundu nimbendo: “Kendemandekerimu, nuni na tondolo munduku mawa tenuna nu na kinie pundu paa aili tepe angilirimumu “Yu tepili, na toi.” nimbule we siye kolondu kanumu. <sup>33</sup>Pe nane nu we kondo kolondu mele nuniaku siku kendemande te nambemuna kondo na kolonuye?” nirimu.

<sup>34</sup>Ye nomimuni yu mumindili kolopalie ka ulke nokoko ka ulkena peringiyamboma teko mindili konjiringi yema yu lipe sirimu. Yuni nimbendo: “Nu mindili nongolie pundu tani. Ou pundu pali toko pora sikulie pe mindi wendo wani. Ou molo.” nirimu.” <sup>1</sup>nimbe Yesusini nirimu..

<sup>35</sup>Yesusi yuniaku nimbelie ungu ikumunge pulumu kamu nimbendo: “Aku sipela, angenalini eneaku siku teko kenjingíkinie ene kerena mindi “Manie pupili. Siye kolkoro.” we ningu, sike munduku na kelko, we konopuni pilku molongi liemo, kendemandemonga ye nomimuni kendemandemo tepe kenjirimumele, mulu koleana molemo Tarane siye na kolko we konopuni pilku molonge yambo kanuma enenga ulu pulu kerime ‘Manie na pupili.’ nimbe, we siye na kolopa kanuulu pulu kerimenga “Mindili nangi.” nimbeaku tembala.” nirimu.

**19** <sup>1</sup>Yesusiniaku sipe unguma nimbe pora sipelie nirimununi, kolea Gallilli disiriki mundupe kelepa kolea Judia disiriki pupe no Jodane lumbilipe nekendo purumu. <sup>2</sup>Kanu kinie yambo aisili yulombili oringikinie yuni kuru torumu yamboma tepe konde lirimu.

<sup>3</sup>Parisi ye mare yu molorumunaongo ‘Yu nambolka nimbenje? Nimbe kenjimbenje manda manjipu piliemili.’ ningyu yu walsiku pilkulie ningindu: “Ye tene yu yuyu pilipelie yunge ambomo “Kamu pui.” nimbe kiniekapola temba moloaku temba kinie ungu mane te puluetombaye?” niringi.

<sup>4</sup>Yuni anju pundutopa nimbendo: “Pulu Yemone ungu nirimu yunge bokuna molemo melekanokokambu na tongiye?

Ou pulu pulu, Pulu Yemone melema tepalie,  
yuni yambo tembando  
yemo kinie ambomo kinie tepalie

<sup>5</sup>nimbendo:

“Aku sипu tendumunge ye tene ambo te lipelie  
yunge anumu lapatolo mundupe kelepa

yunge ambomo kinie eltelte teluna tapu toko peko  
 kangi telumu mele „molkolo  
 eltenga konopu teluna pupili, molongele.”

nirimu kanumu na pilíngiye? <sup>6</sup>Pulu Yemone aku sipe nirimuna ye te ambo te limo kinie kangi telumu mele molembelena elte altoko talo mele na molembele, elte yambo telumu mele molembele. Yambo telumu molembele kene Pulu Yemone ambo ye talo ‘Telumu molangili.’ nilimo ambo yetolo yambo tene liku lupe lupe na mundengi. Aku tengi liemo kapola na temba.” nirimu.

<sup>7</sup>Aku sipe nirimu kinie enene ningindu: “Aku liemo Mosisini ungu mane te sirimu mele nambemuna sirimuye? Mosisini nimbendo:

“Ye tene yunge ambomondo  
 ‘Kamu pupili.’ nimbe makorombando  
 ambomo ‘Kamu pui.’ nimbé mele  
 pepá te topa ambomo sipelie  
 yundu ‘Kamu pui.’ nimbe aku tepili.”

nirimu kanumu.” niringi.

<sup>8</sup>Yesusini nimbendo: “Mosisini sike aku sipe nirimu nakolo ene kara puku Pulu Yemone ambo yetolo kapola kapola molongele mele ungu mane sirimumu liku su siku na piliringine yuni “Aku teangi.” nirimu. Nakolo ou pulu pulu, <sup>9</sup>Pulu Yemone melema kokele tepa mimi terimu kinie, ungu mane aku sipe te na perimu kene <sup>9</sup>nane ene i sипу nimbu sikiru: Ye tene yunge ou limo ambomo makoropa “Kamu pui.” nimbeline kelepa ambo te limo kinie aku yemone wa ulu kerinele telemo. Yemonga ambomone ye te kinie wa ulu kerinele temu liemo manda topa makoromba. We molo. (“Pui.” nimbe makorolemo ambomo pe ye tene yu limo kinie kanu yemo kepe wa ulu kerinele telemola.)” nikiru.” nirimu.

<sup>10</sup>Yuni aku nirimu kinie pilkulie, yu lombili andoli yemane yundu ningindu: “Ye tene ambo limo kinie nuni nikinu mele aku siku molongele mele ungu mane te pelemo liemo ye te ambo na lilkenje papu.” niringi.

<sup>11</sup>Nakolo Yesusini pundu topa nimbendo: “I ungu „mane sikirumu, yambomane pali manda na pilku lingí. <sup>12</sup>Pulu Yemone, mako topa tondoloma simbe yamboma mindi manda „amboma ye na puku yema ambo na liku, tengé.

<sup>12</sup>Ye mare anupilini melemele kinie amboma kinie teluna tapu toko peko ulu kerime tengé enge te na pelemo. Ye mare ‘Amboma kinie teluna na peangi.’ ningu enenga láka tonjilimele. Marene eneno ‘Ye nomi kingi Pulu Yemonga yema molopo yunge kongonoma manjipu tenjemili.’ ningu ene eneno mi lelko ambo na limele. I ungumu yambo pilku lingí yamboma piliengi!” nirimu.

<sup>13</sup>Kanu kinie yambomane enenga ambolangoma ‘Yesusi yunge kimuni ambolopa Pulu Yemo kinie enenga mawa tenjipili.’ ningu yu molorumuna mengo oringi. Nakolo yu lombili andolimene iri toko “Naa mengo wai.” niringi.

<sup>14</sup> „Molo.” niringi kinie, kanopalie Yesusini nimbendo: “Pulu Yemo ye nomi kingimu molopa nokolemo yambo talape akumu i ambolangoma mele molemele yamboma enenga yambo talapemo kene enene i ambolangoma na moliona wangi pipi siku “Molo.” na niei.” nirimu. <sup>15</sup> Aku nimbelie yuni ambolangoma „kondo kolopa” yunge kimuni ene telu telu nimbe ambolopalie kanu koleana mundupe kelepa purumu.

<sup>16</sup> Walse ye te Yesusi molorumuna omba yundu walsipe pilipelie nimbendo: “Ungu Mane Silimu, na nambolka ulu peangamo tembo kinie konde molopa konjipe mindi puli ulu pulumu limbuye?” nirimu.

<sup>17</sup> Yesusini yundu nimbendo: “Nuni na nambemuna ulu peangamondo walsiku pilkinuye? Yambo telu mindi peanga molemo. Nuni ‘konde molopo konjipu mindi puli ulu pulumu limbu.’ konopu lenu liemo „Pulu Yemonga, ungu mane „Mosisini yando nimbe sirimuna, tenge panjiku teko molani.” nirimu.

<sup>18</sup> Yemone walsipelie nimbendo: “Aku ungu manemanga temando nikinuye?” nimbe walsirimu kinie

Yesusini pundu topa nimbendo:

““Yambo toko na konjengi.” nimbe,

“Ambo ye pulime molo

ye ambo lilime yambo lupema kinie

wa ulu kerinele na teangi.” nimbe,

“Melema wa na liengi.” nimbe,

“Yambomanga kote

colo toko na tenjengi.” nimbe,

<sup>19</sup> “Aminieli lanieli kinie teko konjiku,

ungu ningí mele pilku liku teko molangi.”

nimbe,

“Ene eneno yu mele mele konopu monjiku

enenga kangimu eneno

kondo kolko nokolemele mele

aku sikula pulu lemo yamboma

konopu monjiku nokoko molangi.” nimbe,

ungu mane akuma sirimu pelemo kanumu.” nirimu.

<sup>20</sup> Aku nirimu kinie pilipelie kanu kango yemone nimbendo: “Na kanu ungu manema pali pilipu lipu tepo molio. Pe kinié nambolka uluri olandopa teamboy?” nimbe walsirimu.

<sup>21</sup> Yesusini yundu pundu topa nimbendo: “Nu ‘kamu ye sumbi nilimu molambo.’ konopu lenu liemo nu puku nunge mele nosilinoma pali kou mone lipukulie, kou mone linime yambo koropama moke teko sikulie na lombili oi.” nirimu. “Nunge „mana” melema aku teni kinie mulu koleana nunge mele aisili lemba.” nirimu.

<sup>22</sup> Kanu kango yemo mele paa aisili nosirimuna Yesusini yundu aku nirimu kinie pilipelie yu konopu keri panjilipe anju purumu.

<sup>23</sup> „Aku terimuna kanopalie, Yesusini yu lombili andolimendo nimbendo: “Pulu Yemo ye nomi kingi molopa nokolemo koleana suku pungindu yambo kamakoma paa mindili siku suku pungí. <sup>24</sup> Enendo altopo nikiru: Kongi kemele „kongi paa aili te nakolo“ kale suru tolina suku pumbendo mindili kanga mele sipelie pumbe. Nakolo yambo kamakoma Pulu Yemo ye nomi kingi molopa nokolemo koleana suku pungindu mindili paa aili mele siku pungí.” nirimu.

<sup>25</sup> Aku nirimu kinie pilkulie yu lombili andolime paa mini wale munduku suru ningulie anju yando ungu mele tekolie ningindu: “Aku liemo mindili nolemelka aulkena nae manda wendo pupe, molopo konjimulu aulkena pumbeye? Te molonje.” niringi.

<sup>26</sup> Yesusini ene nemo nemo nimbe kanopalie nimbendo: “Sike yamboma eneno manda molo nakolo Pulu Yemone manda tenjimbe. Pulu Yemo yuni uluma pali kapola telemo. Ulu te yuni manda na temba te molo.” nirimu.

<sup>27</sup> Yuni aku nirimu kinie pilipelie Pitane yundu nimbendo: “Pe olio kinie nambolka uluri wendo ombáye? Olio olionga melema pali mundupu kelepo nu lombili purumulu pulimolo kene mele nambolka melema limulúye?” nirimu.

<sup>28</sup> Yesusini nimbendo: “Nane enendo paa sike nimbu sikirumu: Pe „Pulu Yemone“ melema pali ‘conde pupili.’ nimbé kinie Manie Omba Mana Ye Au Lerimu Yemo yunge ye nomi kingi polo pa tondolo teline molopa yamboma nokomba kinie, ene na lombili andolemele yema pea ye nomi kingi polo rureponga molkolie ningímini, Isirele yambo talape rurepo nokonge. <sup>29</sup> Yambo na konopu monjiku nanga kongono tenjingindu enenga ulkema, angenupili, kemulupili, anupili, lapali, ambolangoma, koleama, akuma munduku keleringi yamboma pali, ya mana paa olandopa mele aisili likulie, konde molko konjiku mindi puli ulu pulumu lingíla. <sup>30</sup> Nakolo kinié aili molemele yambomanga aisili pe „Pulu Yemo ye nomi kingi molopa nokomba koleana, yambo koropama molonge; kinié koropa pupili molemele yamboma pe yambo ailime molonge.“ nimbe Yesusini nirimu.

**20** Yesusini yu lombili andolimendo ungu te pea nimbendo:

<sup>1</sup> “Aku nikiru ungumunge „ungu te niembo:“ Pulu Yemone ye nomi kingimu molopa yamboma nokolemo akumu i sipe mele:

“Walise ponie pulu ye tene ‘Kongono tenjili ye mare yunge unju waene poniena kongono tenjengi.’ nimbe paa ipulueli ou pupe lipurumu.

<sup>2</sup> “Kongono teangi.” nimbe lirimu yemando nimbendo: “Kinié tengé walemonga ene kou mone pape kina pape kina nimbu mele kalombo.” nirimu kinie

enene “Kapola.” niringi kinie

yuni ene yunge unju waene poniena “Kongono teangi pai.” nimbe ene lipé mundurumu.

<sup>3</sup>Pe, ipulueli ou nani killoko mele terimu kinie, yu kelepa yamboma maku toringi koleana pupe ye mare akuna we angiliringi kanopalie <sup>4</sup>enendo nimbendo: “Ene kepe nanga unju waene ponieno kongono tenjengi payo. Pe nane ene kou kapola mele kalombo.” nirimu <sup>5</sup>kinie ene puringi.

Pe ai tangoli terimu kinie kepe, ipupini tere killoko mele terimu kinie kepe, kelepa aku sipe pupe ye mare pea lirimula.

<sup>6</sup>Ipupini pape killoko mele terimu kinie altopa pupe ye mare we angiliringi kanopalie enendo nimbendo: “Walemonga pali kongono na teko ya inie nambemuna we angilimeleye?” nirimu.

<sup>7</sup>Enene yundu ningindu: “Ye tene olio kongonona na limuna we angilimolo.” niringi.

Yuni enendo nimbendo: “Ene kepe nanga unju waene ponieno kongono tenjipai.” nirimu.

<sup>8</sup>Ena pora nirimu kinie unju waene ponie pulu yemone yunge kongono nokoli yemondo nimbendo: “Kongono tekemele yema ‘sukundu wai.’ ningu ene kongono tengimunge mele kalonindu paa akilku ongi yema pulu monjiku mele kaloliku puku kumbi lelko ongi yema paa akilku mele kaloi.” nirimu. <sup>9</sup>Aku nirimu kinie ipupini pape killoko mele terimu kinie “Kongono tenjengi.” nimbe lirimu yema kumbi lelko, ongo pape kina pape kina nimbe sirimu liringi. <sup>10</sup>Akilku ongo kongono tenjiringi yema kou aku siku liringi kanokolie kumbi lelko ongo kongono tenjiringi yema ongolie ‘Olio kou olandopa mele limulú.’ konopu leringi nakolo ene pape kina pape kina nimbe sirimu liringila.

<sup>11</sup>Likulie enene ponie pulu yemondo iri tokolie ningindu: <sup>12</sup>“Akilku ongi yema ena telu manjiku kongono tengi, olio ipulueli ou ombo kongono aili tepo temulu, ena aili tomumuni olio paa nomu kanumu, nakolo ene kinie olio kinie kou kapola kapola teko sakinumu, kapola na tekemo.” niringi.

<sup>13</sup>Yuni enenga ye tendo pundu topa nimbendo: “Kangomo, nane nu tepo na kenjikiru. “Pape kina simbu.” nindu kinie “Kapola.” ninu kanumu. <sup>14</sup>Kou sikirumu liku mengo puyo. Nanga konopuni mindi pilipulie akilipe omu yemo nu sikiru mele yu aku sipu sindu. <sup>15</sup>Nanga nosilio melemanga konopuni pilipulie manda na temboye? Molo pe ongi yema kou aili tepo sindumunge nu konopu keri panjikinuye?” nirimu.” nimbe Yesusini nirimu.

<sup>16</sup>Ungu iku akumu topa pora sipelie ungu ikumunge pulumu kamu nimbendo: “Aku sipela, akilku onge yamboma Pulu Yemone nokolemo talapena sukundu, kumbi lelko pungí; kumbi lelko onge yamboma akilku pungí.” nirimu.

<sup>17</sup>Kanu kinie Yesusi kolea aili Jerusalleme pumbe purumu kinie yu lombili andoli engaki rurepo ‘na kinie ene kinie oliolio molamili.’ nimbe ene lipe anju memba pupelie enendo nimbendo:

<sup>18</sup> “Pilieme! Olio Jerusalleme pumulú pukumulu. Akuna pumulú kinie Manie Ombo Mana Ye Au Lerimu Yemo ye tene ‘Tangi.’ nimbe Pulu Yemo popo tonjili ye ailime kinie, Pulu Yemonga ungu manemanga puluma pilku mane silimele yema kinie, lipe simbe, enene yu kote tenjiku ‘Yu kolopili tangi.’ ningulie <sup>19</sup> Juda ye na molemele yema liku singí. Kanu kinie kanu yemane yu ungu taka tonjiku, ka pulsene toko, ‘Yu kolopili.’ ningu unju perana uku toko panjingí. Kolopalie wale yepoko sipemonga Pulu Yemone yundu ‘Lomboroko ola moloi.’ nimbé.” nirimu.

<sup>20</sup> Kanu kinie Seperi malo Jemisi kinie Jonotolonga anumu Yesusi molorumuna ombo koropongo langopa yundu “‘Nu ulu te teani.’ nimbu mawa tembo okoro.” nirimu kinie

<sup>21</sup> yuni yundu nimbendo: “Nambolka uluri ‘nane tenjembo.’ ningu nikanuye?” nirimu.

Ambomone nimbendo: “Nu pe ye nomi kingimu moloni kinie i nanga kango talo ‘elite nu kinie pea ye nomime molamili.’ ningu ‘eltenga te nunge ki umbukundu monjiku te nunge ki tarokondo monjeni.’ nimbu mawa tekero.” nirimu.

<sup>22</sup> Yesusini enendo nimbendo: “Mawa tekemele mele ene pilku na konjikimili. Na no mingine no nondopo nombomo elite manda nongeleye?” nirimu kinie

eltene “Manda nombolo.” niringili.

<sup>23</sup> Yuni eltendo nimbendo: “Na no mingine no nombomo pe elite paa sike nongele nakolo nane elite “Nanga wangutolonga ongo molangili.” nimbumu kapola na temba. Tarane yuyu akuna molongeletolo koronga mako torumu.” nirimu.

<sup>24</sup> Angenungulu Jemisi kinie Jonotolone ‘Yesusinge wangutolonga molambili.’ ningu mawa teringili mele pilkulie lombili andoli ye rureponga talo wemane elite kinie konopu keri panjiringi.

<sup>25</sup> Kanu kinie Yesusini ene “Wai.” nimbeline nirimumuni, enendo nimbendo: “Olio Juda yambomanga ulsu molemele yambo talapemanga ye nomime enenga yamboma tondolo munduku nokoko kongono enge nilime alieli silimele. Ye imbi ola molemo yema enenga yamboma ‘Mindili nangi.’ ningu nokolemele. Yambomane enenga ye nomimenga unguma liku su singí aulke te na lemo. Aku siku telememe mele enene pilimele kanumu. <sup>26</sup> Nakolo we yambomanga ye nomimene enenga yamboma tondolo munduku nokolemele mele na lombili andoli yema, ene enenoaku siku anju yando na teangi. Enenga ye te ‘Na imbi olandopa molopili. Na ye ailimu molambo.’ nimbé yemo enenga kongono tenjili yemo molopili. <sup>27</sup> ‘Na enenga ye nomimu molopo ene nokambo.’ nimbé yemo enenga kongono kendemande tenjili yemo molopili. <sup>28</sup> Aku sipela, Manie Ombo Mana Ye Au Lerimu Yemo kepe ‘Yambomanga ye ailimu molopo ene nokambo. Enene nanga kongono tenjili kendemande

yamboma molangi.' nimbe na orumu. 'Yambomanga kongono tenjili kendemande yemo molopo ene lipu taponjipu, ulu pulu kerimene ene ka sipe nokolemo mele na tepili kapola molangi kene na yambo aisilinge nimbu pundu tonjipu nanga kangimu sipu, enenga kolo wangopo kolonjembo.' nimbe orumu." nirimu.

<sup>29</sup> Yesusi kinie yu lombili andolime kinie ene kolea aili Jeriko munduku kelko pungí puringi kinie we yambo aisili yu lombili puringi. <sup>30</sup> Kanu kinie mongo keri lerimu ye talo aulke alselsena molkolo Yesusi ombar purumu mele pilkululie yundu tondolo ru ningu walsikulie ningilindu: "Ailimu, <sup>ye nomi kingi</sup> Depisini kalopa lirimu yemo, olto kondo koloi." niringili.

<sup>31</sup> Yambomane elte iri toko "Ungu na nili taka lelko molale." niringili.

Nakolo eltene paa tondolo ru ningu walsikululie ningilindu: "Ailimu, Depisini kalopa lirimu yemo, olto kondo koloi." niringili.

<sup>32</sup> Yesusi we angilipelie "Elte wale." nimbelie eltendo nimbendo: "Nane elte nambe teambo konopu lekembeleye?" nirimu kinie

<sup>33</sup> mongo keri lerimu yetolone ningilindu: "Ailimu, 'oltonga mongotolo 'Altopa umbu mongo angilipili.' nieni.' konopu lekembolo." niringili.

<sup>34</sup> Kanu kinie Yesusini elte kondo kolopa mongona ambolorumu kinie elte tamburembu mongoma peanga lerimu, melema kanokololie, Yesusi lombili puringili.

**21** <sup>1</sup>[Yesusi kinie yu lombili andolime kinie] ene kolea aili Jerusalleme nondoko ongo, ma pangit te 'Ma Pangi Unju Ollipi Ponie' nili akuna lemo kolea kanga Betepasi oringi. Kanu kinie Yesusini yu lombili andoli ye talo lipe mundupelie, <sup>2</sup> eltendo nimbendo: "Ne kolea kanga kanokombelena pukululie kongi dongi te ka teko panjingímu kinie yunge walomo pea ne sukundu molongele kanongele, kanutolo puku posiku yando mengo wangili pale. <sup>3</sup> Posingilí teko molongele kinie yambo tene eltendo ungu te nimu liemo eltene i siku niengili: "Ailimu yu 'Dongimuni mepili.' nimuna ombo likimbulu." niengili. Aku ningilí kinie yuni sumbi sipe "Kapola, mengo pale." nimbé." nirimu.

<sup>4</sup> Aku sipe wendo orumumunge koronga ou Pulu Yemone ungu umbu tonjirimuma pilipe yamboma nimbe sirimu ye tene ulu te pe wendo ombá ou nirimu mele kamu wendo orumu. Akumu i sipe:

<sup>5</sup> "Enene kolea aili Sayono yambomando

i siku niengi: "Kanayo!

Ene molemelena enenga ye nomi kingimu okomo.

Yu ye imbi na mololi yemo mele

taka lepa molemomo

kongi dongi bulu mingine molopa okomo.

Kongi dongi tengateng walomonga bulu mingine

molopa okomo." ningu, ningu siei."

nirimu kanumu. „Aku nirimu mele Yesusi terimu.“

<sup>6</sup>Kanu kinie lombili andolitolo pukulu Yesusini “Tepale.” nirimu mele teputuringili. <sup>7</sup>Eltene kongi dongimu kinie yunge walomo kinie mengo ongololie, enene enenga mulu wambalema kulku dongitolonga bulu mingine ola pauwe toringi kinie Yesusi kanuna ola molorumu. <sup>8</sup>Yambo maku toringimenga aisilini enenga mulu wambalema kulku yu ombá aulkena pauwe toliku puku, marene kipiyala gomo langoko liku yu ombá aulkena pauwe toliku puringi. <sup>9</sup>Kumbi lelko puringi yambomane kepe akilku oringi yambomane kepe naka lelko unju ambololiku pukulie ningindu:

“Ye Nomi Kingi, Depisini Kalopa Lirimu Yemo

‘Imbi ola molopili.’ niemili.

Pulu Ye Yawene lipé mundurumuna

yunge kongonomo tenjimbe okomo yemo  
molopa konjipili.

Mulu koleana ola yu imbi ola molopili.”

niliku puringi.

<sup>10</sup>Yesusi Jerusalleme suku purumu kinie kanu kolea ailmunge sukundu moloringi yamboma pali konopu aisili liku mundukulie “Imu naeye?” niringi.

<sup>11</sup>Maku toko moloringi yambomane ningindu: “Imu Pulu Yemone ungu umbu tonjilimoma pilipe yamboma nimbe silimo ye Yesusi, kolea Gallilli disiriki Nasarete taono ye te.” niringi.

<sup>12</sup>Yesusi „Jerusalleme suku pupelie nirimumuni“ Pulu Yemo popo toko kaloringi ulke tembelena „Juda yambo na molemele yamboma ‘Pulu Yemo popo tamili.’ ningu maku tolemele kolea“ niringi akuna, suku pupe kanopalie akuna melema makete teko moloringi yamboma kinie, melema topo toko liku moloringi yamboma kinie akuma kanopalie ene pali topa makoropa, kou mone lupe lupema alowa teko anju siringi yambomanga poloma kinie, kera waembono makete teringi yambomanga manie moloringi poloma kinie, topele topa, topa bulu balu sipelie, <sup>13</sup>enendo nimbendo: “Pulu Yemonga bokuna ungu te i sipe nilimo:

‘Yambomane nanga ulkemondo

“Pulu Yemo kinie ungu nilimolo ulkemo.” ningí’

kanumu. Unku aku sipe molemo nakolo enene i ulkemo

‘wa nolemele yamboma lopi teko molemele ulkemo’ mele  
ningu pilkulie aku siku telemele.” nirimu.

<sup>14</sup>Kanu kinie Yesusi ulke tembelena molopili yambo mongo keri lepa, kimbu ki keri lerimu yambo aisili yu molorumuna oringi kinie yuni ene tepa konde lirimu. <sup>15</sup>Nakolo yuni we yambo tene manda na telka ulu tondolo peangama terimu mele kinie, ulke tembelena ambolangomane tondolo ru ningulie:

“Ye Nomi Kingi Depisini Kalopa Lirimu Yemo  
‘Imbi ola molopili.’ niemili.”

niringi mele kinie, kanu ulutolo wendo orumu mele kanokolie Pulu Yemo popo tonjiringi ye ailime kinie Pulu Yemonga ungu manemanga puluma pilku mane siringi yema kinie enene konopu keri panjikulie 16 Yesusi walsikulie: “Andi ambolangomane ungu nikimili mele nu naa, pilkinuye?” niringi.

Nakolo Yesusini enendo nimbendo: “Na pilkiru. Andi ambolangomane tekemele mele ungu te bokuna molemo mele ene na kanolemeleye? Kanumu i sipe molemo:

‘Ambolango kangama kinie ambolango pamema kinie  
Pulu Yemo nu paa kapi ningí mele  
mane sirinu.’

aku ungumu bokuna molemo mele ene na kanolemeleye?” nirimu.

17 Aku nimbeline yu kanu yema mundupe kelepa kolea aili Jerusalleme, ulsukundu pupe kolea kanga Betani pupe akuna perimu.

18 Ipulueli ou Jerusalleme nondopa lerimu kolea Betani mundupe kelepa Yesusi, kelepa kolea aili Jerusalleme, pumbe purumu kinie yu engele terimu. 19 Kanu kinie yu orumu aulke kélona unju piki te angilirimu kanopalie nondopa pupe kanorumu kinie unju mongo te topa na perimu, gomo mindi terimu kanorumu. Gomo mindi terimuna, kanopalie “Nu altoko mongo te na tani.” nirimu kinie unju piki kanumu walsikale kolorumu.

20 Aku ulumu wendo orumu kinie kanokolie yu lombili andolimene paa mini wale mundukulie ningindu: “I unju pikimu nambe tepalie walsikale kolomuye?” ningu walsiringi.

21 Yesusini pundu topa nimbendo: “Nane enendo paa sike nimbu sikirumu: Ene konopu talo tepa na pepili Pulu Yemone nanga ungumu sike pilimbemonga nimbü mele ‘paa sike wendo ombá.’ ningu, tondolo munduku pilíngi liemo nane i unju pikimu tendu mele manda tengé. Unjuma mindi molola. Ne ma pangimundu “Ungú toko nomu kusana sukundu pui.” ningí kinie pumbela. 22 ‘Olio Pulu Yemone paa sike lipé taponjimbemonga ‘Teamili.’ nimulú mele sike manda aku sipu temolo.’ molo ‘Nimulú kinie sike aku sipe wendo ombá.’ ningu, tondolo munduku pilkulie Pulu Yemo kinie, ungu ningu mawa tengé mele pali Pulu Yemone sike tenjimbemonga kanu uluma sike wendo ombá.” nirimu.

23 Kanu kinie Yesusi kamu Jerusalleme omba ulke tembele kerepuluna omba, yamboma ungu mane sipe molorumu kinie ye mare, Pulu Yemo popo tonjiringi ye ailime kinie, Juda yambomanga tapu yema kinie ene ongo yu walsiku pilkulie ningindu: “Nu namba nambolka nambamo likulie i kongonomo telenoye? Naene i kongonomo ‘Tepui.’ nimbe nu nambamo sipe lipé mundurumuye?” niringi.

<sup>24</sup> Yesusini enendo pundu topa nimbendo: “Nane ene ungu te walsipu piliembola. Pe nane ene walsimbu mele enene na sumbi siku pundu toko níngi liemo ‘Na i kongonomo teambo.’ nimbe namba sirimumunge pulumu ene nimbu simbula. <sup>25</sup> [Nane i sипу ене walsipu pilkiru:] Ou [No Linjili] Jono ombo yamboma no linjirimu kinie yu mulu koleana molemo yemonga kongonomo tenjimbendo yamboma no linjirimu molo ya mana yambomanga kongonomo tenjimbendo yamboma no linjirimuye? [Naene “Tei.” nirimuna terimuye? Ningu siei.]” nirimu.

[Yuni aku sipe walsirimu mele pilkulie] enene eneno kerepali ningulie ningindu: “Yuni walsikimu mele olione pundu topo, [Jono] yu mulu koleana [molemo yemonga kongono tenjimbendo yamboma no linjirimu],” nímulu liemo yuni oliondo nimbendo: ‘Aku liemo ene Jonone nirimu ungumu nambemuna ‘I ungumu sike.’ ningu na pilku liringiye?’ nimbé. <sup>26</sup> Molo olione nimulundi: ‘Yu mana yambomanga [kongono tenjimbendo yamboma no linjirimu],’ nímulu liemo we yambomane ‘olio tongenje’ nimbu pipili kolkomolo. We yambomane [No Linjili Jono, yu paa sike Pulu Yemone ungu umbu tonjirimuma pilipe yamboma nimbe sirimu ye te molorumu.] ningu pilimele kene olio nambe temolonje?” ningu eneno aku siku kerepali niringi.

<sup>27</sup> Enenoaku siku anju yando kerepali ningulie, Yesusindu pundu toko ningindu: “[Nuni walsikinu mele] olio na pilkimulu.” niringi.

Aku siku niringi kinie pilipelie Yesusini enendo nimbendo: “Kapola. [Nane ene walsikiru ungumunge ungu te pundu toko na nikimilimunge] enene na walsikimili ungumunge ungu te pundu topo nando i kongonomo ‘Tepui.’ nimbe na lipe mundupe namba sirimu yemonga imbimu ene na nimbu simbula.” [nirimu.]

<sup>28</sup> Yesusini kelepa kanu Juda yambomanga ye ailimendo nimbendo: “Ene nambolka konopu lekemeleye? Ye te yunge kango talo moloringili. Yu pupe kango komomondo nimbendo: “Kangomo, kinié nu unju waene ponienapuku kongono tepui.” nirimu.

<sup>29</sup> “Yuni pundu topa lapando “Molo, na na pumbu.” nirimu, nakolo pe yu konopu alowa tepalie purumu.

<sup>30</sup> “Lapa pupe komomondo nirimu mele aku sipe akiliomondo nirimu kinie, yuni pundu topa “Tepumbu.” nirimu, nakolo na purumu.

<sup>31</sup> “Kanu kangotolonga naene lapanga ungumu pilipe lipe terimuye?” nirimu.

Enene pundu toko “Komomo.” niringi.

Yesusini enendo nimbendo: “Nane enendo paa sike nimbu sikirumu: Ene [Juda yambomanga ye ailime] Pulu Yemo ye nomi kingimu molopa nokolemo talapena sukundu [kumbi lelko na pungí]. Kou takisi lili yema kinie wapora toli amboma kinie [kanu yamboma, ene Juda yambomanga ye ailimene kanoko keri kanolemelema] kumbi lelko pungí. <sup>32</sup> [No Linjili]

Jono ombo ene sumbi siku molonge aulkemo lipé ora sirimu kinie enene yu nirimumu ‘Kolo tokomo.’ konopu lelko yunge ungumu pilku na liringi nakolo kou takisi lili yema kinie wapora toli amboma kinie yuni nirimu ungumu ‘Sike.’ ningu tondolo munduku piliringi. Nakolo kanu ambo ye kerimene aku teringi kinie kepe kanokolie ‘Konopu alowa tepo ‘Yuni sike nikimu.’ nimbu tondolo mundupu piliemili.’ na niringila. Akumunge kanu ambo ye “Tepo kenjilimolo.” ningu konopu alowa telemelena Pulu Yemo molemona kumbi lelko pungí.” nirimu.

<sup>33</sup> Aku nimbeline Yesusini kanu ye ailimendo altopa nimbendo: “Ungu iku te pea tambo pilieyo.

“Kolea pulu ye tene unju waene ponie tepalie pala terimu. Ponienia sukundu loyekolo akupe waene no ingi tepe monjimbendo tepe mimi tepalie nirimumuni, pe ponie nokonge ulke takaye te polo kulupe ola takorumu. Ye mare kanopa lipelie enendo nimbendo: “Nanga poniemo tapu tenjiku unju mongoma inie toko nokonjengi. Pe waene mongo polo tomba kinie unju mongoma moke tepo, kongono tenjingí mele mare ene liengi mare na liembo.” nimbe kanu poniemo ene sipelie yu kolea paa suluringe pupe molorumu.

<sup>34</sup> Kanu kinie pe waene mongo polo tomba terimu kinie ponie pulu yemone yunge kendemande ye mare “Nanga waene mongo siengi puku liku menjiku wangi pai.” nimbe ponie nokoringi yema moloringine lipé mundurumu. <sup>35</sup> Nakolo kendemande yema orangi kinie ponie nokoli yemane ene ambolko likulie te kopene toko, te toko konjiku, te kouni toringi.

<sup>36</sup> Altopa ponie pulu yemone kendemande ye mare aisili mele lipé “Nanga waene mongo linjipai.” nimbe lipé mundurumu, ou kendemande ye wallotolo mele lipé mundurumu. Nakolo ponie nokoli yemane ou pulu pulu orangi kendemande yema kinie teringi mele pe kendemande orangi yema kinie akula teringi.

<sup>37</sup> Kanu kinie ponie pulu yemo yuni konopuni pilipelie, ‘Nanga kangomo pipili kolko yunge unguma pilku liku, yu waene mongoma singí.’ konopu lepalie yunge malomo lipé mundurumu. <sup>38</sup> Nakolo ponie nokoli yemane ponie pulu yemonga malo ombá orumu kanokolie enene eneno ningindu: “Andi okomo yemo pe lapanga melema limbe yemo okomo. Yu topo konjipu i poniemo olio kamu liemili.” ningulie <sup>39</sup> enene yu ambolko liku ponienia ulsu mundukulie yu toko konjiringi.” nimbe Yesusini nirimu.

<sup>40</sup> Yesusini ungu iku akumu topa pora simbendo kanu Juda yambomanga ye ailimendo walsipelie nimbendo:

“Ponie nokoli yemane aku teringimunge ponie pulu yemo ombalie kanu ponie nokoli yema kinie yuni nambolka uluri temba konopu lekemeleye?” nirimu.

<sup>41</sup> Enene yundu pundu toko ningindu: “Yuni kanu ye kerime ‘kamu molko kenjengi.’ nimbe tepe kenjipelie ponie nokonge ye lupe mare lipe waene mongo polo tomba kinie waene mongoma moke teko, mare ponie pulu yemo singí yema poniemo simbe.” niringi.

<sup>42</sup> Yesusini „Pulu Yemonga Juda yamboma nokoringi yemane yu toko konjingí mele pilipelie, enendo nimbendo: “Pulu Yemonga bokuna sukundu molemo ungu te kanoko na pilimeleye? Aku ungumu i sipe mele:”

“Ulke takoringi yemane

kanoko keri kanoko toko ele teringi kou kanumu

kinié kelepa ulke simu mele

ulke enge sinjili kou aili peangamo.

Ailimuni aku ulumu terimu ollione

kanopo paa peanga kanolemolo.”

nimbe molemo kanumu. <sup>43</sup> Aku „nirimu, munge nane ene „Pulu Yemonga Juda yamboma, nimbu sikirumu: Pulu Yemo enenga ye nomi kingi molopa ene nokolemo mele mundupe kelepalie nimbémone, yambo talape lupe tene yunge ungumu pilku liku teko molongema lipe nokomba.

<sup>44</sup> (I kou „nikiru, munge ola yambo te a topa topalie ombele melema elke tomba. Nakolo yambo te molombana ola koumu omba yu topalie kanu yambomo topa nurupulu tomba.)” nirimu.

<sup>45</sup> Kanu kinie Pulu Yemo popo tonjiringi ye ailime kinie Parisi yema kinie Yesusini ungu iku torumuma pilkulie enene yu tonge teko moloringi mele yuni nirimu pilkulie <sup>46</sup> enene yu ka singí teringi nakolo yambomane ‘Yu Pulu Yemone ungu umbu tonjilimoma pilipe yando nimbe silimo ye te.’ konopu leringine yamboma pipili kolkolie yu isili ou ambolko ka na siringi.

**22** <sup>1</sup> Yesusini kelepa ungu mare „Juda ye ailimendo nimbendo, ungu iku te pea topalie nimbendo:

<sup>2</sup> “Pulu Yemo ye nomi kingimu molopa yamboma nokolemo akumu i sipe mele:

“Ye nomi kingi tene yunge malo ambo limbemonga langi aisili kalonjirimu. <sup>3</sup> Koronga “Ye ambo limbe langi pea namili sukundu wangi.” nirimu yamboma yunge kendemandando “Kinié langi namili wai.” nipai.” nimbe mundurumu, nakolo puku aku siku niringi kinie ene “Naa omolo.” niringi.

<sup>4</sup> Altopa kendemande mare lupe lipe mundupelie nimbendo: “ “Langi pea namili wangi.” nirindu yambomando puku ningindu: “Langi tepe mimi tepe pora simu. Yunge kongi kao peleama kinie kongi kao walo wami telime kinie tomu. Langi pali tepe mimi tepe nosilimo kene ye ambo limbemonga langi pea namili wai.” nipai.” nirimu.

<sup>5</sup> Nakolo puku niringi kinie na pilku siye kolko, te yunge ponieno pupe, te yunge bisinetena pupe, <sup>6</sup> marene kingimunge kendemandema ambolko liku teko kenjikulie toko konjiringi.

<sup>7</sup> „Aku teringimunge, kingimu mumindili kolopalie yunge ami yemando nimbendo: “Ene molemelena puku toko konjiku enenga koleamo tepe lelko topai.” nimbe ene lipa mundurumu kinie pukulie, nirimu mele teringi.

<sup>8</sup> Kanu kinie kingimuni yunge kendemandando nimbendo: “Ye ambo limbemonga langi nosilimolo nakolo “Pea namili wangi.” nirindu yamboma nonge kapola na temba kene <sup>9</sup>ene pukulie aulke lupe lupe lemomanga pali puku yambo kanongema “Ye ambo limbemonga langi pea namili wai.” nipai.” nirimu. <sup>10</sup>Pilkulie kanu kendemandema aulkemanga pali puku yambo kanoringime pali liku maku toringi. Yambo peangama kinie yambo kerime kinie pea liku maku toringi. Kanu kinie ye ambo limbemonga koleana yamboma paa ongo si siku moloringi.

<sup>11</sup>Ongo moloringi kinie kingimu “Yambo maku toko molemelema kanambo.” nimbe ene moloringine ombalie, yamboma ye ambo limbe „makuna ongemonga wale pakoli kamuma ‘pakoko sukundu wangi.’ ningu siringi, wale pakolimenga ye te wale pakoli akumanga te na pakopa molorumu kanopalie <sup>12</sup>yundu nimbendo: “Kangomo, nu ye ambo limbe wale te na pakokono kanokoro kene nu aulke tena sukundu onuye?” nirimu kinie kanu yemone unguri na nirimu.

<sup>13</sup>Kanu kinie kingimuni langi nokoringi kendemandando nimbendo: “I yemo kimbu kime ka tokolie pena kolea sumbulu tokomona toko pena mundei!” nirimu. Akuna yamboma paa mindili nongolie kola teko perek molonge.” „nimbe Yesusini nirimu.

<sup>14</sup> „Aku nimbeline Yesusini ungu ikumunge pulumu kamu nimbendo: „Sike „Pulu Yemone” yambo aisilindu “Wai.” nilimo nakolo yambo wallotolo mindi mako topa “Sukundu wai.” nilimo.” nirimu.

<sup>15</sup> Yesusini aku sipe nirimu, kinie „pilkulie” Parisi yema ulsu puku ene eneno liku maku tokolie ningindu: “‘Yesusini ungu te nimbe kenjipili.’ nimbu nambe teamiliye?” ningu kerepali ningulie niringimuni, <sup>16</sup>ene lombili andolime kinie ye nomi kingi Erotenga talape ye mare kinie liku Yesusi molorumuna liku munduringi, ene puku Yesusindu ningindu:

“Ungu Mane Silimu, olio pilimolo, ‘nuni ungu sikema mindi ningu, Pulu Yemone “Teai.” nilimo uluma paa sike unguma mane siku, nu yambo teluringe kepe konopu kimbu na siku, yamboma pipili na kolko enendo pali ungu telu siku kapola kapola ningu silino.’ konopu lemolo. <sup>17</sup>Aku siku ningu molenomonga nu nambolka konopu lekenoye? Oione Romo Gapomano Ye Paa Aili Kumbine ‘Sisa’ nilimu kou takisi tomulu liemo kapola molo moloye? Pulu Yemone akumundu ungu mane sirimu ungu mane nambolkamo pelemoye? Ningu si.” niringi.

<sup>18</sup>Nakolo Yesusini yu kinie konopu keri panjiku yu teko kenjingí teringi pilipelie enendo nimbendo: “Ene kolo toko topele mapele toli yema, ‘Yuni nimbe kenjipili.’ ningu nambemuna na manda manjiku kolo toko walsikimiliye? <sup>19</sup>Takisi tolemele kou mongo te na liku ora siei.” nirimu.

Enene yu molorumuna te mengo ongo yu siringi.

<sup>20</sup> Kanu kinie Yesusini enendo nimbendo: “I kouna naenga kumbikeremo kinie imbimu kinie molemoye?” nirimu.

<sup>21</sup> Enene yundu ningindu: “Romo Gapomano Ye Paa Aili Kumbine Sisamonga kumbikeremo kinie imbimu kinie molemo.” niringi.

Kanu kinie yuni enendo nimbendo: “Kou monemo Sisamonga, kene Sisamonga melema Sisamo yuyu siku, Pulu Yemonga melema Pulu Yemo yuyu siei.” nirimu.

<sup>22</sup> Yuni aku sipe „paa sumbi sipe“ nirimu mele pilkulie ‘Yu paa pilipe konginjili pelemo yemo lepamo.’ ningu pilku, konopu aisili liku mundukulie yu munduku kelko ene puringi.

<sup>23</sup> Kanu yema Yesusi kinie kou takisi toli ungumu ningu pora siringi kinie, pe aku enamonga Sadusi ye mare Yesusi molorumuna oringi. Sadusi yema ene ‘Pulu Yemone pe kolemele yamboma topa na makinjimbe, lomboroko ola na molonge.’ ningu pilku moloringi talapemo. Aku Sadusi yema ongo Yesusi walsiku pilkulie ningindu: <sup>24</sup>“Ungu Mane Silimu, „Pulu Yemonga ungu manema olio sirimu ye.“ Mosisini ungu mane sipelie nimbendo:

“Ambo limbe ye te ambolango na membalie  
kolomba kinie kanu yemo yunge angenu  
molombamone yunge ambo wayemo lipe  
angenu lipe taponjipe ambolango menjipili.”

nirimu aku sipe bokuna molemo kanumu. <sup>25</sup>„Aku ungu manemonga ulu te olionga ye mare kinie wendo orumu mele nu walsipu piliemili.“

“Angenupili yepoko pakara moloringi. Komomo ambo lipelie kolorumu. Ambolango te na molopili kolorumuna yunge bulkundu angenumuni „yunge angenu kolorumumunge“ ambolango ‘Menjembo.’ nimbe ambo wayemo kelepa lirimu. <sup>26</sup>Nakolo ambolango te na menjipelie yu we kolorumula. Yunge bulkundumuni kanu ambomo lirimula nakolo yu kepe we kolorumula. Aku teliku pukulie ye yepoko pakara pali ambolango telu kepe na mengolie kolko pora siringi kinie akiilimo we kolorumula. <sup>27</sup>Pe ambomo yu kolorumula. <sup>28</sup>Akumunge, kolemele yamboma pe lomboroko ola molonge kinie kanu ambomo ye yepoko pakara pali ya mana liringine ambomo yu ye paa naenga menu molombaye?” niringi.

<sup>29</sup>Yesusini enendo pundu topa nimbendo: “Ene Pulu Yemonga bokuna ungu molemoma kinie, Pulu Yemo kinie tondolo pelemo mele kinie, na pilku lou lemelemonga „yamboma pe tengemondo nikimili mele pilku sunduku kolo tokomele.“ <sup>30</sup>Lomboroko ola molonge yambomanga yema ambo na liku, amboma ye na puku, aku paa na tengen. Mulu koleana molemele angelloma molemele mele aku siku molonge. „Angellomane mana yamboma telemele mele na telemele kanumu.“ Aku tengemonga ‘Ene Pulu Yemonga ungumu pilku sunduku lawa telemele.’ nikiru.”

31-32 “Nakolo „ene Sadusimene, ‘Kolemele yamboma lomboroko ola na molonge.’ konopu lemelemonga ungu te Pulu Yemone enendo nirimumu enene na kanoko pilimeleye? Yuni i sipe nimbendo:

“Na Eporayamo kinie Aisake kinie Jekopo kinie  
enenga Pulu Yemo molio.” nirimu.

Pulu Yemonga bokuna aku ungu molemomo na kanoko pilimeleye?  
‘Enenga Pulu Yemo molorundu.’ na nirimu. ‘Enenga Pulu Yemo molio.’  
nirimu kanumu. Pulu Yemo yu kololi yambomanga Pulu Yemo molo; yu  
konde mololi yambomanga Pulu Yemo.” nirimu.

33 Yuni aku nirimu mele yambo maku toko moloringimene pilkulie  
yunge ungu mane sirimu unguma pilkulie pungu pungu ningu paa  
konopu aisili liku munduringi.

34 Nakolo Yesusini aku ungu nirimumuni Sadusi yemanga ungumu pipi  
sinjirimu, ene ungu te na perimuna Parisi yemane pilkulie ene liku maku  
toko „Yesusi molorumuna, oringi. 35 Oringi kinie, enenga ye te, yu Pulu  
Yemonga ungu manemanga puluma pilipe konjirimu yemone ‘Yuni nimbe  
kenjimbenje manda manjipu piliembo.’ nimbe Yesusindu walsipe pilipelie  
nimbindo: 36 “Ungu Mane Silimu, Pulu Yemone ungu mane sirimu  
pelemomanga nambolka ungu manemo yu olandopaye?” nirimu.

37 Yesusini yundu nimbendo:

“Ungu mane olandopamo i sipe:

‘Enene enenga kamelema kinie,  
enenga minime kinie,  
enenga pilipe kongnjilime kinie,  
akumane Ailimu enenga Pulu Yemo manjiku  
tondolo munduku konopu monjengi.’

aku nimbe pelemo. 38 Aku ungu manemo yu paa tondolo, olandopamo.

39 Talo sipe ungu manemo yu kinie telu sipe mele. Akumu i sipe:

‘Enene eneno yu mele mele konopu monjiku  
enenga kangimu eneno  
kondo kolko nokolemele mele  
aku sikula pulu lemo yamboma  
konopu monjiku nokoko molangi.’

nimbe pelemo. 40 Pulu Yemonga ungu mane Mosisini sirimuma pali kinie,  
Pulu Yemone ungu umbu tonjirimuma pilku yamboma ningu siringi  
yemane bokuna toringi unguma pali kinie, kanu ungumanga pulumu aku  
ungu manetolo mindi.” nirimu.

41 Kanu kinie Parisi yema aku siku we maku toko molangi Yesusini  
enendo i sipe walsipelie nimbindo: 42 “Pulu Yemone “Ene nokopa  
konjimbe ye te lipu mundumbu.” ou nimbe mako torumu ye nomi  
Kirasimundu enene nambolka konopu lekemeleye? Yu nae? Yu naene  
kalopa limbe konopu lemeleye?” nirimu kinie

enene ningindu: “Ye nomi Kirasimu yu ye nomi kingi, Depisini kalopa limbe ye te.” niringi.

<sup>43</sup> Yuni altopa ene walsipelie nimbendo: “Aku liemo Pulu Yemonga, Minimu Depisinge konopuna molopalie ungu te nirimu kinie Depisini pilipelie ye nomi Kirasimundu “Ailimu” nirimu akumu nambemuna nirimu konopu lekemeleye? Depisi yuni ye Kirasimu molomba mele, i sipe nirimu:

<sup>44</sup> “Aili Pulu Ye Yawene, nanga Ailimundu nimbendo:

“Nunge opa touma nuni nokani.” nimbu,  
pe ene topo manie mundunjimbu kene  
isili ou nu na kinie pea  
tapu topolo ye nomitolo molopolo  
melema nokambilu,

nanga ki umbukundu ongo molani.” nirimu.”

nimbe Depisini nirimu kanumu. <sup>45</sup> Depisini ye nomi Kirasimu yuntu “Nu nanga Ailimu.” nirimu liemo yu pe nambe tepa Depisini kalopa limbe ye te mindu, molombaye?” nirimu.

<sup>46</sup> Jesusini aku sipe walsirimu mele pilkulie, ye akuna moloringimenga tene ungu telu kepe pundu toko manda na niringi. Enene yu walsiku pilirangi unguma pali yuni pundu topa anju nimbe konjirimu pilkulie, pe altoko yu ungu te walsiku pilingindu pipili kolko na walsiringi.

**23** <sup>1</sup>Kanu kinie Jesusini yambo maku toringime kinie, yunge lombili andoli yema kinie, ungu nimbe sipelie nimbendo:

<sup>2</sup> “Pulu Yemonga ungu manemanga puluma pilku mane silimele yema kinie Parisi yema kinie enene Mosisini ungu manemanga puluma mane sirimu mele yandopa mane silimele. <sup>3</sup> Akumunge kanu yemane ene mane silimelema pali mimi siku pilku teangi, nakolo kanu yemane mane silimele mele kanu yema eneno pilku liku na telemelemonga kanu yema enene ulu telemelema manda lelko na teangi. <sup>4</sup> Yambo tene wale umbuni teli te tepa mimi tepalie yambo te ‘mepili.’ nimbe ola lipe buluna menjilimo mele aku siku kanu yemane yambomando ungu mane siku “I siku i siku teai.” ningu, umbuni silimele nakolo laye kolte kepe ‘Lipu taponjipu meamili.’ na nilimele.

<sup>5</sup> “Kanu yemane ulu telemelema ‘we teamili.’ ningu na telemele. ‘Yambomane olio kanokolie ‘molko konjilimele.’ ningu kanangi.’ ningu uluma telemele. Pulu Yemonga ungu manema molemo pepá te kulipi toko mambelena molo kíne ka tongendo ‘Yamboma paa kanangi.’ ningu kulipi paa aili teko toko, enenga wale pakolimenga ka moko toko monjingindu ka sulu peanga mare aili teko moko toko monjilimele.

<sup>6</sup> Yambomane langi nongo yambomando “Namili wai.” nilimele kinie kanu yema ongolie ye ailimenga polo kumbikundu ‘olio molamili.’ ningu konopu siku molemelela. Yamboma maku toko Pulu Yemonga ungumu

pilimele ulkena sukundu pukulie manie molongendo ye ailime molemele polo peanga akuna ‘molamili.’ ningu mendo puku polo akuna konopu siku molemelela. <sup>7</sup>Yamboma maku toko molemele koleana andongendo mongo kenge teko ‘We yambomane olio kanoko kapi niengi.’ ningu pilkulie konopu siku pilku andoko molemelela. Yambomane enendo ‘Rapai’ nilimele kinie paa konopu silimelela.

<sup>8</sup>“Kanu yemane aku telemele, nakolo enenga nokoli ye aili telumu mindi molemo, ene pali angenupili molemele kene yambomane “ene olionga Rapaim.” na niengi. <sup>9</sup>Enenga Lapa telumu mindi molemo, akumu mulu koleana molemo, akumunge mana yambo tendo ‘olionga ye ailimu’ ningu, “Tara” na niengi. <sup>10</sup>Pulu Yemone “Ene nokopa konjimbe ye te lipu mundumbu.” ou nimbe mako torumu ye nomi Kirasimu mindi enenga nokoli ye ailimu molemo kene yambomane enendo ‘olio nokolemo yemo’ ningu, “Ye Ailimu” naa la niengi. <sup>11-12</sup>Yambo tene yunge imbimu yuyu ambolopa ola limbe kinie „Pulu Yemone,“ yunge imbimu topa manie mundumbe; yambo tene yunge imbimu yuyu topa manie mundumbe kinie „Pulu Yemone,“ yunge imbimu ambolopa ola linjimbe kene enenga ye te ene nokomba ye aili te molopa enenga kongono kendemande yemo molopili.” [nirimu.]

<sup>13</sup>„Yu lombili andolimendo ungu nimbe kelepalie Yesusini Juda yambomanga ye aili moloringimendo nimbendo.: “Ene Pulu Yemonga ungu manemanga puluma pilku mane silimele yema kinie, Parisi yema kinie, ene mindili nongo paa molko kenjingí! Ene topele mapele toli yema! Enene yamboma Pulu Yemo ye nomi kingi molopa nokolemo mulu koleana pungí pulimele kerepulumu pipi silimele. Ene eneno sukundu na pulimele; yambo lupema pungí telemele kinie aulkemo pipi siku “Molo.” nilimelela.

<sup>14</sup>“(Ene ungu manemanga puluma pilku mane silimele yema kinie Parisi yema kinie ene mindili nongo paa molko kenjingí! Ene topele mapele toli yema! Enene ambo wayema liku lou siku enenga ulkema wa liku, enene ‘Yamboma kanangi.’ ningu Pulu Yemo kinie unguma sulu teko we ningu angilimele, akumunge kote walemo wendo ombá kinie ene kinie umbuni aili tepa pemb.)

<sup>15</sup>“Ene ungu manemanga puluma pilku mane silimele yema kinie Parisi yema kinie ene mindili nongo paa molko kenjingí! Ene topele mapele toli yema! ‘Yambo telu mindi kepe konopu alowa tepa olio lombili andomba kinie papu.’ ningu ma koleamanga kimbu kongono teko kolea sulumanga puku, nomu kusa sipimenga andolemele nakolo pe yambo te sike enene nilimele unguma pilipe lipe konopu alowa tepa lombili andolemo kinie kanu yambomo tepa kenjilimo mele paa olandopa, enene teko kenjilimele mele maniendopa, akumunge yu tepe koleana paa sike pumbe aulkemo akisnjilimele.

<sup>16</sup> “Ene mongo keri lelimene „Mongo keri leli, yamboma aulkemo lipu ora siemili.” nilimele yema ene mindili nongo paa molko kenjingí! Enene yamboma mane sikulie ningindu: “Yambo tene mi lembando ‘ulke tembelemo’ imbi lepa “Paa sike tembo.” nimbelie pe “Tembo.” nimbe panjimbe mele na temba kinie uluri molo. Nakolo yambo tene mi lembando “ulke tembelena ape kanjiringi kou gollomo” imbi lepa “Paa sike tembo.” nimbelie pe “Tembo.” nimbe panjimbe mele na temba kinie kapola na temba. Yu sike kamu tepili.” nilimele. <sup>17</sup>Ene aroma toko mongo keri leli yema! Mele nambolka melemo olandopaye? Kou gollo akumu mele olandopamo molo Pulu Yemo molemo ulke tembelemone kou gollo mako topa ‘Pulu Yemonga’ nimbe kake tenjilimo ulkemo olandopaye?

18 "Enene ungu te pea yamboma mane sikulie ningindu: "Yambo tene mi lembando 'Pulu Yemo popo toko melema kalemele polomo' imbi lepa "Paa sike tembo." nimbelie pe "Tembo." nimbe panjimbe mele na temba kinie uluri molo. Nakolo yambo tene mi lembando "aku polona ola melte singímu" imbi lepa "Paa sike tembo." nimbelie pe "Tembo." nimbe panjimbe mele na temba kinie kapola na temba. Yu sike kamu tepili." nilimele. 19 Ene mongo keri leli yema! Mele nambolka melemo olandopaye? Polona ola 'Pulu Yemo popo toko kalonjengi.' ningi silimele melemo olandopamo molo polomone kanu melema mako topa 'Pulu Yemonga' nimbe kake tenjilimo polomo olandopaye?

<sup>20</sup> "Akumunge, yambo tene mi lembando 'Pulu Yemo popo toko melema kalemele polomo' imbi lemba kinie mele polona ola lemba melemo kepe imbi lepa mi lemba. <sup>21</sup> Aku sipela yambo tene mi lembando 'ulke tembelemo' imbi lemba kinie ulke tembelemo kinie akuna sukundu molemo yemo kinie imbi lepa mi lemba. <sup>22</sup> Yambo tene mi lembando 'mulu koleamo' imbi lemba kinie Pulu Yemo ye nomi kingimu molopa kolea nokombando molemo polomo kepe aku polona ola molemo yemo kepe imbi lepa mi lembala.

23 "Ene ungu manemanga puluma pilku mane silimele yema kinie, Parisi yema kinie, ene mindili nongo paa molko kenjingí! Ene 'sike unguma nikimulu.' ningu kolo toko topele mapele toli yema! Langi kalongendo 'songo tepili.' ningu enenga ponieno mele kanga lupe lupe olemomanga inie toko langine mundulimele akumanga ungu mane te pelemomo pilku tene tene ningu nosilimelemanga telu telu Pulu Yemonga ningu yu silimele. Aku telemele nakolo ungu mane tondolo olandopa mare munduku kelko na pilku telemele. 'Yamboma apuruku yambo ailime liku taponjiku yambo kerime teko kenjiku na teko, yamboma na apuruku pali kondokolko, Pulu Yemo 'Sike.' ningu tondolo munduku pilku "Temolo." nilimele mele sumbi siku teko molko, aku teangi.' nimbe pelemo ungu manemando nikiru. Ungu mane wema pilku telemelkane munduku na kelko 'mare na telemele' nikiru akuma pali telemelkanje

papu. <sup>24</sup>Ene mongo keri lelimene „Mongo keri leli, yamboma aulkemo lipu ora siemili.” nilimele yema, ene ungu mane wema tondolo munduku pilku teko, ungu mane tondoloma na pilku telemele aku telemele mele ungu iku topo niembo: „Langi nongendo mele kanga lopalo molo lomou langine pelemo kanokolie ‘Naa namili.’ ningu wendo liku ele telemele, nakolo kongi kao te langine pelemo kinie na kanoko we liku toko penge mundulimele.

<sup>25</sup>“Ene ungu manemanga puluma pilku mane silimele yema kinie Parisi yema kinie, ene mindili nongo paa molko kenjingí! Ene topele mapele toli yema! Pellete kapomanga ulsukundu kulumiye toko konjilimele nakolo akumanga sukundu langi pelemoma enene tondolo munduku wa liku, enene eneno waka kolko eneno konopu kimbu siku limele uluma. <sup>26</sup>Ene mongo keri leli Parisi yema! Pellete kapomanga sukundu kulumiye tonge kinie ulsukundu kepe kake temba.

<sup>27</sup>“Ene ungu manemanga puluma pilku mane silimele yema kinie Parisi yema kinie, ene mindili nongo paa molko kenjingí! Ene topele mapele toli yema! ‘Yambo ono koleamo kanoko peanga kanangi.’ ningu pene kake telimu ape kanjilimele mele ene aku silime mele molemele. Yambo ono koleama sike ulsukundu peanga lemo kanolemele nakolo sukundu yambo kololimenga ombelema kinie mele puruli nurupuluma kinie peke lepa pelemo. <sup>28</sup>Ene aku siku mele molemele. Yambomane enenga kangikundu kanokolie ‘Ene ye sumbi nilime’ konopu lemele nakolo enenga konopuna sukundu kolo toli uluma kinie ulu pulu kerime kinie mindi si nimbe pelemo.

<sup>29</sup>“Ene ungu manemanga puluma pilku mane silimele yema kinie Parisi yema kinie ene mindili nongo paa molko kenjingí! Ene topele mapele toli yema! Pulu Yemone ungu umbu tonjilimoma pilku yando ningu silime kolemele kinie enenga ono telemele koleama teko mimi teko, sumbi nili yambomanga ono koleama au silimele. <sup>30</sup>Aku tekolie enene ningindu: “Olio olionga anda kolepalime kinie molemelkanje enene Pulu Yemone ungu umbu tonjirimuma pilku yamboma ningu siringi yema toko konjiringi kinie olionga anda kolepali na lipu taponjipu ene na tolemelka.” nilimele. <sup>31</sup>Aku nilimelemonga ‘Kanu yema toko konjiringi yambomane kalko liringi yema molemolo.’ ningu eneno liku ora silimele. <sup>32</sup>Aku liemo kapola enenga anda kolepalimene pulu monjiku teko kenjiringi mele enene kamu teangi.

<sup>33</sup>“Yamboma nongo konjili, wambiyema! Ene kolo topa yamboma tepa kenjili wambiyemonga waloma! Pulu Yemone enendo “Teko kenjiringimunge tepe koleana pai.” nimbé kinie ene manda kowa pungí aulke te lembaye? <sup>34</sup>Akumunge nane Pulu Yemone ungu umbu tonjimbema pilku yamboma ningu singí yema kinie, pilipe konginjili pemba yema kinie, mane singí yema kinie, ene molemelena lipu

mundukuru. Aku yemanga mare toko konjiku, mare ‘Kolangi.’ ningu unju perana uku toko monjiku, mare ene maku toko Pulu Yemonga ungumu pilili ulkemanga mengo puku ka pulsene toko, koleamanga ‘tamili.’ ningu pulú siku akilku lombili pungí.<sup>35</sup> Aku tengemonga ou pulu pulu „Pulu Yemone mulu matolo terimu kinie, kepe yandopa kinié kepe yambo sumbi nilime toko konjiringimunge ulu umbunime ene „Juda yambomanga ye ailime, kinie pemba. „Pulu Yemonga bokuna, ou pulu pulu sumbi nili ye Epele kinie, yandopa moloringi yambo sumbi nilime kinie, yandopa „Pulu Yemonga bokumu pora nilimo akuna, Berekia malo Sekaraya kinie toko konjiringi akumanga pali ulu umbunime ene kinie pemba. Sekaraya akumu Pulu Yemonga ulke suluminia lerimu ulkemo kinie Pulu Yemo popo toko melema kaloringi polomo kinie ai suku singine toringi kanumu.<sup>36</sup> Nane paa sike enendo nikiru: Ou teko kenjiringi ulumanga pali ulu umbunime i yambo kinié molkomelema kinie pemba.” nirimu.

<sup>37</sup> „Aku nimbeline Yesusini Jerusalleme moloringi yamboma yu kondo kolopa akumundu ungu te nimbeline nimbendo:”

“O Jerusalleme „yamboma,“ Jerusalleme „yamboma,“ Pulu Yemone ungu umbu tonjirimuma pilku yamboma ningu siringi yema toko konjiku, yuni yamboma ‘liku taponjengi.’ nimbe ene moloringine lipe mundurumu yema kouni toko konjiku telemele yamboma, kera gulta anumumuni yunge waloma lipe yunge kongona lopi tepa nokolemo mele nane wale aisili ene aku sipu nokolka nakolo eneno “Molo!” niringi.<sup>38</sup> Akumunge pilieme! „Opa touma ene tonge onge kinie Pulu Yemone altopa ene na nokopa na lipe taponjimbemonga,“ opa toumane ongo sike toko munduku enenga koleamo kinie enenga ulke tembelemo kinie kamu toko kalongemonga ene ku penge.<sup>39</sup> Akumunge „nane ene ungu te pea nimbu sikiru;“ Ene Jerusalleme yamboma, enene nando

“Pulu Ye Yawene lipe mundurumuna okomo yemo  
imbi ola molopa, molopa konjipili.”

ningí walemonga na altoko kanonge. Ou molo.” nirimu.

**24** <sup>1</sup>Kanu kinie Yesusi „Pulu Yemo popo toko kaloringi,“ ulke tembelena ulsu pupe aulkena pumbe purumu kinie yu lombili andolime ongo ulke tembelemonga ulke lupe lupe „paa peanga angiliringime,“ yu “Kanoi.” ningu liku ora siringi.<sup>2</sup> „Aku teringi kinie, yuni enendo nimbendo: “Ya „ulke tembele peanga angilimo,“ kanokomele melema pali paa sike nimbu sikirumu: „Pe walse ya kolea aili Jerusalleme yamboma mindili nonge walemo wendo ombá kinie,“ i ulke tembelemo tekisikulie kouma pali toko manie mundungí.” nirimu.

<sup>3</sup>Kanu kinie yu ma panggi Unju Ollipi Ponieni ola pupe manie molorumuna we yamboma na molangi yunge lombili andoli yema ongo ene eneno molkolie yundu walsiku pilkulie ningindu: “Nuni nikinu mele tewale wendo ombáye? Pe nu nondoko oni teni walemo kinie kepe ma

pora nimbé walemo kinie kepe wendo ombándo ou nambolka uluri temba kinie olío kanopolie “Kinié ombá tekemo.” nimbu pilimulúye? Ningu si.” ningu walsiringi.

<sup>4</sup>Yuni enendo nimbendo:

“Kanu uluma wendo ombámonga ungu mare<sub>1</sub> yambomane ene kolo toko singí kene kanoko konjiku molangi. <sup>5</sup>Ye aisili ongo na molio mele yu mele mele kolo toko ningindu: “[Pulu Yemone “Ene nokopa konjimbe ye te lipu mundumbu.” ou nimbe mako torumu ye nomi Kirasi<sub>2</sub> akumu na.]” ningulie aku siku kolo toko singí kene kanoko konjiku molangi. Yambo aisilini kanu yemanga unguma pilku liku “Sike nikimili.” ningí.

<sup>6</sup>“Kolea marenga opa aili teko tengen mele pilku, ‘Opali talu opa aili i sipe i sipe wendo ombá.’ ningu we ningí kinie pilkulie mini wale na mundengi. Opa tengema kinie aku uluma Pulu Yemone ‘Ou wendo opili. Laye pe mele ya ma koleamo pora nimbé.’ nimbe, nimbe panjirimunungeaku uluma sike wendo ombá nakolo aku kinie mulu matolo ou na pora nimbé. <sup>7</sup>[Mulu ma pora nimbé walemo ou wendo na opili<sub>3</sub>] yambo talape aili te kinie talape aili te kinie opa tekolo, ye nomi kingi marenga talapema kinie marenga talapema kinie opa tengen. Ya ma kolea tengenenga engele lepa, ma jimi jimi tepa, aku sipe temba. <sup>8</sup>Ambo tene ambolango kokele kanopa limbendo ou mini topa mindili nolemo mele, mulu ma pora nimbé walemo kokele wendo ombándo umbuni lupe lupeaku sipema ou wendo ombá.” [nirimu].

<sup>9</sup>“Kanu uluma wendo ombá walemanga ‘Na lombili andoli yamboma<sub>4</sub> mindili nongo, kolangi.’ ningu [ene mare] kote teko ka singí. Nanga yamboma molko nanga unguma andoko ningu singímunge koleamanga pali yambomane ene kinie mumindili kolko konopu keri panjingí.

<sup>10</sup>[Kanu umbunime wendo ombá] walemanga na ‘Sike.’ ningu tondolo munduku pilingí yambo aisili tondolo munduku pilingí mele siye kolko anju yando eneno konopu keri panjiku, ‘Kirasinge yamboma molemelemonga mindili nangi.’ ningu enenga opa touma liku singí.

<sup>11</sup>[Kanu walemanga] Pulu Yemone ungu umbu tonjilimoma na pilku we kolo toko yando ningu singí yambo aisili wendo ongela. Aku tengenicie we yambo aisilini ‘Sike nikimili.’ ningu enenga unguma pilku lingí. <sup>12</sup>Ulu paa keri aisili olandopa olandopa wendo ombámonga nanga yambomane [anju yando] konopu monjingí mele [kinie, na konopu monjingí mele kinie] siye kolongela. <sup>13</sup>Nakolo nanga ungumu munduku na kelko mulu ma pora na nipili tondolo munduku molonge yamboma [Pulu Yemone] lipe taponjipe ‘Mindili nonge koleana na puku pea molopo konjipu mindi pamili.’ nimbé. <sup>14</sup>Pulu Yemone ye nomi kingimu molopa yamboma nokombamonga temane peangamo ‘Yamboma pali piliengi!’ ningu koleamanga pali andoko ningu singí kinie pe mulu ma pora nimbé walemo kamu wendo ombá.” [nirimu].

<sup>15</sup> („Na i bokumu tokoro yemone ene boku kanokomele yambomando ungu te niembo: „Yesusini nirimu, ungumu inie anjukundu molemo akumu ene imbi kanokomele yambomane ungu pulumu paa pilku konjengi.” nimbu nikiru: „Yesusini nimbendo:”)

“Pulu Yemone ungu umbu tonjirimuma pilipe yamboma nimbe sirimu ye Denielene bokuna imbi topa nimbe sirimu mele yambo tepa pipili konjili mele paa kerimu „ulke tembelena suku” Pulu Yemonga ulke suluminia kake teline angilimbemonga kolea akumu paa kalaro molomba mele nirimu, bokuna molemo. Aku mélemo akuna wendo omba angilimbe kanokolie <sup>16</sup> „Umbuni ailime wendo ombá tekemo.” ningi pilku, kolea Judia poropinji koleamanga molonge yamboma „enenga koleama munduku kelko” ma pangi lembamanga kowa pangi. <sup>17</sup> Yambo te ulke imuna ola molopili „aku sipe wendo ombá kinie kanopalie” kowa pumbendo manie omba ‘Melema lipu membo pambo.’ nimbe ulkena sukundu na pupili. <sup>18</sup> Yambo te ponieno molopalie „Kowa pambo.” nimbe kelepa ulkendo pupe yunge ali wale sulumu na lipili. „Sumbi siku kowa mindi pangi.” <sup>19</sup> Aku sipe wendo ombá walemanga ambo ambolango monjingíme kinie, ambo ambolango ame singíme kinie, „ene manda lkisiku kowa na pungímunge” ene kinie paa umbuni wendo ombámonga ene kondo tekemo.

<sup>20</sup> “Pulu Yemo mawa tekolie, ‘Ali telemo olimenga kinie „koro molopo manda na andomolo” wale Sambatemanga kinie manda kowa na pumulú kene kanu walemanga kanu umbunime wendo na opili.’ nieyo. <sup>21</sup> Kanu walemanga umbuni paa ailime wendo ombá, ou mulu matolo pulu monjipe terimu kinie kepe, yandopa kinié kepe umbuni aku sipe te wendo na orumu. Pe kepe aku sipe umbuni ailime na wendo ombálá. <sup>22</sup> Kanu umbunime wendo ombá kinie Pulu Yemone, ‘Nondopa pora nipili.’ nimbe ou na nimbe panjilkenje yamboma pali kolemelka. Nakolo Pulu Yemone ‘Nanga yamboma molangi.’ nimbe mako torumu yamboma ‘Pali na kolangi.’ nimbe ‘Umbuni wale akuma nondopa pora nipili.’ nimbe, nimbe panjirimu.

<sup>23</sup> “Kanu umbunime omba pemba walemanga yambo marene ningindu: “Kanai! Pulu Yemone “Olio nokopa konjimbe ye te lipu mundumbu.” ou nimbe mako torumu ye nomi Kirasimu ya omba molemo.” ningí molo “Nena omba molemo.” ningí kinie enenga unguma na pilku, ‘Sike nikimili.’ ningi na piliengi! <sup>24</sup> Ye mare ongo kolo tokolie ningindu: “Pulu Yemone mako torumu ye nomi Kirasimu na.” ningí, molo kolo tokolie “Pulu Yemone ungu umbu tonjirimuma pilipulie ombo nimbu siki mulu.” ningí. ‘Yamboma pali, Pulu Yemone ‘Nanga yamboma molangi.’ nimbe mako torumu yambomane kepe lipu lou sipu, nikimulu mele ‘Sike.’ ningi tondolo munduku piliengi!” ningi Pulu Yemone mindi ulu tondolo kapola telemoma mele manda lelko ulu paa tondolo aisili tenge. Nakolo Pulu

Yemonga yambomaaku siku kondi tonge kinie enenga unguma na pilku, liku su singí.<sup>25</sup> Pe ulu akuma wendo ombá mele ‘Ene ou piliengi!’ nimbu ya nimbu sikiru mele piliei.

<sup>26-27</sup>“Wendo ombá mele nimbu sikiru, pilkimili, kene pe yambo tene nimbendo: “Ye nomi Kirasimu ne yambo na peli kolea ku leline molemo.” nimbé kinie ‘Kanamili.’ ningu akuna na payo. Molo “I ulkemonga suluminiana molemo.” ningí liemo enene ‘Sike nikimili.’ ningu na piliengi! Muluna kariapá telemo kinie ena mundi wendo olemo koleana kepe ena pulimo koleana kepe kariapá telemo walsikale kanolemele, aku sipe Manie Om̄ba Mana Ye Au Lerimu Yemo altopa manie ombá kinie koleamanga pali yambomane yu walsikale kanonge aku kene “Ya molemo ongo kanai.” ningí kinie, molo “Ne molemo puku kanopai.” ningí kinie, enenga unguma na piliengi!<sup>28</sup> Mele kololi te lemo koleana kera ilsepema ongo maku tolemele kanumu.

<sup>29</sup>“Kanu walemangaaku mindili nonge nikiru uluma wendo ombá kinie pe sumbi sipe ulu lupe lupe mare wendo ombála. Akuma i sipe:

‘Kolea tangombando ena pa telemo mele  
na tepa, sumbulu topa,  
oli ipulueli pa telemo mele na tepa,  
kombukandipime muluna manie om̄ba,  
muluna angilimo mele tondoloma  
lope lope tepa anju yando pupe,  
aku sipe ulu lupe lupema wendo ombá.’

<sup>30</sup>Kanu uluma wendo ombá kinie Manie Om̄ba Mana Ye Au Lerimu Yemo kamu ombá temba mele lipe ora simbe melte muluna angilimbe kinie kanokolie, koleamanga pali yambomane paa kola aili teko tengen. Pe kanoko molangi Manie Om̄ba Mana Ye Au Lerimu Yemo tondolo pulimu kinie, pa aili tepa telimu kinie kupe tenga suku molopa kamu manie ombá yambomane kanonge.<sup>31</sup> Kanu kinie biyukele ungu paa tondolo tepa nipili yuni yunge angelloma lipe mundumbe kinie ene winju mendo anju yando mulu ma koleamanga, pali puku Pulu Yemone ‘Nanga yamboma molangi.’ nimbe ou mako torumu yamboma sukundu sukundu lingí.

<sup>32</sup>“Unju pikimuni telemo aku sipe ungu iku mele pelemo kene pilkulie ungu pulumu piliei. Unju piki kuku topa gomo tolemo kinie kanokolie ‘Kinié ena temba walemo wendo ombá tekemo lemo.’ ningu pilimele.

<sup>33</sup>Aku sipela, i ulu “Wendo ombá.” nikiruma sike wendo ombá kinie kanokolie ningimuni ‘Yu paa sike nondopa ombá tekemo. Yu paa kamu okomo.’ ningu pilingí.<sup>34</sup> Nane enendo paa sike nimbu sikirumu: Kinié molemele yamboma ou na kolangi i “Wendo ombá.” nikiru uluma pali wendo ombá.<sup>35</sup> Mulúmu kinie mamo kinie pora nimbé nakolo nanga ungu nilioma paa pora na nimbé. Nilio mele pali paa sike wendo ombá. „nirimu.“

<sup>36</sup> “Manie Omba Mana Ye Au Lerimu Yemo paa sike ombá, nakolo yu ombá walemo na pilimolo. Ipulueli ombáne, tangoli ombáne na pilimolo. Mulu koleana angelloma kepe na pilimelela. Pulu Yemonga Malo kepe naa la pilimo. Tara yuyu mindi aku walemo, pilipe molemo.” nirimu.

<sup>37</sup> “Ou ye Noa molopili yambomane teringi mele Manie Omba Mana Ye Au Lerimu Yemo ombá temba kinie yambomane aku siku tengela.

<sup>38</sup> Ma koleamanga pali, no ou na topili yamboma langi nongo, yema ambo liku, amboma ye puku, aku uluma mindi teko mololiku puringi. Noa nona andoli sipi ulkemonga suku purumu kinie kepe ene aku uluma mindi we teko moloringi. <sup>39</sup> Ene Noanga ungumu, na pilku aku siku uluma mindi teko molangi no topa koleama pali none aki topa, yamboma pali topa konjirimu. Pe Manie Omba Mana Ye Au Lerimu Yemo kelepa ombá walemonga ou Noa molopili teko moloringi nikiru mele aku siku teko molongela. <sup>40</sup> Yu ombá walemonga ye talo lamana unju toko angilingilí kinie Pulu Yemonga angello tene ombá, ye te we molopili mundupe kelepa te lipe memba pumbe. <sup>41</sup> Ambo talo langi kalongele teko molongele kinie angello te ombá, ambo te we molopili mundupe kelepa te lipe memba pumbe.

<sup>42</sup> “Akumunge enenga Ailimu ombá walemo paa na pilimele kene ‘Yu ombá.’ ningu kanoko molai.” nirimu.

<sup>43</sup> “Ene i ungumu konopu liku munduku pilieyo: Ulke pulu ye tene ipulueli wa noli ye tene yunge ulkemo ombo bulsupe melema wa limbe mele pilkenje ‘Wa noli yemo ombá.’ nimbe nokopa molka kinie wa noli yemo yu manda suku na olka. <sup>44</sup> Aku siku ene nokoko molai. Manie Omba Mana Ye Au Lerimu Yemo ombá enamo na pilimele kene ‘Yu sike ombá.’ ningu aku siku nokoko molangi.” nirimu.

<sup>45</sup> “Akumunge ungu te niembo: Kongono tenjili kendemande ye naene kongono tepa konjinjilimo kinie kanopalie yunge ye ailimuni ‘Yuni kongono silioma sumbi sipe telemomonga yu kongono simbu kinie tepa konjimbemonga na altopo konopu kimbu sipu na molombo.’ nilimoye? Kendemande ye te aku sipe mele tepa konjipe molemomo kanopalie yunge ye ailimuni yu mako topalie yundu nimbendo: “Kongono tenjili kendemandema pali nokonjiku enenga langi nongema ena mako toliomonga ene nangi moke teko sieni, nokonjiku moloi.” nimbe yu tenga pulimo. <sup>46</sup> Pe ye ailimuni kongono simumu kanu kongono tenjili kendemandemone mimi sipe tenjipe molopili ailimu kelepa omu liemo kendemandemo yu konopu sipili. <sup>47</sup> Nane enendo paa sike nimbu sikirumu: Kanu ye ailimuni kanu kendemandemondo “Nanga mele nosilioma pali nuni nokonji.” nimbé.

<sup>48-49</sup> Nakolo ye ailimuni kanu kendemande yemondo nimbendo: “Nanga kendemande yamboma pali nokonji.” nimbe tenga pulimo kinie, kanu kendemande yemone tepa kenjipe “Nanga ailimu welea na ombá.”

konopu lepalie yuni nokonjilimo kendemande yamboma kopene topa, no nongo kekelepa toli yema kinie langi nomba no tondoloma nombalie, aku sipe tepa kenjipe molomu liemo<sup>50</sup> walse kanu kendemande yemo ‘Yunge ye ailimu ombá.’ nimbe na pilipe kongono sirimu mele na tepa, walu tepa kenjipe molomba kinie ombá.<sup>51</sup> Omba kanu yemo tepa molomba mele kanopalie, yu paa kopene topa konjipelie, kolo tolemele yambo topele mapele toli yamboma kolea keri, molemelena ‘Pupili.’ nimbe lipé mundumbe. Kanu koleana yamboma paa mindili nongo kola teko perekó molonge.” nirimu.

**25** <sup>1</sup>Aku nimbeline nirimumuni, Yesusini yuyu kelepa ombá mele ungu mare pea nimbeline nimbendo:<sup>1</sup>

“Manie Omba Mana Ye Au Lerimu Yemo kelepa wale talo sipe mana manie ombá kinie, Pulu Yemo ye nomi kingimu molopa yamboma nokomba akumu i sipe mele:

“Ye te ambo limbe uluma yamboma pea tengendo kanu yamboma maku toko moloringine yemo ombá terimu kinie pilkulie ‘Ipulueli ombá.’ ningu ambo wenepo rureponga talo enenga tepe llamema liku “Yu aulkena limulú.” ningu puringi. <sup>2</sup>Kanu ambo wenepomanga te pakara konopu na pepili aroma toko moloringi; te pakara pilipe kongnjili pepili moloringi. <sup>3</sup>Konopu na pepili aroma toko moloringi ambo wenepomane enenga tepe llamema mengo puringi nakolo llame karasene pea na mengo puringi. <sup>4</sup>Nakolo pilipe kongnjili pepili moloringimene karasene kinie enenga tepe llamema kinie mengo puringi. <sup>5</sup>Ambo limbe yemo welea na orumuna ambo wenepoma pali uru orumuna uru peringi.

<sup>6</sup>Kanu kinie ai burumi ungu te wendo ombo nimbendo: “Ambo limbe yemo okomo kanayo! Aulkena liengi wai!” nirimu.

<sup>7</sup>Kanu kinie ambo wenepoma ola angilku tepe llame ‘Aili tepa nopili.’ ningu teko mimi teringi. <sup>8</sup>Konopu na pepili moloringimene pilipe kongnjili pepili moloringimendo ningindu: “Olionga tepe llamema kumbulkumu kene enenga karasene mare olio liku munduku siei.” niringi kinie

<sup>9</sup>pilipe kongnjili pepili moloringimene pundu toko ningindu:

“Karasene ene kinie olio kinie manda na tembanje. Ene sitoana puku enenga topo toko lipai.” niringi.

<sup>10</sup>Kanu kinie sitoana topo toko lingíndu puringi kinie ambo limbe yemo orumu. Kanu kinie ye ambo limbemonga langi akuna nongendo maku toringi yamboma, pilipe kongnjili pepili moloringi wenepoma pea ulkena suku puringi. Kanu kinie ulke kune toko ingi siku langi nongo moloringi.

<sup>11</sup>Pe langi nongo molangi ambo wenepo sitoana puringime ongolie ningindu: “Ailimu, Ailimu, olionga kune ongo linji.” niringi.

<sup>12</sup>Nakolo yuni enendo pundu topa nimbendo: “Nane enendo paa sike nimbu sikirumu: Na enenga imbime na pilkiru. Ulsu molemelema manda sukundu na onge.” nirimu. nimbe Yesusini nirimu.

<sup>13</sup> „Aku nimbeline yuni altopa nimbendo: „Aku sipe temba kene Manie Omba Mana Ye Au Lerimu Yemo kelepa ombá walemo kepe ene na pilku, ipulueli ou ombáne tangoli ombáne, ipulueli ombáne, na pilimele kene yu ombá nokoko konjiku molai.” „nirimu.”

<sup>14</sup> „Nimbelie Yesusini ungu iku te pea topalie nimbendo: „Pulu Yemone ye nomi kingimu molopa yamboma nokolemo akumu, i sipe melela:

“Ye te kolea tengatope pupe molombando yunge kendemande yema “Wai.” nimbe yunge melema “Nokonjei.” nimbelie nirimumuni, <sup>15</sup> enene kongono telemele mele pilipe apurupe yunge melema ene moke tepalie ye te kou pape tausini kina mele sipe, te kou tu tausini kina mele sipe, te wane tausini kina mele sirimu. Aku tepalie yu purumu.

<sup>16</sup> Ye pape tausini kina lirimumu sumbi sipe pupe kanu koumuni bisinete tepalie nirimumuni, kou pape tausini kina olandopa pupe lirimu.

<sup>17</sup> Aku sipela ye tu tausini kina lirimumu olandopa tu tausini kina pupe lirimu. <sup>18</sup> Nakolo wane tausini kina lirimumu pupe ‘Lopi teambo.’ nimbe yuni mana muru akupe yunge nokoli yemonga koumu lowa terimu.

<sup>19</sup> Kanu kinie wale aisili omba purumu kinie kanu kendemandemanga nokoli yemo omba enendo nimbendo: “Kouma ene teringi mele kanambo liku ora siei.” „nirimu.”

<sup>20</sup> Kanu kinie pape tausini kina lirimu yemone pape tausini kina olandopa pupe lirimumu memba ombalie nimbendo: “Ailimu, nuni na pape tausini kina sirinu kanumu. Nane pape tausini kina olandopa pupu lirindumu i ambolkoro kanoi.” „nirimu.”

<sup>21</sup> Nokoli yemone yundu nimbendo: “Kendemande ye peangamo, paa papu terinu. Kongono wallopalte mele sirindumu nuni tekokonjirinumunge “Nuni nanga mele aisili nokonji.” nimbu kene nu ongo na pea tapu topo konopu sипу molambili oi.” „nirimu.”

<sup>22</sup> Ye tu tausini kina lirimu yemo yu kepe ombalie nimbendo: “Ailimu, nuni na tu tausini kina sirinu kanumu. Nane tu tausini kina olandopa pupu lirindumu i ambolkoro kanoi.” „nirimu.”

<sup>23</sup> Yunge nokolimuni yundu nimbendo: “Kendemande ye peangamo, paa papu terinu. Kongono wallopalte mele sirindumu nuni tekokonjirinumunge nanga mele aisili “Nu nokonji.” nimbu kene nu ongo na pea tapu topo konopu sипу molambili oi.” „nirimu.”

<sup>24</sup> Kanu kinie wane tausini kina lirimu yemo yu kepe ombalie nimbendo: “Ailimu, nane pilipulie, ‘Nu bisinete tondolo munduku tekokou mone lipu nosimbununge yamboma mindili nongi liemo mandala.’ ningukendemande yamboma ‘Kongono mindili siku teangi.’ ninguk, ene mele wallotolo siku melema pali nunu mindi lino yemo; ponie yambomane panjinjilimele kinie nu nunu langi melema we akuku liku; rasi witimunge kilu kinie mongotolo yambo wemane kilu tokouapurunjilimele kinie nu nunu rasi witi mongo we lino mele.’ na pilirindu.

<sup>25</sup> „Aku siku telenomonga, nane nu pipili kolopolie na pupu nunge kou na sirinumu mana lowa terindu. Kanu koumu i ambolkoro kanoyo. I nunge koumu nunu sikiru li.” nirimu.

<sup>26</sup> Aku nirimu kinie pilipelie nokoli yemone yundu pundu topa nimbendo: “Teko kenjili kendemande ye kerimu, nuni pilkulie, ‘Ponie yambomane panjinjilimele akuna na nanu langi melema we akupu lipu; rasi witimunge kilu kinie mongotolo yambo lupemane apurunjilimele kinie na nanu rasi witi we lio.’ ningu pilirinu lemo. <sup>27</sup>Aku siku pilkulie nanga kou monemo kou benge ulkena nosilinanje papu. Aku telenanje na ombo nanga koumu wendo lipulie kou wallo kolte ola panjiku silimelka lilkela.” „nirimu.”

<sup>28</sup> Kanu kendemande yemondo aku sipe nimbe pora sipelie yuni we kendemande yemando nimbendo: „I yemo tepa kenjirimu kene yunge koumu wendo likulie tene tausini kina ambolkomu yemo siei.” „nirimu.”

<sup>29</sup> “Melema nosilimo yambomo nane mare pea simbu, yu paa aisili nosimbe. Nakolo melema na nosilimo yambomo yu nosilimoma kepe wendo limbu kene aku siku tekolie, <sup>30</sup>kendemande ye kerimu sumbulu tolina liku paka toko pena mundeyo. Akuna yamboma paa mindili nongolie kola teko perekol molonge.” nirimu.” „nimbe Yesusini nirimu.”

<sup>31</sup> „Aku nimbeline yu pe kelepa omba temba mele nimbeline nimbendo: „

“Manie Omba Mana Ye A Lerimu Yemo yunge tondolo pa telimu kinie ombalie nimbemone, yunge mulu koleana angelloma kinie pali onge kinie tondolo pa teline suku ye nomi kingi polomo lembana yu molomba. <sup>32</sup>Yunge kumbikerena ma koleana yamboma pali liku maku tonjingí. Kanu kinie kongi tapu teli ye tene yunge kongime apurupelie kongi sipisipime lupe lipe mundupe, kongi memema lupe lipe mundulimo mele aku sipe Ye Nomi Kingimuni yambo maku toko molongema apurupelie nimbemone, <sup>33</sup>yambo kongi sipisipi mele molongema yunge ki umbukundu lipe mundupe, kongi memema mele molongema yunge ki tarokondo lipe mundumbe.

<sup>34-36</sup> Aku tepalie, yuni yunge ki umbukundu molonge yambomando nimbendo: “Na engelene kolorundu kinie enene na langi siringi. Na no waka kolorundu kinie enene no kolko siringi. Na aulke ponenge orundu kinie enene na “Pea molamili oi.” nirangi. Na pulue wambale na panjipu we we andorundu kinie mulu wambale te siringi. Na kuru torumu kinie nokoringi. Na ka ulkena perindu kinie ongo kanoringi. Tarane ‘Ene molko konjengi.’ nirimuna konopu peanga pepili molemele yamboma, enene ulu akuma na kinie teringi kene, ya ongo, ou mulu matolo na lepili Tarane yu nokomba koleana ene pea ‘Tapu topo molomolo.’ nimbe, nimbe panjirimu koleana sukundu wai.” nimbé.

<sup>37</sup> Aku sipe nimbé kinie pilkulie sumbi nili yambomane pundu toko yundu ningindu: “Ailimu, tewale nu engelene kolorunu kinie kanopolie

nu langi sirimulye? Tewale nu no waka kolorunu kinie kanopolie nu no kolopo sirimulye? <sup>38</sup>Nu ye ponengemo tena molorunu kinie kanopolie “Ulke sukundu molamili oi.” nirimulye? Mulu wambale na pakoko we we andorunu kinie kepe nu tena kanopolie mulu wambale sirimulye? <sup>39</sup>Nu kuru torumu kinie kepe, ka ulkena perinu kinie kepe, tewale ombo kanorumulye?” ningí.

<sup>40</sup> Aku siku ningí kinie, Ye Nomi Kingimuni enendo pundu topa nimbendo: “Nane enendo paa sike nimbu sikirumu: I nikiru mele i nanga angenupili imbi na mololi te kepe liku taponjiringi akumu na liku taponjiringi.” nimbé.

<sup>41-43</sup> Kanu kinie yunge ki tarokondo molonge yambomando nimbendo: “Pulu Yemone ‘Ene molko kenjengi.’ nilimo yamboma, na engelene kolorundu kinie enene na langi te na siringi. Na no waka kolorundu kinie enene na ‘no nambo.’ ningu kolko na siringi. Na aulke ponengemo orundu kinie na “Pea molamili oi.” na niringi. Na mulu wambale te na pakopo we we andorundu kinie na mulu wambale te na siringi. Na kuru torumu kinie na na nokoringi. Na ka ulkena perindu kinie na na ongo kanoringi. Enene na aku siku na liku taponjiringi, kene ene nanga kumbikerena na ongo anju puku, depelemo kinie yunge angelloma kinie enenga tepe we nomba pepa mindi pulimo pumbe tepe kalonjirindu akuna anju pai.” nimbé.

<sup>44</sup> Aku sipe nimbé kinie pilkulie kanu yambomane kepe pundu toko ningindu: “Ailimu, nu engelene kolorunu kinie kepe, no waka kolorunu kinie kepe, nu ponenge lelko orunu kinie kepe, we we andorunu kinie kepe, kuru torumu kinie kepe, ka ulkena perinu kinie kepe, olione nu aku siku molorunu kinie tewale kanopolie nu na lipu taponjirimulye?” ningí.

<sup>45</sup> Aku siku ningí kinie, yuni enendo pundu topa nimbendo: “Nane enendo paa sike nimbu sikirumu: Enene i nanga angenupili yambomanga imbi na mololi te na liku taponjiringi aku kinie na naa la liku taponjiringi.” nimbé.

<sup>46</sup> Kanu kinie kanu teko kenjilimele yamboma puku kamu kamu molko kenjiku mindi puli koleana pungí, nakolo sumbi nili yamboma puku kamu kamu molko konjiku mindi puli koleana pungí.” nimbe Yesusini, nirimu.

**26** <sup>1</sup>Yesusini yu pe yando ombá mele, ungu akuma nimbe pora sipelie yunge lombili andolimendo nimbendo: <sup>2</sup>“Ene pilkimili, wale talo we omba pumbe kinie Pulu Yemone olionga anda kolepalime Naa Topa We Omba Purumu Mele Pilimolo Walemo wendo ombá. Aku walemo wendo ombá kinie Manie Omba Mana Ye Au Lerimu Yemo “Kolopili unju perana ola uku tangi.” ningu liku anju singí.” nirimu.

<sup>3</sup> Yesusini aku sipe nirimu walemonga Pulu Yemo popo tonjiringi ye ailime kinie, Juda yamboma nokoringi tapu yema kinie, ene Pulu Yemo

popo tonjiringi ye aili olandopa ‘Kayapasi’ nili ye akumunge ulkena puku liku maku tokolie niringimuni,<sup>4</sup> Yesusi kiyongo ningu ka siku tongendo langi ningu moloringi.<sup>5</sup> Ningu molkolie ningindu: “Nondopo tamili,” nakolo Pulu Yemone olionga anda kolepalime Naa Topa We Omba Purumu Mele Pilimolo Walemanga ‘uluma tepo molamili.’ ningu yambo aisili ya Jerusalleme ongo maku toko molongemonga yu isili ou tomolo kinie enene olio kinie mumindili kolko opa tengen kene isili ou na topo, keleamili.” niringi.

<sup>6</sup>Kolea kanga Betani ye te ou kuru laká nombalie kelerimu ye te, imbi lelko “Ye Kuru Laká Noli Saimono” niringi kanumunge ulkena Yesusi molopili ‘ambo te kopongo wele ma mingi paa peanga te yu molorumuna memba orumu. Kanu wele paa mune tolimunge kou mone paa aili tepa purumu. Akumu memba ombalie Yesusi langi noli polo molorumuna memba omba ‘Yu tepo konjembo.’ nimbe pengena ondo lenjirimu.<sup>8</sup> Yuni aku terimu kinie kanokolie Yesusi lombili andolime konopu keri panjikulie ningindu: “Aku kopongo welemo nambemuna we teko kenjikinuye?<sup>9</sup> Aku welemo kou mone limelkanje kou aisili lipulie yambo koropama moke tepo silimelka.” niringi.

<sup>10</sup> Enene ambomondo aku siku niringi pilipelie Jesusini enendo nimbendo: “I ambomo kinie nambemuna ungu aisili nikimiliye? Yuni na kinie ulu peanga te temu.<sup>11</sup> Yambo koropama ene kinie alieli molonge nakolo na ene kinie alieli na molombo.<sup>12</sup> Na ono tengemonga yuni i wele mune tolimu nanga kangine ondo lenjimu.<sup>13</sup> Nane enendo paa sike nimbu sikirumu: Ma koleamanga pali i nanga temane peangamo andoko toko singí kinie i ambomone kinié temu temanemo kepe ‘Yambomane pilkulie ‘Yuni tepa konjirimu.’ ningu piliengi!’ ningulie aku temanemo toko singíla.” nirimu.

<sup>14</sup> Kanu walemonga Yesusi yu lombili andoli ye rurepo akumanga ye te, yunge imbimu Judasi Isikeriote, Pulu Yemo popo tonjiringi ye ailime moloringine pupe,<sup>15</sup> ene walsipe pilipelie nimbendo: “Nane ene Yesusi ambolko ka singí aulke te lipu ora sindu liemo enene na kou, nambea singíye?” nirimu. Aku nirimu kinie pilkulie enene kou sillipa mongo wane paono tene kambu toko yu siringi.<sup>16</sup> Kanu kinie yu kelepa yando ombalie Yesusi lipe ene simbe aulke te koropa molorumu.

<sup>17</sup>Pillawa Akoli Mele Isimu Naa Munduku Pillawa We Kalko Noringi Koromonga pulu pulu walemo wendo orumu kinie Juda yambomane Pulu Yemone ou enenga anda kolepalime Naa Topa We Omba Purumu mele pilingindu kongi sipisipi walo te toko nonge mele pilkulie niringimuni,<sup>18</sup> Yesusi lombili andoli yema yu molorumuna ongo walsiku pilkulie ningindu: “Pulu Yemone olionga anda kolepalime Naa Topa We Omba Purumu mele pilimulúndu kongi sipisipi walo te kinié nonimu kolea tena pupu tepo mimi tepamili konopu lekenoye?” niringi.

<sup>18</sup> Aku siku ningu walsiringi kinie, Yesusini ye te molomba mele ene lipe ora sipelie, nimbendo: “Ne kolea aili Jerusalleme suku pukulie, ne ye akumu molombana puku yundu i siku niengi: “Ungu Mane Silimuni i sipe nimu: “Na kinie ulu te wendo ombá walemo nondopa wendo ombá tekemo. Nunge ulkena sukundu na kinie na lombili andolime kinie olio Pulu Yemone olionga anda kolepalime Naa Topa We Ombo Purumu mele pilimulú kongi sipisipi walomo nomolo.” nimu.” niengi.” nirimu.

<sup>19</sup> Kanu kinie lombili andolime puku Yesusini nirimu mele tepukulie niringimuni, Pulu Yemone enenga anda kolepalime Naa Topa We Ombo Purumu mele pilingí kongi sipisipi walo nongemo teko mimi teko nosiringi.

<sup>20</sup> Kanu kinie, ipupini ena pupe kala torumu kinie Yesusi kinie lombili andoli ye rurepo kinie ongo langi noli polona moloringi. <sup>21</sup> Langi nongo moloringi kinie Yesusini nimbendo: “Nane enendo paa sike nimbu sikirumu: Enenga ye tene na lipe nanga opa touma simbe.” nirimu.

<sup>22</sup> Aku nirimu kinie pilkulie, enenga konopuna umbuni aili tepe terimu pilkulie yu mele mele walsikulie ningindu: “Ailimu, nando nikinuye?” nirungi.

<sup>23</sup> Yesusini pundu topa nimbendo: “Ene nanga ye rureponga, ye te na kinie langime polo ai suku singine ola lemo te walsikale lipu nombolo yemone na lipe, opa touma anju simbe. <sup>24</sup> Kinié Manie Ombo Mana Ye Au Lerimu Yemo kinie tenge mele koronga ou ningu panjiringi temanemo Pulu Yemonga bokuna molemo mele sike opa toumane tenge, nakolo yu lipe opa touma simbe yemo mindili nomba paa molopa kenjimbe. Yu molopa kenjimbemonga ye akumu anumuni na melkanje papu. Yu mindili na nolka.” nirimu.

<sup>25</sup> Yesusini aku sipe nirimu pilipelie Judasi, yu lipe anju simbe terimu yemo, yuni yundu nimbendo: “Rapai, nikinu yemo na molonje?” nimbe walsirimu kinie

Yesusini yundu “Sike, nu.” nirimu.

<sup>26</sup> Ene langi nongo moloringi kinie Yesusini berete te lipe Pulu Yemo kinie “Ange.” nimbe ambolopa pike lepa yu lombili andolime sipelie nimbendo: “Imu nanga kangimu ene liku nangi.” nirimu.

<sup>27</sup> Pe no waene kapo te lipelie Pulu Yemo kinie “Ange.” nimbe ene sipelie nimbendo: “I no waenemo, ene pali liku nangi. <sup>28</sup> I no waene, sikirumu nanga mememo. Pulu Yemone yu kinie yunge yamboma kinie molonge mele, ungu te nimbe panjipe mi lerimu kanu ungumu ‘Kamu wendo ombo pepili.’ nimbu ‘Yambo aisilinge ulu pulu kerime kamu manie pupili. Pulu Yemone altopa na kanopa siye kolopili.’ nimbu nanga mememo ondo lenjipulie kolombo, aku mememo imu. Akumu ene pali liku nangi. <sup>29</sup> Nane enendo i sipu nimbu sikirumu: Isili ou na no waene altopo paa na nombó. Pe mindi, Pulu Yemo ye nomi kingimu molopa nokolemo koleana ene kinie no waene kondemo kelepo nombó.” nirimu.

<sup>30</sup> Langi nongo pora sikulie, ene Pulu Yemonga konana te ningulie, pena puku ma pangi Unju Ollipi Ponieno ola puringi.

<sup>31</sup> Kanu kinie Yesusini yu lombili andolimendo nimbendo: “Paa kinié ipulueli, opa toumane, na kinie tenge ulumu kanokolie enene pali na munduku kelenge. Aku siku tenge mele, Pulu Yemone ou nirimu yunge bokuna molemo kanumu. Pulu Yemone ungu iku te topalie, nimbendo:

“Kongi sipisipi tapu yemo tangi.” nimbú,

yu tongue kinie sipisipime bulu balu ningí.”

nirimu, aku mele kinié wendo ombá. <sup>32</sup> Isili ou na toko konjingí kinie ene sike bulu balu ningí nakolo na lomboropo ola molopolie nimbumuni, na kumbi lepo kolea Gallillindu pumbu, ene pe akilku akuna onge kinie altopo pea molomolo.” nirimu.

<sup>33</sup> Yesusini aku sipe nirimu kinie pilipelie, Pitane nimbendo: “Nu kinie ulu te wendo ombámonga kanokolie enene pali ‘Nu sike.’ ningu tondolo munduku pilimele mele manie pumbe kinie nu munduku kelengi liemo nane nu aku sipe paa mundupu na kelembro, paa molo.” nirimu.

<sup>34</sup> Yesusini pundu topa nimbendo: “Nane nu paa sike nimbu sikirumu: Paa kinié ipulueli, kera gulta ou ko na topili nuni pipili kolkolie, wale yepoko nando kolo toko “Yu naeye? Na na kanolio.” nini.” nirimu.

<sup>35</sup> Nakolo Pitane yundu nimbendo: “Na nu kinie tapu tolembolomonga olto pea “Tomolo.”níngi liemo kepe nu “Naa kanolio.” paa na nimbú.” nirimu. Lombili andoli ye wemane pali ““Nu na kanolemolo.” paa na nimulú.” niringila.

<sup>36</sup> Kanu kinie Yesusi kinie yu lombili andoli yema kinie kolea ‘Gesemaní’ niline puringi. Akuna puringi kinie yuni enendo nimbendo: “Na anju pupu Pulu Yemo kinie ungu nipukuru kene ene ya molai.” nirimu. <sup>37</sup> Aku nimbeline Pita kinie Seperi malo Jemisi kinie Jonotolo, pea lipe memba pupelie ‘Na teko kenjingí ulumu paa nondopa wendo ombá tekemo.’ nimbe pilipelie, yu yuyu kondo kolopa konopu keri panjipe kameleno mindili tepili molorumu. <sup>38</sup> Yuni enendo nimbendo: “Nanga konopuna umbuni paa aili te tepamo kene na kolkoro none tekemo. Ene uru na peko na kinie pea tapu topo nokopo konjipu molamili, ene ya we mimi siku kanoko molai.” nirimu.

<sup>39</sup> Aku nimbeline, yu yuyu laye kolte anju pupe koropongo langopa tamalu pepalie Pulu Yemo kinie ungu nimbe mawa tepalie nimbendo: “Nanga Tara, na nondopo mindili noli, no mingine no nombómo ‘Naa nambo.’ nini aulke te lemo liemo paa papu nakolo ‘Nane tepolie nanu konopu simbu.’ konopu lekero mele na teambo. Nuni kanoko peanga kanoni ulumu mindi teambo.” nirimu.

<sup>40</sup> Aku nimbeline kelepa yunge lombili andoli ye yepoko moloringine yando ombo ene uru peringi kanopalie Pitando nimbendo: “Ene uru na peko na kinie ena laye kolte manda we kanoko konjiku na molemelkaye?

<sup>41</sup> ‘Kurumanga nomi Setenene, olio kondi tomba kinie tepo kenjimulú kene.’ ningulie uru na peko, Pulu Yemo kinie ungu ningu kanoko konjiku molayo. Sike ‘tepo konjemili.’ nimbu konopumane pilimolo nakolo temolondo kangimu siye tepa tondolo na pulimo.” nirimu.

<sup>42</sup> Aku sipe nimbeline yu altopa anju pupe ou Pulu Yemo kinie ungu nimbe mawa terimu mele altopa nimbendo: “Nanga Tara, na ‘Mindili noli, no mingine nomo nani.’ nirimu nomo na nombó kinie we pema liemo nuni ‘Wendo opili.’ konopu leno mele na kinie wendo opili.” nirimu.

<sup>43</sup> Altopa yando orumu kinie ene uru orumuna altoko uru peringi kanopalie <sup>44</sup> yu altopa wale yepoko sipe anju pupe Pulu Yemo kinie ungu ou nimbe mawa terimu mele altopala nirimu.

<sup>45</sup> Kelepa yando ombalie lombili andolimendo nimbendo: “Nambemuna we uru peko mulu pilku molemeleye? Kaname! Yemone Manie Omba Mana Ye Au Lerimu Yemo tonge, ulu pulu keri telemele yema lipe simbe enamo wendo ombá tekemo. <sup>46</sup> Ola angilku pamili wame! Na lipe anju simbe yemo okomo kanai!” nirimu.

<sup>47</sup> Yesusini kolea Gesemani yu lombili andolimendo, aku nimbe molopili yu lombili andoli rurepo akumanga ye Judasi orumu. Pulu Yemo popo tonjiringi ye ailime kinie, Juda yambomanga tapu yema kinie, kanu yemane liku munduringi ye aisili, yambo toli lou pulsema kinie kopema kinie mengo, Judasi kinie orangi. <sup>48</sup> Ou Yesusi molorumuna naa wangi Yesusi Juda ye ailime lipe simbe nimbe panjirimu ye Judasini, ene Yesusi yu ipulueli manda kanonge mele nimbe sipelie nimbendo: “Nane ye te kanopolie kangulumbu akumu Yesusi. Yu ambolko ka siei.” nirimu. <sup>49</sup> Aku yema, orangi kinie Judasini, yu Yesusi molorumuna sumbi sipe ombalie “Rapai, nu akuna angilinu lemo.” nimbe ombo yu kangulurumu.

<sup>50</sup> Aku terimu kinie Yesusini yundu nimbendo: “Ano, nuni teni okono mele sumbi siku tei.” nirimu.

Judasini Yesusi kinie terimu mele, kanokolie orangi yemane yu liku ka siringi. <sup>51</sup> Aku teringi kinie kanopalie Yesusi pea tapu toka angiliringi ye tene yunge lou pokete napimu kulu topa wendo lipe Pulu Yemo popo tonjiringi ye aili olandopamonga kendemande ye te topa yunge komu te topa laká lenjirimu, aku komumu wendo orumu.

<sup>52</sup> Yuniaku terimu kinie kanopalie, Yesusini yundu nimbendo: “Nunge lou pokete napimu altoko lakilí! Lou napi liku yambo tonge yamboma lou napini toko konjingíla, aku kene ‘Molo.’ nimbu lou napimene ulu te na teamili. <sup>53</sup> Nane nanga Tara walsipulie “Liku taponji.” nilkenje yuni angello ami talape rurepo, molo olandopa malapunge telu molo talo, tamburembu na “Liku taponjengi pai.” nimbe lipe mundulke akumu nu na pilkinuye? <sup>54</sup> Nakolo angellomane ongo opa toumane na ‘na tangi.’ ningu liku taponjilimelkanje, Pulu Yemonga bokuna na kinie wendo ombá nimbe molemo mele nambe tepa wendo olkaye?” nirimu.

<sup>55</sup> „Aku nimbeline Yesusini „yu ka singí oringi“ ye aisili ongo moloringimendo nimbendo: “Na ‘yambo topa wa noli yere molemo.’ konopu lelkolie na ka singíndu yambo toli lou pulsema kinie kopema kinie mengo okomeleye? Ulke tembele „kerepuluna we yamboma maku toko molemele“ koleana alieli ene pea molemolo kinie ungu mane sipu molio kinie na liku ka na silimele kanumu. <sup>56</sup> Nakolo i sipe wendo okomo ulumanga pali Pulu Yemone ungu umbu tonjirimuma pilku yamboma ningu siringi ye marene ulu mare „na kinie“ pe wendo ombá mele ou ningu bokuna toringi molemo mele kamu wendo okomo.” nirimu.

Kanu kinie yu lombili andolime pali ‘Olio pea ka singinje.’ ningu pilkulie, yu munduku kelko ene talopa lelko puringi.

<sup>57</sup> Kanu kinie Yesusi ka sikulie Pulu Yemo popo tonjiringi ye aili olandopa Kayapasi molorumuna mengo puringi. Pulu Yemonga ungu manemanga puluma pilku mane siringi yema kinie, Juda yambomanga tapu yema kinie, enene ‘Yesusi kote tenjipu piliemili.’ ningu akuna ou ongo maku toko moloringi.

<sup>58</sup> Nakolo „Yesusi mengo puringi kinie“ Pita lombili aki lipa taka lepa pupe, Pulu Yemo popo tonjiringi ye aili olandopamonga ulkena, ulke angilipe pala mele makapu terimu, ai suku singine yambo maku toringi kolea we lerimuna paa sukundu pupe, ‘Yesusi nambe tengenje piliembo.’ nimbe „Yesusi nokoko moloringi“ ele yema kinie molorumu.

<sup>59</sup> Pulu Yemo popo tonjiringi ye ailime kinie, Juda yambomanga kanjollo yema pali kinie, akumane Yesusi yu toko konjingindu ulu te tepa kenjirimu ulu te ‘Yambo tene ‘yu i sipe i sipe tepa kenjirimu.’ nimbe kolo topa nipili.’ ningu yambo te koroko moloringi kinie <sup>60</sup> yambo aisili ongo ungu mare kolo toko niringi nakolo enene yu manda toko konjingí ungu te na niringi.

Laye pe mele yambo talo ongolo <sup>61</sup> „kolo toko“ ningilindu: “I yemo i sipe nirimu „pilirimbulu.“ “I Pulu Yemo „popo toko kaloli“ ulke tembelemo nane topo tekisipulie wale yepoko ombo pupili ulke tembele „konde“ te manda kolo wangopo takombo.” nirimu. „Yuni aku nirimumunge ‘Yu Pulu Yemo mele molio.’ konopu lepalie aku nirimumu nimbe kenjirimunje.“ niringili.

<sup>62</sup> Aku niringili pilipelie Pulu Yemo popo tonjiringi ye aili olandopamo ola angilipe Yesusi walsipelie nimbendo: “Ungu te pundu toko na nikinuye? Nu „ningu kenjirinu mele“ nikimbilimu nambolka ulumu ningu kenjirinumundu nikimbiliye?” nirimu.

<sup>63</sup> Nakolo Yesusi ungu te pundu topa na nimbe we angilirimu.

Pulu Yemo popo tonjiringi ye aili olandopamone yundu altopa nimbendo: “Nu moleno mele paa sike ningu sieni.“ Konde Molopa Mindi Puli Pulu Yemo pilipe molopili “Paa sike nikiru.” ningu mi lelkolie, Pulu Yemo yunge Malo, yuni olio “Nokopa konjimbe ye te lipu mundumbu.”

nimbe mako torumu ye nomi Kirasimu sike nu molo moloye? Olio paa ningu si!” nirimu.

<sup>64</sup> Yesusini nimbendo: “Akumu na.” „nirimu.“ Ungu te pea enendo pali nikirula. Pe walse Manie Omba Mana Ye Au Lerimu Yemo, Ye Tondolo Olandopa Pulimu „kinie melema nokombando“ yunge ki umbukundu molopa, kupemanga ola molopa manie ombá ene kanonge.” nirimu.

<sup>65</sup> Aku sipe nirimumunge ‘Yu Pulu Yemo mele molio.’ nimbe nirimuna pilipelie Pulu Yemo popo tonjiringi ye aili olandopamone „paa pilipe keri pilipe“ yunge wale pakolimu yuyu ambolopa sungu sipelie nimbendo: “Kinié yu yuyu paa sike Pulu Yemo ungu taka tonjikimu kene pilipulie mongo lirimu mele nimbe simbe yambo te pea nambemuna koromoloye? Yu yuyu paa sike Pulu Yemo ungu taka tonjikimu pilkimulu. <sup>66</sup> Nambolka konopu lekemeleye? „Yu kinie nambe teamiliye?“ nirimu kinie

enene ningindu: “Yu Pulu Yemo ungu taka tonjimumunge topo konjímulu liemo papu.” niringi.

<sup>67</sup> Kanu kinie enene yunge kumbikerena I kambe toko munduku, ki lumuni toringi. Marene yu laruve tokolie ningindu: <sup>68</sup> “Nu ‘Pulu Yemone olio nokopa konjimbe ye te “Lipu mundumbu.” ou nimbe mako torumu ye nomi Kirasimu molio.’ nilino kene naene nu tokomonje ningu si.” niringi.

<sup>69</sup> Kanu kinie Pita yu pena mele, yamboma liku maku toringi koleana molorumu kinie kongono tenjili kendemande ambo te Pita molorumuna omba yundu nimbendo: “Nu kepe Gallilli disiriki ye Yesusi kinie pea tapu toko moloringi kanumanga ye te lemo.” nirimu.

<sup>70</sup> Nakolo akuna moloringi yamboma pali kanoko molangi Pitane kolo topalie “Molo.” nimbe “Nu nikinu mele na na pilkiru.” nirimu.

<sup>71</sup> Aku nimbeline Pita yu ulke kerepuluna pupe molopili kongono tenjili kendemande ambo tene yu kanopalie akuna moloringi yambomando nimbendo: “I yemo yu Nasarete ye Yesusi kinie pea tapu toko molongi ye te lemo.” nirimu.

<sup>72</sup> Pitane altopa “Molo. Nuni nikinu yemo na na kanolio.” nimbeline Pulu Yemonga imbi lepa mi lerimu.

<sup>73</sup> Laye kolte pe mele, Pita angilirimuna nondoko angiliringi yemane „yu ungu laye lupe mele nirimu mele pilkulie, yu angilirimuna ongolie yundu ningindu: “Kolea Gallilli disiriki yambomane ungu nilimele mele nu aku siku ungu nikinu pilkimulu. Yesusi kinie yu lombili andoli yema kinie kolea Gallilli disiriki yemala,„ nu kepe Gallilli ye te, aku kene ‘Nu paa sike yu lombili andoli ye te lemo.’ konopu lekemolo.” niringi.

<sup>74</sup> Aku niringi kinie Pitane Pulu Yemonga imbi lepa tondolo mundupe mi lepalie nimbendo: “Paa sike nikiru. Ene nikimili yemo paa na kanolio. Kolo tokoro liemo Pulu Yemone na topa konjipili.” nirimu.

Aku nirimu kinie tamburembu kera gulta ko torumu.

<sup>75</sup> Aku terimu kinie pilipelie Yesusini yundu “Kera gulta ou ko na topili nuni wale yepoko kolo tokolie “Yu na kanolio.” nini.” nirimu ungu

kanumu Pita kelepa pilirimu. Pilipelie ‘Ama, paa tepo kenjindu lepamo. ‘Paa na tembo.’ konopu lerindu mele sike tendu.’ nimbe pilipelie pena pupe kola paa aili tepa terimu.

**27** <sup>1</sup>Ipulueli ou kolea kokele tangorumu kinie Pulu Yemo popo tonjiringi ye ailime kinie, Juda yambomanga tapu yema kinie enene pali Yesusinge kotemo pilku pora sikulie, ‘Yu topo konjemili,’ ningu, ningu panjiringi. <sup>2</sup>Aku ningu panjikulie yu liku, ka toko, mengo puku, ‘Romo’ gapomano ye nomi Paillate molorumuna mengo puku kote tenjiringi.

<sup>3</sup>Kanu kinie Judasi, yu Yesusi lipe yunge opa touma sirimu ye kanumu, Yesusinge kotemo pilkulie “Kolopili, toko konjengi.” niringi kinie pilipelie yuni Yesusi ene lipe sirimu mele pilipe keri pilipelie kelepa konopu alowa tepe enenga kou sillipa wane paono tene ou yu siringime kelepa memba pupe Pulu Yemo popo tonjiringi ye ailime kinie Juda yambomanga tapu yema kinie sipelie nimbendo: <sup>4</sup>“Nane ye ene lipu sindu kanu yemo yu ulu te tepe na kenjili yemo ‘Toko konjengi.’ nimbu lipu sindumu paa ulu pulu keri te tendu.” nirimu.

Nakolo enene pundu toko ningindu: “Akumu olionga ungu te molo. <sup>1</sup>Nu nunu mindi olio liku sinu. <sup>2</sup>Akumu nunge kongonomo.” niringi.

<sup>5</sup>Kanu kinie Judasi yuni kou sillipa kanuma memba pupe Pulu Yemo popo toringi, ulke tembele palana topa anjukundu mundupelie yu ene mundupe kelepa anju purumu. Anju pupelie ‘Ka nombo kolambo.’ nimbeline ka te lipe memba pupelie ka nomba kolorumu.

<sup>6</sup>Pulu Yemo popo tonjiringi ye ailimene kou kanuma <sup>1</sup>manie polona, lerimu kanoko likulie ningindu: “I kouma yambo topo konjimulundu símuluma kene ulke tembele kouma kinie tere lepo nosimulú kinie kapola na temba. Akumunge ungu mane te pelemo kene na nosemili.” ningulie <sup>7</sup>ungu te ningu panjikulie ningindu: “I kou monemane mingi sosipene mane tepe mimi telemo yemonga mamo topo topo liemili. Yambo ma te na lepa enenga kolea suluna yambo ya ongo molemelemanga yambo kolongema akuna ono teangi.” ningulie aku siku topo toko liringi. <sup>8</sup>Kanu kou monemane ye te toko konjingí aulkemo akisnjiringi koumane, aku teringimunge kanu mamo imbi lelko ‘Yambo Toko Meme Ondoringi Mamo’ niringi mele kinié kepe aku sипу nilimolo.

<sup>9-10</sup> <sup>1</sup>Juda ye ailimene, aku siku teringimunge Pulu Yemone ungu umbu tonjirimuma pilipe yamboma nimbe sirimu ye Jeremayane ulu te pe wendo ombá ou nirimu mele kamu wendo orumu. Yuni nimbendo:

“Ailimuni nando ‘Tei.’ nirimu mele

ene aku siku tengendo

Isirele yambomane “Ye akumu kou sillipa

wane paono tenene topo toko liengi.”

niringi kouma likulie,

kanu koumane mingi sospipene  
 mane tepa mimi terimu yemonga mamo  
 topo toko liringi.”

nirimu.

<sup>11</sup> Judasi aku sipe tepa molopili Yesusi Romo gapomano ye nomi „Paillate, molorumumunge kumbikerena angilirimu kinie kanu ye nomimuni „yunge kotemo pilipelie,“ yu walsipe pilipelie nimbendo: “Nu Juda yambomanga ye nomi kingimu molo moloye?” nirimu.

Yesusini pundu topa nimbendo: “Sike nikinu. Akumu na.” nirimu.

<sup>12</sup> Pulu Yemo popo tonjiringi ye ailime kinie, „Juda yambomanga“ tapu yema kinie, enene Yesusi kote tenjiku Paillatendo „kolo toko,“ ungu aisili ningulie ningindu “Yesusi yu tepa kenjilimo.” ningu yu kote tenjiringi kinie Yesusi yu ungu te na nimbe we angilirimu.

<sup>13</sup> Yesusini ungu te na nirimu kanopalie, Paillatene yundu nimbendo: “Nu ulu keri aisili terinu nikimili mele nu na pilkinuye?” nirimu kinie

<sup>14</sup> Yesusi „yu tepa kenjirimu niringi mele,“ pundu topa ungu telu kepe na nimbe „karaye na tepa we angilirimu kinie kanopalie Romo,“ gapomano ye nomi kanumuni paa mini wale mundupe konopu aisili lipe mundurumu.

<sup>15-16</sup> Yesusi kote tenjiku molangi, „ye te, yunge imbi Barapasi,“ yu mongo lirimu mele yamboma pali pilku moloringi kanu yemo yu ka ulkena perimu. „Ponie tengatenga,“ Juda yambomane kolea aili Jerusalleme ongo akuna suku, Pulu Yemone enenga anda kolepalime Naa Topa We Ombo Purumu mele pilingindu langi noringi walema wendo orumu kinie enene ka ulkena perimu ye te imbi lelko “Wendo liku mundoi.” ningu mawa teringi kinie „Romo“ gapomano ye nomimuni kanu yemo wendo lipe yamboma sirimu. <sup>17</sup> Aku siku te pu opu teringi walema kamu wendo ombo pepili Yesusi kote tenjiringi pilipelie nirimumuni, „Juda yamboma liku maku toko moloringi kinie Paillatene ene walsipelie nimbendo: “Ye nae ka ulkena wendo lipu ene siembo konopu lekemeleye? Ye Barapasi wendo lipu siembo, molo enene “Pulu Yemone “Ene nokopa konjimbe ye te lipu mundumbu.” ou nimbe mako torumu ye nomi Kirasimu.” nilimele ye Yesusi wendo lipu siemboye?” nirimu. <sup>18</sup> „We yamboma Juda yambomanga ye ailime munduku kelko enenga unguma liku su siku Yesusinge ungumu pilku yu lombili andoringimunge Juda yambomanga ye ailime,“ Yesusi kinie konopu keri panjikulie kote tenjiringine pilipelie Paillatene aku sipe nirimu.

<sup>19</sup> Paillate kote pilili polona „molopa ‘Juda ye ailimene pundu toko ungu te ningínje.’“ nimbe nokopa, molorumu kinie yunge menuni ungu te yu molorumuna nimbe mundupelie nimbendo: “Nuni andi ye sumbi nilimu ulu te na tei. Kinié yu kumbu tepo kanondumunge nanga konopuna umbuni aisili wendo omu kene yu ulu te paa na tei.” nirimu.

<sup>20</sup> Paillatene “Ka ye nae wendo lipu siemboye?” nirimu kinie pilkulie, Pulu Yemo popo tonjiringi ye ailime kinie, „Juda yambomanga“ tapu

yema kinie, enene we yamboma kondi toko ungu umbu tonjikulie ““Yesusi topa konjipili. Barapasi wendo lipe sipili.” niei.” niringi.

<sup>21</sup> „Aku niringi kinie pilipelie Romo, gapomano ye nomimuni enendo “yetolonga ‘nae wendo lipu siembo.’ konopu lekemeleye?” nimbe walsirimu kinie

enene pundu toko ningindu: “Ye Barapasi ,wendo liku yando si.” niringi.

<sup>22</sup> Aku niringi kinie pilipelie Paillatene enendo nimbendo: “Aku liemo, enene “Pulu Yemone “Ene nokopa konjimbe ye te lipu mundumbu.” ou nimbe mako torumu ye nomi Kirasimu.” nilimele ye Yesusi, nambe teamboye?” nimbe walsirimu kinie

enene pali “Yu unju perana kolopili uku toko panji!” niringi.

<sup>23</sup> Aku niringi pilipelie yuni enendo nimbendo: “Aku nambemunaye? Yu mongo nambolka mongore limuye?” nirimu.

Nakolo enene „altoko, paa tondolo munduku ningindu: “Molo! Yu kolopili, unju perana uku toko panji!” niringi.

<sup>24</sup> Yunge ungumu na pilku, opa tenge teringi kanopalie Paillatene no mare kolopa lipe, yambo liku maku toko angiliringime kanoko molangi ki kulumiyе topalie nimbendo: “I yemo toko konjingí kolomba kinie ene kinie ungu pemba; nanga ungu te na pemba.” nirimu.

<sup>25</sup> „Aku sipe nirimu kinie pilkulie, yambomane pundu toko ningindu: “Yu tonge kolombamonga umbuni pembamo olio kinie olionga ambolangoma kinie pepili.” niringi.

<sup>26</sup> Kanu kinie ye Barapasi ka ulkena wendo lipe ene sirimu. „Aku tepalie, Yesusi lipe „yunge ami yema,“ sipelie nimbendo: “Yu ka pulsene tokolie pe ‘Unju perana kolopili.’ ningu mengo puku unju perana uku toko panjipai.” nirimu.

<sup>27</sup> Kanu kinie „Romo,“ gapomano ye nomimunge ami yemane Yesusi liku kanu ye nomimu perimu ulke aili akuna suku „yamboma liku maku toko moloringi koleana,“ pukulie, enenga ami talape yema pali “„Yesusi ya molemona,“ sukundu sukundu wai.” niringi. <sup>28</sup> Kanu kinie yunge mulu wambalema kulku wendo linjiku, ‘Yu ye nomi kingi te none tepili.’ ningu mulu wambale kondoli peanga te pakonjiku, <sup>29</sup> unju ka koko molorumu te mulkupiye teko ‘Ye nomi kingimunge waniemo.’ ningu pengena mere mundunjiku, kingimene unju kope te we ambolemele mele koló te liku yunge ki umbukundu amonjikulie niringimuni, yu angilirimuna koporongo langoko ungu tako tonjiku imbi we kóló toko ola linjingindu “Juda yambomanga ye nomi kingimu, nu angilinoye?” ningu <sup>30</sup> yunge kumbikerena lkambe toko kanjiku, koló kope ambolorumumu liku yunge pengena kope to pu opu teringi.

<sup>31</sup> Yu aku siku ungu taka tonjiku pora sikulie mulu wambale kondolimu kulunjiku, yunge ou panjirimu mulu wambalema altoko panjinjikulie “Yu unju perana kolopili, panjipamolo.” ningu yu liku mengo puringi.

<sup>32</sup> Romo ami yemane Yesusi Jerusalleme palana, ulsu mengo pungí pukulie niringimuni, kolea Sairini ye te, yunge imbi Saimono, ambolko liku ka mele siku Yesusi kolomba unju peramo “Kolo wangoko menji.” ningu siringi. <sup>33</sup> Pukulie, kolea Golkota puku akuna moloringi. (Golkotanga ungu pulumu ‘penge ombele leli koleamo’.) <sup>34</sup> Yesusi akuna mengo pukulie niringimuni, ‘Yamboma mindili na nangi.’ ningu, no waenena suku maratene kombili teli te munduku nosiringi aku no waenemo ‘Yu nopili.’ ningu, siringi nakolo aku no waenemo nomba pilipelie “Molo.” nimbe na norumu.

<sup>35</sup> Kanu kinie „ami yemane,“ yu unju perana ola panjikulie unjumu liku ola anjiringi. „Aku tekolie, ou unjuna ola uku toko na panjikulie,“ yunge mulu wambale „kulunjiku nosiringime.“ ‘Moke teamili.’ ningu ene yu mele mele lingí mele pilingindu kou kate teko pe mulu wambalema liringi.

<sup>36</sup> Pe yu unju perana ola angilipili tapu teko kanoko moloringi. <sup>37</sup> ‘Yu mongo lirimu mele yamboma kanangi.’ ningu

I YE YESUSI JUDA YAMBOMANGA YE NOMI KINGIMU  
ningu imbi toko yunge pengena olakondo unjuna monjiringi.

<sup>38</sup> Opa tekolo melema wa liringili ye talo pea unju pera talonga uku toko panjiringila. Te Yesusi yunge ki umbukundu uku toko, te ki tarokondo uku toko panjiringi.

<sup>39</sup> Akuna ongo purungi yambomane Yesusi „kanoko keri kanokolie yu,“ ungu taka tonjiku iri mele tokolie <sup>40</sup> ningindu: “Aa! “Ulke tembelemo tekisipulie altopo wale yepoko ombo pupili takopo limbu.” nirimu yemo, ‘Naa kolambo.’ ningu nu nunu liku taponji. Nu sike Pulu Yemonga Malo liemo unju perana manie oi.” niringi.

<sup>41</sup> Aku sikula Pulu Yemo popo tonjiringi ye ailime kinie, Pulu Yemonga ungu manemanga puluma pilku mane siringi yema kinie, „Juda yambomanga,“ tapu yema kinie, enene kepe yu ungu taka tonjikulie ningindu:

<sup>42</sup> “Yu yambo wema ‘Naa kolangi.’ nimbe lipe taponjirimu nakolo yu yuyu ‘Naa kolambo.’ nimbe manda na lipe taponjikimu. Yu ‘Isirele yambomanga ye nomi kingimu „molio.“ nilimo mele sike aku sipe, molemo liemo yu yuyu unjuna manie opili. Yu yuyu unjuna manie ombá kinie kanopolie ‘Yu sike olionga ye nomi kingimu.’ nimbu tondolo mundupu pilimolo. <sup>43</sup> Yuni ‘Pulu Yemone na lipe taponjimbe.’ nimbe tondolo mundupe pilipe molemo kanumu; yu “Pulu Yemonga Malo molio.” nilimo kene Pulu Yemone yu kanopa peanga kanopa, ‘Yu manie we olkanje papu.’ konopu lemu liemo kapola, yu ombo yu lipe taponjiye „unjuna wendo lipili.“ Aku sipe temu liemo ‘Yu sike Pulu Yemonga Malo.’ nimbu tondolo mundupu pilimolo.” niringi.

<sup>44</sup> Wa noli ye talo yu kinie unjutolonga uku toko panjiringi yetolone yu aku siku ungu taka tonjiringilila.

<sup>45</sup> Yesusi unjuna ola we angilipili, ai tangoli ena tuwellepo killoko terimu kinie kolea pali sumbulu topalie, pe ipupini ena tere killoko

terimu kinie kelerimu. <sup>46</sup>Ipupini ena tere killoko mele terimu kinie Yesusini ru nimbeline nimbendo:

“Ello, Ello, llama sapakatani.”

nirimu. Akumu Juda yambomanga ungu te. Akumunge pulumu i sipe:

“Nanga Pulu Yemo, nanga Pulu Yemo,  
na nambemuna munduku kelenuye?”

nirimu.

<sup>47</sup>Akuna nondoko angiliringimenga maren yuni aku nirimu kinie pilku „sundukulie“ ningindu: “Pilieme. Yu Illainja walsikimu.” niringi.

<sup>48</sup>Aku nirimu kinie piliringimenga ye te tamburembu lkisipe pupe ulú pinje mele te lipe no waene kombili teli mare akuna panjipelie, ‘Yesusi no waene kombili teli pinjena pelemomo nopili.’ nimbe memba omba unju pepena tengen ka topa olando sirimu. <sup>49</sup>Nakolo yu no waenemo sirimu mele kanokolie, we yambomane ningindu: “Molo. Kinié unjuna we angilipili. Illainjane sike yu ‘Naa kolopili.’ nimbe lipe taponjipe manie limbendo okomonje, kanopo kanamili.” niringi.

<sup>50</sup>Yesusini ungu te tondolo ru nimbeline, pe yunge minimundu ‘Pui.’ nimbe yu kolorumu.

<sup>51</sup>Yu aku sipe kolorumu kinie „ulu aili mare“ walsikale „wendo orumu.“ Pulu Yemo popo toko kaloringi ulke tembele „Jerusalleme suku angilirimu akuna sukundu Pulu Yemo molorumu, suluminia paa kake telimunge kerepuluna ‘Yamboma sukundu na pang.’ ningou ou alieli, mulu wambale aili tene pipi siku panjiringi angilirimu. ‘Yesusi kolopa pora sirimu kinie’ kanu mulu wambalemo ai suku singine olakondo maniendo sipe olá torumu. ‘Aku tepa,’ ma jimi jimi te tepa, kou ailime topa ungu mengu topa, <sup>52</sup>yambo ou ono teringi koleama anju yando pupe, Pulu Yemonga yambo kake teli ou koloringime „Pulu Yemone“ topa makinjirimu. <sup>53</sup>Lomboroko ola molko ono kolea peringine wendo ongolie, Yesusi pe lomboropa ola molorumu kinie Pulu Yemonga kolea aili kake teline suku pukulie yambo aisili ‘Kanangi.’ ningu purungi.

<sup>54</sup>„Romo,“ ami ye wane anderete nokorumu yemo kinie, yu pea Yesusi terimu mele tapu teko kanoko moloringi ami yema kinie, enene ma jimi jimi tepa ulu lupe lupema wendo orumu kinie kanokolie ene paa mini wale mundukulie ningindu: “I yemo yu paa sike Pulu Yemonga Malo lepamo.” niringi.

<sup>55</sup>Ambo aisili mele, ‘Yesusi unju perana kolorumu, akuna sulu teko kanoko angiliringi. Ou kanu amboma „enenga pulu“ kolea Gallilli disiriki munduku kelko Yesusi lombili andoko liku taponjiku nokoko „Jerusalleme pea“ oringi amboma. <sup>56</sup>Enenga ambo te Makatalla taono ambo Maria, te Jemisi kinie Josesi kinie eltenga anumu Maria, te ye Seperinge malotolonga anumu.

<sup>57</sup>Ipupini, kolea kala tomba terimu kinie Arimatia taono ye kamako te, yunge imbi Josepo, yu kepe Yesusi lombili andorumu ye te, yu ombo

<sup>58</sup> „Romo gapomano ye nomi, Paillate molorumuna pupe, “Yesusinge onomo na si.” nimbe mawa terimu kinie Paillatene yu “Onomo lipili.” nimbe ami yemando nimbe mundurumu.

<sup>59</sup> Paillatene “Kapola.” nirimu kinie Josepo pupe onomo manie lipe, mulu konde tene lipe kulupi torumu. Kulupi topalie <sup>60</sup> kou kande konde te, Josepo yu ‘Kolombo kinie akuna na ono teangi.’ nimbe kou kande te akupe nosirimu kou kandemonga suku memba pupe nosirimu. Nosipelie kou kande kerepuluna kou aili te perele marele memba ombo pipi sipelie yu kelepa purumu. <sup>61</sup> Makatalla taono ambo Maria kinie Maria te kinie elte kou kandemo lerimu kerepuluna nondoko <sup>62</sup> yu onomo kou kandena nosirimu mele kanoko, moloringili.

<sup>62</sup> „Kanu kinie,“ ‘Opali koro molomolo wale Sambatemo.’ ningu pilkulie, kinié mele, melema undu undu siringi kanu walemo pora nirimu kinie opalikundu Pulu Yemo popo tonjiringi ye ailime kinie, Parisi yema kinie, ene „Romo gapomano ye nomi, Paillate molorumuna puku liku maku toko angilkulie <sup>63</sup> ningindu: “Ye Ailimu, ye kanumu ou na kolopa we molopalie yambomane ‘Sike.’ ningu pilingí unguma kolo topa nirimu kanu yemo yu “Kolopolie wale yepoko ombo pumbe kinie lomboropo ola molombo.” nirimu olio pilirimulu kene <sup>64</sup> nuni ami yemando „Kanu yemo bonongo, ono tengi kou kandemo wale yepoko paa mimi siku nokai!” nieni. Naa nokonge kinie yunge lombili andoli yemane onomo ongo wa liku mengo pukulie “Yu lomboropa ola molopa ombo pumu.” ningí. Aku siku kolo toko ningí kinie yu ou ‘‘Sike nikimu.’ niengi.’ nimbe kolo torumu ungumu maniendopa, enene ‘Yambomane ‘Yuni sike aku sipe temu.’ niengi.’ ningu kolo tonge ungumu paa olandopa pembra.” niringi.

<sup>65</sup> Paillatene „Juda ye ailimendo, pundu topa nimbendo: “Aku liemo,“ ami ye mare liku mengo puku, “Yemo ono tengi koleamo nokoko konjengi.” ningu monjiku, ‘Yambomane ono koleamo ulu te na teangi.’ ningu ‘Aulkemo tondolo pipi siemili.’ konopu lenge mele teangi.” nirimu. <sup>66</sup> „Aku nirimu kinie, pilkulie ami ye mare liku mengo puku, yambo ono kou kandemo pipi siringi koumu pala teko pele lelko enenga imbimu akuna toko monjikulie, “Ami yema akuna nokoko molangi.” ningu monjikulie <sup>67</sup> ene puringi.

**28** <sup>1</sup> „Juda yambomanga koro moloringi,“ wale Sambatemo pora nimbe, enenga pulu pulu kongono walemo wendo ombando kolea tangombando muni lerimu kinie Makatalla taono ambo Maria kinie, Maria te kinie, pukulu „Yesusinge“ onomo nosiringi kou kandena onomo kanongele puringili.

<sup>2</sup> Ailimunge mulu koleana angello te manie orumu kinie ma jimi jimi paa tondolo tepa terimu. Angellomone ombo kou kandena pupe kou kande kerepulumu pipi siringi koumu wendo lipe perele marele memba

pupe nosipe akuna ola molorumu. <sup>3</sup>Kanu angellomonga kumbikeremo kariapá tepa pa telemo mele pa tepa, mulu pakorumuma kalopera topa paa kake telemo mele kake terimu. <sup>4</sup>Yesusi ono kolea nokoringi ami yema angellomo kanoko paa mini wale munduku pungu pungu ningulie yambo kololimene ungu na ningu ulu te na telemele mele ene aku siku uluri na teko we moloringi.

<sup>5</sup> Angellomone ambotolondo nimbendo: “Pipili na kolale. Yesusi ‘Kolopili.’ ningu talko unju perana uku toko panjiringi kanu yemo kanongele okombele na pilkiru. <sup>6</sup>Yu ya na lemo. „Kolopolie wale yepoko sipemonga, lomboropo ola molombo.” ou nirimu aku mele temu. Onomo ou lerimu koleamo ongo kanale. <sup>7</sup>Kanokololie popenge teko pukulu yunge lombili andolime i siku ningu siengili: “Yesusi ono koleana lepalie lomboropa ola molopa kolea Gallilli disirikindu kumbi lepa pulimo kene ene akuna yu kanonge.” ningu siengili. „Ungu nimbu sinjimbundu ondu, kanu ungumu nimbu pora sikiru.” nirimu.

<sup>8</sup> „Angellomo aku sipe ombo mona molopalie nirimu mele, kanoko pilkululie ambotolo pipili kolkolo kamele paa akokolo, aku sipe konopu talo pepili lkisiku pukulu yunge lombili andolime ningu singilí puringili. <sup>9</sup> „Lkisiku pungilí puringili kinie, Yesusi lipe sinjipte elte aulkena kanopa lipelie “Okombeleye?” nirimu. Kanu kinie eltene yunge kimbukundu puku kangulkulu yu kapi ningu imbi ola linjiringili.

<sup>10</sup> Kanu kinie Yesusini eltendo nimbendo: “Pipili na kolkololie, elte pukulu nanga angenupilindu ningilindu: “Kolea Gallillindu pang. Yu akuna kanonge.” nipale.” nirimu.

<sup>11</sup> Ambotolo kelko yando ongele oringili kinie Yesusinge ono kou kandemo nokoringi ami ye mare kolea aili „Jerusalleme, suku puku Pulu Yemo popo tonjiringi ye ailimendo uluma wendo orumu mele pali ningu sipuringi.

<sup>12</sup> „Piliringi kinie, popo tonjiringi ye ailime, Juda yambomanga ye ailime kinie pea maku tokolie ene kinie „ungu ningulie ningindu: “We yamboma i uluma wendo omu mele pilkulie “Yesusi lomboropa ola molomunje.” ningí kene ‘Naa piliengi?’ nimbu nambe teamolonje?” ningu kerepali ningulie tenge mele ningu panjikulie niringimuni, ami yema kou mone aisili sikulie <sup>13</sup> enendo ningindu: “Yambomane “Yesusi nambe temuye?” ningu walsingí kinie enene i siku niengi: “Ipulueli uru pemulu kinie yunge lombili andolimene kiyongo ningu ongo yu liku mengo púngi.” niengi. <sup>14</sup> „Olio Juda yamboma nokolemo Romo, gapomano ye nomimuni „aku tengi mele, ungu te pilimu liemo ‘Ene mongo na liengi.’ nimbu olione enenga lipu taponjipu yu kinie ungu nimulú, kanu kinie ‘Enene ono koleamo mimi siku na nokoko we uru pengi.’ konopu lembamonga mongo na lingí.” niringi.

<sup>15</sup> Aku niringimunge pilkulie ami yemane kou mone liku enene “Niei.” niringi mele yambomando niringi. Akumunge yandopa kinié i „boku

tokoro<sub>1</sub> walemo kepe Juda yambomanga koleamanga pali i ungumu anju anju pulimo pilkulie yambo aisilini kanu temanemo toko molemele.

<sup>16</sup> Amboma pukulie kanoko piliringi mele temane toko siringi<sub>2</sub> kinie pilkulie Yesusi lombili andoli ye rureponga yepoko kolea Gallilli disiriki puku, Yesusini ma pang<sub>3</sub> te imbi lepa ou “Akuna wangi.” nirimu ma pangine puringi. <sup>17</sup>Akuna puku Yesusi kanokolie niringimuni, yu kapi ning<sub>4</sub> yunge imbi ambolko ola linjiringi nakolo marene ‘Yesusi kolorumu. Imu Yesusi molo naenje?’ ning<sub>5</sub> konopu talo teko leringi.

<sup>18</sup> Kanu kinie Yesusi yu nondopa omba enendo nimbendo: “Tarane nando “Nu nunu mulu koleana melema kinie yamboma kinie, ma koleana melema kinie yamboma kinie nokani.” nimbe tondolomo na sirimu, na kinie pelemo. <sup>19</sup>Aku<sub>6</sub> tondolo na sirimumu ene simbu ene kinie pemba, kene ene ma koleamanga pali puku ‘Yamboma pali nanga ungumu pilku liku, nanga lombili andolime molangi.’ ning<sub>7</sub>, puku ning<sub>8</sub> sipukulie ningimuni, <sub>9</sub>pilku liku molonge<sub>10</sub> yamboma no linjingindu Lapa kinie Malo kinie Mini Kake Telimu kinie enenga imbi lelko ene no linjiku, <sup>20</sup>enendo “Na lombili andolimene teangi.” nirindu mele pali ‘Aku yamboma teangi.’ ning<sub>11</sub> ene mane siengi. Aku siku niliku andoko molonge kinie na ene kinie alieli molambo mulu matolo pora nimbé.” nirimu.

*[Aku pea.]*